










29 L. 11
LE
MONOPHILE.

PAR
ESTIENNE
Pasquier, Parisien.



Avec priuilege du Roy.

A PARIS,

Pour Estienne Groulleau demourât en la rue Neuue
nostre dame, à l'enseigne de saint Ian Baptiste,
pres Sainte Geneuiefue des Ardens.

1555.

35-C. 20

Extraict du priuilege du Roy.

IL est permis à Vincent Sertenas Libraire à Paris faire imprimer & mettre en vente vn liure recouré par luy, intitulé le Monophile, & nouuellement composé en nostre langue Françoisse, par Estienne Pasquier, Parsien, le quel liure ledit suppliant feroit voluntiers imprimer & mettre en lumiere : mais ne luy est loysible ce faire, sans permission & congé de nous surce, qu'il nous a humblement requis luy ottroyer. Est defendu à tous Imprimeurs, Libraires & autres marchands, quelz qu'ils soient, imprimer ou faire imprimer, ne mettre en vente icèluy liure, iusques à dix ans prochainement venans à conter du iour que ledit liure sera acheué d'imprimer. Et ce sur peine de confiscation desditz liures, autres que par luy imprimez ou faitz imprimer, & d'amende arbitraire au Roy aplicable. Ainsi qu'il apert, & est plus à plain contenu par lettres, & priuilege dudit seigneur. Donnée à Paris le duxiesme iour de Nouembre. L'an de grace mil cinq cens cinquante trois. Et de nostre regne le septiesme. Par le conseil, De Courlay. Et scellé sur simple queue de cire jaune.

*Et fut acheué d'imprimer la seconde edition,
le deuxiesme iour de Ianuer. 1555.*

6

36-c

26

6-36-c

EPISTRE DE L'AVTHEVR

A SA DAME.



A Dame, par ce que des le iour que ie me vouay à vous, tout mon pensément depuis n'a esté que de la puissance d'Amour, auquel il semble que les cieux m'aient par vostre moyen destiné, entre tous les discours qui m'ont esté plus familiers, ie me suis par fois avec assez grand merueille estonné, qui fait que veu que de toutes noz œuures l'honneur semble estre le seul ministre & gouverneur, si voyõs nous neantmoins vne infinité de liures venir en lumiere souz le nom & tiltre d'Amour, lequel entre les propos du vulgaire cognoissons à veue d'œil estre vituperé de tous. A dire vray il semble que ceux qui desirerent l'exalter par leurs escritz, s'estudient beaucoup plus au contentement de leur esprit, que de tout ce commun peuple, qui ne leur impute tel suget à honneur, ains à grand blasme & impropere: & ne fay aucune doute que quelques vns lisans ce present traitté ne m'estiment d'un grand loisir d'y

EPISTRE.

auoir employé quelques heures, & les autres plus ententifz & desireux de lucratiue ne trouuaissent beaucoup meilleur me voir amasser les escus en l'estat que ie poursuis, que pratiquer quelques baisers de vous en recompense du labeur que i'y ay mis : mais tout ainsi qu'en toutes choses de ce mode ne se trouuent les opinions des hommes conformes, aussi ne preten-ic à ce coup me porter du party du populaire. Ains me delibere ressembler celuy, lequel ayāt entrepris vne lōgue peregrination & voyage, souz l'esperance de voir la magnificence de Romme, ne se promet seulement visiter cette excellente cité, mais premier qu'attaindre à son but prend plaisir de contempler vn Turin, vne Bolongne, vne Florence, & autres villes qui s'offrent à son chemin : Ainsi poursuuant en moy le dessein ou toutes mes pensées se dressent (duquel autresfois vous ay fait part en noz plus particuliers deuis) on ne doit trouuer estrāge, si a l'imitation d'un ancien Platon, ou de nostre tēps d'un Bembe, i'ay vn peu voulu fouruoier de ma course encommencée, pour m'arrester en la contemplation d'une chose ou nature semble

nous

EPISTRE.

nous donner acheminemēt. Je n'vſe de telle
excuse ſans cauſe: d'autant qu'ayant en moy
 cōclu vous enuoyer le cōbat de trois vaillās
 chāpions ſous la conduite d'vne Amazone,
 me ſuis trouuē ſi cōbatu en mō eſprit d'vne
 extreme crainte, & deſir, qu'a peine ſans vo-
 ſtre aide me puis ie aſſeurer auquel des deux
 ie doiue dōner la victoire. Car ſi d'vne part
 l'enuie que i'ay de contenter voſtre vouloir
 (qui eſt le miē) me ſemōd à cette haute en-
 trepriſe, me promettant aſpirer à plus grand
 bien que ie ne me ſçaurois promettre: d'un
 autre coſté la crainte de ne cōplaire & agréer
 à la plus part de tout ce peuple, me rend ſi
 douteux & perplex, que me diſtrayāt de ma
 premiere volōté, m'a preſque mis en delibe-
 ratiō d'habādōner tout ce chāp. Or à voſtre
 auiſ toutesfois qui ſera celuy des deux, qui
 pour auoir pl⁹ de pouuoir en mō endroit, en
 emportera le deſſus? En bōne foy ie croy q̄
 tous ceux qui cognoiſtrōt la ſeruitude que
 i'ay en vous, ſ'aſſeureront que la moindre e-
 ſtincelle de la faueur qui eſt en moy par vo-
 ſtre moyen allumée, ſera trop plus que ſuffi-
 ſante pour abatre le grād frimas, qui ſe met
 toit en deuoir de ſ'ēlaiſiner de mō cuer, &

EPISTRE.

sera cest effect mis au calendrier de voz plus
petitz miracles , desquelz exercez tous les
iours vne infinité en moy : mais toutesfois
auec cette ruse, qu'en tout euenement n'en
demeurerez scādalisée de ces scrupuleux hi-
pocrates, par la couuerture de vostre nō, que
ie me suis proposē passer souz le voile de silē-
ce: aimāt trop mieux vous dōner a cognoi-
stre l'estime en quoy i'ay l'amour par l'affec-
tionné seruice duquel ie vous suis obligé, &
dōt i'en porte lettres au cueur, que vous pu-
bliant par ce liure, encourir tant soit peu de
mauuaise reputation du peuple: lequel neā-
moins ie priay ne prédre de mauuaise part
le peu que i'ē ay escrit. Par ce que si l'amour
est de si mauuaise digestion cōme en ses pro-
poz il maintiēt, & toutesfois de telle force,
qu'il semble que tous en general luy deuioīs
hōmage vne fois en nostre vie, sans nous en
pouuoir exempter, pour le moins pourra il
prédre auertissement par mon liure, des tra-
uerfes qui nous sont en luy occurrentes, &
par ce moyen mettre peine à le fuir . Ainsi
qu'auons veu au tēps passé maints Philoso-
phes nous auoir bāillez plusieurs preceptes,
soit de gloire, soit d'auarice, ou du contēne-
ment

EPISTRE.

ment de ce mōde, desquelz ne nous eussent
 peu bōnement & tout au long endoctriner,
 fās nous dechiffrer les secretz & natures que
 telles choses couuroient en soy. Soit doncq'
 content en cecy ceste commune, & si aucū
 par trop grāde delicateſſe, ou autres par vne
 aspreté trop aspre, ne veulent prendre mon
 excuse en payemēt, auſſi n'est ce à eux (pour
 ne deſguifer mō intentiō) auſquelz i'ay de-
 dié ceſt œuvre, ains aux miens: & tout ainſi
 qu'āciennemēt la plus part des philoſophes
 auoiēt leurs particulieres ſectes, & que chaſ-
 cun d'eux en enſuyuāt les enſeignemens &
 memoires de leurs anciēs precepteurs, eſcri-
 uoient nō aux autres, ains aux zelateurs ſans
 plus de leurs ſens & opiniōs: auſſi ardāt dās
 ce brādō d'amour, à vo^r ſeuls, mes amis, qui
 d'vne meſme flame vous conſommez, s'a-
 dreſſe ce preſent diſcours, pour recognoiſtre
 en vous par effect les propoz de mon galād
 Monophile, en vous préd mon œuvre ſa vi-
 ſée, en vous péſe trouuer hebergemēt. Puis-
 que vous & moy enſemblemēt, & d'un cō-
 mū accord, ſommes réduz profez ſouz la re-
 ligion d'amour: puis que vous & moy par
 vne hōneſte volōté auōs fait vœu de loyau-
 té enuers noz dames: puis que vous & moy

EPISTRE.

brulōs dans vn purgatoire pour paruenir & atteindre à vn heureux paradis. A vn purgatoire dy-ie, duquel vous seule, ma dame, me pouuez vn iour garétir, me rēdant la vie, nō encores perdue, ains esgarée entre tāt de tra uaux, que sans vostre moyen & aide iamais ne la recouureray. Et toutesfois l'estime ain si biē employée, puis que c'est en vostre ser uice, sās lequel ie ne pourrois viure, biē qu'il me cause mille mortz. Et me suis tousiours persuadé, que puis que par vostre souuerain miracle ne m'auiez osté la facilité de parler, & d'implorer vostre merci, ne me voudriez encor' degarnir d'une esperāce de retrouver vn iour par vostre moyen ma vie, qui à pre sent (cōme la Salemandre) préd nourriture par les flāmes. Et ou par vne trop grād disgrace ne pourray atteindre à telle felicité, seray cōme le Phenix qui seul (en ma loyau té) auray causé ma mort d'un feu par moy trop solemēt allumé; ou comme l'indiscret Icare, qui pour audacieusemēt vouloir pren dre mō vol trop hault, seray sumergé es abis mes & gouffre de tout malheur, & dira pour toute recompēse ce populasse de moy, telle mort m'estre biē deue, veu que seray tombé au fourneau par moy en ma destruction ba fty,

EPISTRE.

sty. He dieux quel piteux loyer & guerdon
 d'un lōg & cordial seruice! Sera doncq' par
 vous permis, ma dame, qu'un si loyal serui-
 teur, vn si affectionné amant tombe en telle
 oprobre du monde? sera dit qu'aux dieux &
 déesses n'y aura plus misericorde, & vous
 par vostre seule exēple nous emporterez tes-
 moignage? Ia à dieu ne plaise qu'ē beauté si
 excellente loge si grand' cruauté. Et si ainsi
 estoit que choses si cōtraires s'accouplassent
 ensēblemēt, à bō droit pourrois-ie pēser se
 renouueler en vous ce vieil Chaos, pour rui-
 ner & mettre en fin toute cette rōde machi-
 ne. Or n'en sera il ainsi, & ne tōberōs si dieu
 plaist sur ces erres: car encores trop se plaist
 nature à fabriquer belles creatures, desquel-
 les elle vous a estably parāgō, aussi biē que
 de douceur & pitié. Laquelle ie vous suply',
 ma dame, exercer enuers vostre Monophi-
 le, les discours duquel ie vous ay voulu en-
 uoyer cōme vray pourtrait & image de l'a-
 mitié que ie vous porte: Qui iamaïs ne pren-
 dra fin, tāt que ceste pauvre affligée ame se-
 ra residēte en ce miē corps, & si apres la mort
 y a souuenāce du passé, encores demeurera
 tousiours en vous, celuy qui est vostre tres-
 humble & affectionné seruant, *E. Pasquier,*

ESTIENNE IODELLE PARISIEN.

Ne verray-ie point que ma France
S'estonne de son siecle heureux,
Mais de son siecle malheureux
Qui n'a de son heur cognoissance?
Verray-ie point cest an nouveau,
Que le Latonien flambeau,
Qui va renoir son Ganimede,
Chasse avecques ses ans passez,
Ces ans à tout iamaïs chassez,
Le mal dont ce mal nous procede?

Verray-ie point qu'il te regarde,
O ma France, encor' vne fois
Gouster la douceur de ses loix,
Qui seule de l'oubly te garde?
Loix que le prince Delien
Sur son coupeau Theffalien
Entre ses sauantes sœurs donne:
Loix qui mieux te couronneroient
Que quand les Roys aïousteroient
L'autre couronne à leur couronne.

Pourquoy parmy nostre ignorance
Semez vous (ô doctes espritz)
Tant d'œuvres, si pour vostre prix
Vous n'avez que la repentance?
La terre qui vous a portez,
La terre que vous exaltez,

Ialouze de voir voz louanges
Se faire maistresse des ans,
Engloutit ses propres enfans,
Pitié mesme aux terres estranges.

Mocquons nous, Lyre ie te prie,
Mocquons nous des seueritez
De ces vieux sourciz despittez,
Par qui tout œuvre se decrie.
Que seruira (dit vn vilain)
Cest œuvre de mensonge plain,
Qui le peuple à mensonge incite?
O vilains, voulez vous encor
Dessous vn masque de Nestor
Celer vn deforme Thersite?

Mocquons nous ma Lyre, & me chante
Que de ce vieil siecle doré,
Ce siecle pour l'or adoré
Ia la saison nous est presente:
L'or tout seul retient son honneur,
L'or seul de France le bon heur,
L'or qui a la terre pour mere,
Veult clorre au ventre maternel
Dessous vn cercueil eternal
Tous ceux qui ont le ciel pour pere,
Tant l'ambition execrable
Tous ses nourrissons enchainant,
Hait le bien d'autre part venant,
Que de sa faim insatiable.
Ce qui de son gibier n'est pas

Ne sera iamais son repas.
Et comme l'asne courbè laisse
Les fleurs, pour manger les chardons,
Reiette les celestes dons,
Et sa seule fange caresse.

Mocquons nous, ma Lyre, & broquarde
Ces autres singes, qui mal nez
Pendent vn chacun à leur nez,
Souz vn demy ris que lon farde
De quelques gestes courtisans:
Ceux cy par mines desprisans
Les bonnes choses qu'ils n'entendent,
Se vont naurantz de leur cousteau,
Mesme de leur propre cordeau
Deuant les doctes yeux se pendent.

Mocquons nous, Lyre, d'auantage
De ceux là, qui mesme entre nous
Estans l'un de l'autre ialoux
Blasment l'un de l'autre l'ouyrage:
Et bien qu'ils celent au dedans
Leurs poisons sans fin remordans,
Ils appastent de leur moelle
L'enuie qui dedans se paist
L'enuie qui sans fin leur est
Et leur amie, & leur bourelle.

Mais qui nous fait ores, ma Lyre,
Changer tellement nostre son
Que la douceur de la chanson
Se tourne en l'aigreur de Satyre?

Pasquier detourne nous du riz,
Pasquier entre les bons espritz
De la France, vne gloire rare,
R'adresse vers toy nostre voix:
De toy seul parler ie deuois,
Mais sans fin ce malheur m'esgare.

Si nostre terre n'estoit telle
Que tu peux voir dedans mes vers,
France combleroit l'vniuers
Ia ia de ta gloire immortelle,
Pour auoir si bien mis au iour
De ton Monophile l'Amour:
Mais (helas, helas) nostre gloire
En France n'aura point son cours,
Si le temps rechangeant tousiours,
N'a mesme sus France victoire.

Sus doncq', Faucheur, que lon s'emplume,
Raze tout, pren l'affaire en main,
Et tant, que contre nous en vain
Se puisse obstiner la coustume.
Si tu fais vn tel changement,
Ia nostre Pasquier iustement
Vaincra d'une eternelle vie
L'ignorance, le gros sourcy,
L'ardente ambition aussi,
Le riz, & l'escumeuse enuie.

HENDE CASYLLABES

PHALEVCES.

P A R

le Conte d'Alfinois.

*Encor' France se veult trauailler en vain,
En vain France se veult trauailler encor'
A chanter de l'Amour, à chanter vn Dieu:
Mais Dieu sans deité. Quel' est sa grandeur?
Quel son foudre doré? sa flamme? son feu?
Quel son arc imitant cet Astre cornu?
Quel son traiçt acéré? sa trouffe? son coup?*

*O mensonge! ce sont, ce sont les oultilz
Du Dieu, filz de Venus, ce Dieu rechanté
En cent mille façons de vers: les oultilz
Dont il frappe le cueur, il ard les espritz
De noz poetes amants, poetes espriz
De rage & de fureur. Quel ordre d'aymer!*

*Or quant est de l'amour amy de vertu,
Don celeste de Dieu: ie t'estime heureux,
Mon Pasquier, d'en auoir fidelement faiçt
Par ton doçte labeur ce doçte discours,
Discours, tel que Platon ne peult refuzer.*

In ocio negotium.

. VN

VN AMY DE L'AVTHEVR.

Sonnet.

*Le dueil d'Amour par tant desprit & vanté,
L'aspre beauté de tant d'yeux adorée,
L'aigre douceur en tant d'escrit & dorée,
La passion d'un cerueau esuenté,
L'esprit espris, le foye tourmenté,
Le cœur nauré, la pensée esgarée,
L'œil esblouy, l'ame loing separée
D'un corps bruslant en feu d'eau augmenté,
Seront l'objet des ieunes d'Amour yures,
Et le subget de leurs amoureux liures,
Tant que ieunesse & Amour bruleront.
Mais au progres du loyal Monophile
Maugré l'ennuy que Cupidon nous file,
Tous languoureux amant & s'esueilleront.*

Musa tibi sol est.

AVX DAMES.

Comme iadis d'une grande victoire
Se bastissoient trophées triomphans
De plus en plus les temples estophans
Des haultains dieux, ornement de leur gloire,
Dames en vous, qui (comme lon doit croire)
Representez ça bas les Dieux puissans,
I'ay consacré mes esprit & mes sens,
Et le meilleur qui soit en ma memoire.
Non pour honneur, non pour los, non pour bruit,
Non pour vouloir tromper les ans encores,
I'ay faict voler ma plume par ces traces:
De mes desseins seules estes le fruit,
Et ne requiers pour tout mon labour ores
Qu'un œil guidé du moindre de voz graces.

Genio & ingenio.

I
LE PREMIER LIVRE
DV MONOPHILE.

BIBLIOTECA NAZIONALE
ROMA
VITTORIO EMANUELE



DEV de tēps apres le voya
ge d'Almaigne, & la
glorieuse entreprise du
Roy, tant pour l'illustra-
tion de ce siecle que de la
posterité, les ennemis
ayans leué le siege de
Mets, avec leur grande honte & confusion: quel-
ques Gentils-hommes voyfins (voyās tout le dan-
ger de guerre pour ceste année estre dehors) vou-
lurent retourner de compagnie en leurs maisons,
attendans nouvelle occasion de s'employer. Estans
donques eux tous de retour, & les bien recueilliz
de leurs femmes, ayāns par quelques iours donné
ordre à leurs affaires plus domestiques, delibere-
rent desrober tous les plaisirs dont ils se pourroiet
aufer, par frequentations mutuelles. Et pource
qu'ils cognoissoient le terme de leur repoꝝ bien
bref (comme tout asseurez de la cōtinuation des
guerres) establirent entr'eux vne loy de se visiter
par tout: Laquelle estoit, que les marys n'alloient
desacōpagnez de leurs femmes, à ce que les vns, et
les autres participassent par vne communauté à



LE PREMIER LIVRE

tel bien. Mesmement, d'autant qu'il y auoit plusieurs ieunes Gentilz-hommes nō pourueuz; celuy qui festoyoit les autres, estoit contraint & obligé conuier à leur festin les plus honestes & mieuX disantes Damoyelles qui se trouuassent celle part: à fin que chacun d'eux peut prendre auec elles contentement en tout honneur: eſperans par ce moyen se payer en partie des arrearages du bon temps, que Fortune leur auoit tenu en es-pargne depuis le commencement des guerres.

Ainsi prindrent ils quelque temps leurs esbats auecq' tous les plaisirs & recreations de ce monde: Mais toutesfois par ce que tous n'estoient conformes, fust pour le regard des meurs, ou des ans, aussi choisissoit chacun son plaisir selon sa complexion & nature. Les vieux s'adonnans par fois à contemplations plus seantes & conuenables à leur aage, & les ieunes à tous exercices concernans le fait des armes, ou toutes telles manieres de passetemps qu'ils se

Description des trois personnages
introduitz
aux pre-
sens dialo-
gues.

pouuoient excogiter. Là se r'encontrerent, entre autres, trois ieunes Gentilz-hommes deslitez non seulement bien aguerriz & experimenterz aux armes, mais aussi es bonnes lettres & sciences, ausquelles auoyent employé grand' partie de leur ieunesse. Ces trois braues & esti-

mez

mez entre tous les autres) pour ne se monſtrer exempts de choſe que plus correſpondoit à leur aage, ſembloyent bien faire eſtat d'aymer: ce neantmoins, comme ſont les opinions des hommes diuerſes, chacun en ſon endroit ſelon ſa particuliere aſlection: l'un d'eux aimant en telle extremité que toutes ſes cogitations ſ'adreſſoient ſeulement à ſa maiſtreſſe (celuy veux ie nommer par un nom couuert Monophile, pour quelque cauſe qui me meut) L'autre, qui pour n'eſtre en telle perfection paſſionné, ſe monſtroit gracieux & courtois aux Dames, tenant ſans comparaiſon plus du party du courtiſan que de l'Amour (lequel ie deſguiferay ſous le nom ſemblablement d'un Glaphire) Et le dernier plus ieune que les deux autres, d'un cueur gay & François eſtant adonné à toutes, ſans faire eſtat d'une ſeule (ie le veux nommer Philopole) Je croy que ces trois, eſtans diuers en iugemens, demonſtroient par exterieurs effets, leurs conceptions & penſées. Glaphire poſé, ca- reſſoit les Damoyſelles par honeſtes entretiens, ayant d'autant bonnes parties en ſoy que Gen- til-homme de la troupe. Philopole au contraire plaiſant, ouuert & ioyeux, folaiſtroit avecques elles d'un ſi naiſf entregent, qu'à peine euſt on

LE PREMIER LIVRE

peu iuger lequel des deux retournoit plus à gré
 aux Dames, ou Glaphire en son honesteté, ou
 cestuy en sa gayeté & allegresse, tant estoient
 & l'un & l'autre acompagnez de bonne gra-
 ce. Mais sus tous estoit Monophile pensif &
 refuseur, tellement que son œil pouuoit donner
 ample tesmoignage de la passion interieure de
 son cueur. Qui m'estoit vn singulier plaisir &
 consolation, pour le voir nauré au vif du mes-
 me dard, dont ie me sentoie seul (ce me sem-
 bloit au parauant) blessé : toutesfois n'estoit
 pour lors si facile me iuger tel. Car m'estant en
 ce lieu transporté, par le moyen d'un Gentil-
 homme mien amy, pour gouuerner celle qui de
 long temps tient mon cueur en sa possession, n'a-
 uois occasion d'estre melancolique comme luy,
 pour se representer deuant mes yeux ma mai-
 stressse, laquelle, de bon heur, étant en ceste com-
 pagnie, me faisoit non seulement oublier tou-
 tes les perplexitez que pour elle (hors sa pre-
 sence) i'endurois, mais aussi moy-mesme, pour
 ses gratieux propos, entrelacez d'vnes ie ne
 sçay quelles œillades, qui à mon auis auoient
 puissance faire trespasser par mesme moien cent
 & cent millions de personnes : voire & les
 Dieux mesmes s'ils se fussent voulu incorpo-
 rer,

rer, pour prester l'œil à ceste humaine Deesse. Tel ou semblable deffault rendoit le pauvre Monophile si perplexe, que ie pense que les prairies, esquelles se sequestrant souuent faisoit part de ses doleances, prenoient compassion de ses pitteuses voix & clameurs. Car plus voyoit noz ieux continuer en ioye & liesse, plus se rengregioient ses douleurs, estant pour l'heure frustré (ne sçay par quel desastre) de ce dont despendoit le comble de sa felicité. Or auint que, continuans ainsi noz ebats, & faisant nostre seiour en la maison d'un des Gentilz-hommes plus apparens, en la maniere accoustumée, se meurent pendant le disner plusieurs propos du hault & inuincible courage de nostre Roy, & ensemble de la deliurance de toute la Germanie sans coup ferir, pour la crainte seulement de celuy, auquel l'univers est promis. Pendans tous lesquels discours, furent par les plus anciens personnages diuinement deduites choses, soit du fait d'une republicque, soit de l'estat de nostre vie: mais sus tout de ceste humaine fragilité, en laquelle lors que plus pensons estre au dessus de toutes affaires, souuent par mistere diuin nous en trouuons autant eslongnez, comme en estimions estre près. Et

Discours ou
châs le fait
humain.

LE PREMIER LIVRE

entre autres communs propos fut assez longuement disputé, dont vient que nous voyons eschoir par maints exemples oculaires, qu'un Capitaine qui tout le temps de sa vie aura par hazardeuses entreprises prospéré, se trouuera, mesmes estant venu sus l'aage (auquel par un long vsage doit auoir plus d'experience) à un instant ruiné, voire par le moyen d'un ieune homme, lequel par le cours de nature deust estre moins que luy esprouué & expérimenté en telz actes, comme si Fortune fust lasse de le vouloir fauoriser. De maniere que sur ce pas fut estimé Alexandre entre toutes ses felicitéz bien heureux, par-ce que sus la fleur de son aage, donna fin par un mesme moyen à sa vie, & ses prouesses, non ayant encor' sentu les aspres morsures de Fortune, qui veritablement à la longue luy en eust autant préparé comme à beaucoup d'autres de son rang. Et s'entretenant ce discours de main en main, se trouua authorisé par diuersité de raisons. D'autant que les aucuns remettoient la coulpe de tels defaulx, non à Fortune, ains à nous mesmes, qui nous sentans esleuez & comblez de toute felicitè, bien souuent nous oublions nous de sorte, qu'aucuglez de tant de bonnes fortunes, nous
allentif-

allentissions en nous mesmes, sans preuoir que l'esprit des autres hommes est tousiours vigilant pour attaindre à tel but & degré, ou durant nostre ieunesse par vne assidue vigilance, nous nous estions acheminez. Verifians ceste raison par vne infinité d'exemples, mesmes par celle d'Annibal, lors qu'il s'abatardit aux delices de Capoue. Toutesfois les autres passans plus outre, en attribuoient toute la cause à Nature, laquelle en toutes choses de ce monde croist selon nostre portée petit à petit, iusques au degré d'extremité, auquel estant paruenue, commence tousiours à decliner, & prendre quelque decadence. En façon qu'il semble que successiuement nous tous iouyons à bout-hors. Chose non seulement auerée par les hommes, ains es plus grandes Monarchies, esquelles lon trouue l'aage d'enfance, de virilité, & puis apres de vieillesse, qui les conduit à leur ruine. Parquoy estans en cecy guidez par les instructions de Nature, ne falloit trouuer estrange si les hommes, ausquels pour quelque temps les affaires auoyent si bien succédé, venans en aage decrepit, encore qu'ils augmentassent en conseil, amoindrissoient toutesfois aux faueurs de la Fortune. Ainsi furent

LE PREMIER LIVRE

deduits telz propos par ces Gentilz-hommes anciens , qui sembloient taisiblement pronostiquer quelque chose du temps present : toutesfois avec vne telle sobriété , que qui n'eust esté bien ententif , à peine eust-il peu descouvrir quelle part tendoient leurs raisons . Et bien qu'ils ne fussent par quelques vns entenduz , si furent ils ouys avecq'vne singuliere attention, chacun y asseyant son iugement à part soy, ainsi que mieux luy sembloit. Et continuoient encores leurs propos se taillans assez de matiere pour ouurer toute celle apres-dinée, quant les nappes leuées , Philopole peu socioux pour l'heure de telle philosophie , adressant sa parolle vers vne Damoyseille ioignant laquelle il estoit, luy dist : Que ne ressemblons nous , ma Damoiselle , ces bons & anciens Capitaines, lesquelz apres vn long maniement & administration d'affaires de leurs Republiques , se despouillans de leurs estats , & habandonnans leurs villes , choisissoyent la vie champestre, pour vacquer tout le reste de leur temps , au repos & contentement de leur esprit? Car ainsi ay-ie appris que firent iadis Cincinat, Curie , & par long interualle de temps apres , ce grand Empereur Diocletian . Mais si la ville leur fut
prison,

prison, que deuons nous ores faire, veu qu'au my-lieu des champs (lieu de repos & tranquilité) sentons encore les trauerses de ce monde? voire qu'en ce petit repas en auons plus passé & ap-
pris, que tous ces grans personnages, pendant leurs plus grandes affaires. A laquelle parole la Damoysele se souriant (comme bien ap-
prise qu'elle estoit, tant en bonnes façons & ma-
nieres, comme en plusieurs autres negoces in-
cogneux à l'ordinaire des femmes) luy respon-
dit. Ie ne sçay pas, mon Gentil-homme, qu'en
iugez, si ay-ie pris vn singulier plaisir, les es-
coutant. Vray que ie ne doute point, que tels di-
scours ne se rapportent assez mal à vostre aage,
lequel à mon iugement, se delecteroit beaucoup
plus à voltiger, escrimer, ou mener quelque che-
ual à raison, que de prester icy l'oreille. Surquoy
Philopole : Trouueriez vous doncques estran-
ge, ma Damoysele, que sans interrompre leur
deuis, prissions la route de quelque prairie, là
ou pourrions choisir nostre aise, en chose qui nous
seroit aussi conuenable, comme à ses vieux Gen-
tilz-hommes, deuiser en telle maniere, de pro-
pos qui ne nous concernent en rien? Com-
ment, seigneur Philopole, repliqua la Chari-
lée (tel sera pour ce coup son nom) estes vous

LE PREMIER LIVRE

encor^s à sçauoir , que ie me delibere vn iour dresser escole de Philosophie? A ce mot ce prit à rire & l'un & l'autre : en maniere que Glaphire , qui d'un autre costé la ioignoit , ialoux de leur commun plaisir & s'interrogeant de l'occasion de ce ris: En bonne foy , dist il , ma Damoiselle , vous ne deuez esconduire ce Gentilhomme , pour vostre honneur , en requeste si favorable , qui vous est autant qu'à luy auantageuse. Et pour mon regard si ie pensois ma compagnie vous estre en ceste partie agreable , ie fournirois de bien bon cueur d'un tiers , non pour tenir le ieu ou seconder , ains pour naqueter sans plus , ou bien marquer les bons propos , que ie pense que tiendrez premier que vous departir. Je voy bien (respondit Charilée , qui parauanture n'estoit moins que ces deux Gentilhommes ennuyée de tous les propos passez pendant ce disner) que i'auray beaucoup plus d'acquest , vous acorder à tous deux du premier coup ce que desirez , que voulant vser de trop longues contestations , estre neantmoins contrainte à la parfin condescendre à voz volontez. Vous serez doncques & l'un & l'autre par moy en cest endroit obeiz : non toutefois quant à vous seigneur Glaphire , pour naque-

ter

ter comme vous dites , ains pour m'ayder & deffendre encontre le seigneur Philopole , là ou il pretendroit iouer ces ieux , comme il est bien bon coustumier . Ainsi apres plusieurs protestations faites de la part de Philopole , de ne rien entreprendre au desauantage d'elle , se leua la Damoiselle , & ensemble ces deux Gentilz-hommes, lesquels (apres vne honorable reuerence à toute la compagnie) la conduisans sous les bras , se transporterent en vn bosquet , ou de prime face rencontrerent le pauvre Monophile pensif en extremité , duquel Glaphire prenant compassion pour le martire qu'il enduroit, & Philopole se mocquant , n'estimant Amour si vehement qu'une folie , delibererent l'acoster. Combien, disoit Charilée, que ie ne face aucune doute, que le destourber d'un tel penser, ne luy soit autant gricf que chose qui luy pourroit auenir : cognoissant le semblable de ceux qui l'ont esprouué, estans en telles alteres : ce neantmoins fut entr'eux conclu, nonobstant telles remonstrances, passer outre. Or estoit ce lieu si bien comparty, & à l'auantage de ceste compaignie, qu'il sembloit que nature se fust delectée à le bastir, pour seruir vn iour de bon reposoir à si honestes personnaiges. Car là estoit vne galerie

Plaisante
description
du lieu ou
furēt tenuz
les presents
discours.

LE PREMIER LIVRE

assez longuette, si bien compassée par l'entourement & couuerture des arbrisseaux, que l'aspre chaleur du Soleil, ny la vehemence des vens, ne luy eust sceu donner aucune moleste ou atainte: Et le petit tapis d'herbe verte entremeslée d'une infinité de fleurettes, donnoit tel contentement à l'œil, que les oisillons mesmes par leurs degoisemens & ramages, faisoient prou cognoistre en quelle reuerence & estime leur estoit ce temple vmbreux, lequel ce nonobstant se sentoit beaucoup plus magnifié de l'honneur que luy faisoit Monophile (luy communiquant ses secretes & plus deuotes pensées) que non de tous les auantages que nature luy eut ottroyez. Parquoy se trouuant ce destour assez commode pour leur deuis, s'adressant Charilée à ce pauvre passionné, & entreprenant la parole sus sa compagnie, luy dist. Vrayement seigneur Monophile, ie ne me puis assez complaindre de vous, vous voyant mener vie si solitaire & dolente, en ces champs solatieux, qui non seulement pour leur belleſſe vous doyuent inuiter à quelque ioye & plaisir, ains pour l'honorable compagnie que voyez icy se recreer de plus en plus. Et neantmoins tant plus nous augmentons nostre ioye, & plus donnez

lieu

lieu, ce me semble, à voz douleurs. Qui me fait soupçonner ou qu'estes enuieux de nostre commun plaisir, ou bien qu'estes troublé d'une desplaisance insupportable : laquelle toutesfois s'il vous plaisoit communiquer, ie croy qu'il n'y a celuy de nous, qui ne s'estimast tresheureux d'en porter part, & n'en pense estre desauouée de ses deux miens compagnons. Mais bien, dirent Philopole & Glaphire, seroit-ce le plus grand bien qui nous pourroit auenir. Ma Damoysselle, respondit Monophile, ie vous en mer-
cie bien humblement, & vous pareillement
mes Gentilz-hommes : Vous asseurant que s'il
y auoit douleur en moy, à laquelle (vous la
communiquant) peussiez donner ordre, me ren-
driez trop vostre redevable d'y vouloir prester
l'oreille. Toutesfois ie vous pry estimer telle solitude, que vous me voyez tenir, n'estre causée par accident, ains par vn sot naturel, dont à moy mesme ie veux mal. Vous en direz ce qu'il vous plaira, dict Philopole, si ne me scauriez vous faire entendre, qu'autresfois ne vous aye veu plus disposé & allaigre que n'estes pour le present, & ne puis autrement croire qu'il n'y ait quelque anguille sous roche, laquelle ne voulez descouvrir, qui ainsi vous tourmente l'es-

LE PREMIER LIVRE

prit. Tant mieux seigneur Philopole, respondit Monophile: car ores qu'ainsi fust, si pourroit elle estre telle que la taisant mon mal demoureroit en son entier, la descouvrant s'accroistroit d'avantage, ny plus ny moins que d'une playe esuentée, ou d'un malade, auquel l'air est interdit. Adoncques, Philopole: Ce n'est, dist il, pas, sous correction, tout un. Car bien que les maladies du corps ne requierent l'eslongement de la maison, au contraire, celles qui concernent l'esprit (comme j'ay tousiours entendu des medecins de l'ame, qui sont les Philosophes) demandent estre mises au vent, pour leur guari-
 son. De maniere qu'es grandes passions d'Amour (dont ie croy à voz façons que sourd tout vostre mal) encor qu'ils ayent desiré trois choses, estre seul, secret, & soucieux, si n'ont-ils en telles matieres prohibé avoir un autre soy mesmes, auquel on peut seurement reueller & descouvrir les passions de son ame: pour donner par ce moyen secours à mille petites occurrences & alteres, qui nous tombent en l'esprit d'heure à autre, ou par un faulx soupçon, ou par une crainte, que quelques uns apellent Ialousie, sans laquelle Amour ne peut non plus estre, qu'un corps sans ame. Monophile le
voyant

voyant entrer au champ ou plus il se delectoit
 (qui estoit parler d'Amour, ores que de là sour-
 dist tout son malheur) commença à reprendre
 ses esprits, & comme sortant d'un profond som-
 me, vouloit se mettre sus les rancs: quant par
 bonne Fortune, ie qui pour nourrir vne heure
 mes pensées m'estois illecq' retiré, sans aucune-
 ment me douter de leur entreprise, les voyans
 en ceste altercation, me iettay dans vne touf-
 fe d'arbrisseaux, pour interrompre leur de-
 uiz. Et par-ce que pour l'heure m'estoit beau-
 coup plus agreable le taire que le parler, de-
 liberay en attendre l'issue, qui fut telle que
 pourrez apprendre par le present discours. Car
 Monophile se voyant ayguillonné & semons
 par plusieurs prieres, de descouvrir sa douleur,
 luy qui n'estoit vn seul brin beste, & pour n'e-
 stre veu retif en si honeste compagnie, soudain
 interrompant sa longue taciturnité, leur voulut
 bien donner à cognoistre en quelle cstime il a-
 uoit Amour, & qu'a luy seul en apartenoit le
 parler. Car pour vous en dire le vray, ie croy,
 que homme ne se trouua oncques plus martirisé
 d'Amour que Monophile, ny qui plus le favori-
 sât en ses communs deuiz & propos, tant se sen-
 toit perdu en son tourment. Et tellement en e-

LE PREMIER LIVRE

stoit ialoux qu'il pensoit celuy seul estre digne
 d'en parler, qui en son cueur en sentoit les poin-
 tures & aiguillons, ou pour le moins les auoit
 quelque temps sentiz: & non à vn tas de ra-
 doteux & mal faconnez Philosophes du temps
 passé, ou de ie ne sçay quels mugnets, qui n'en
 descouurirent iamais que l'escorce: car à telles
 gens on interdisoit du tout le parler. Comme ia-
 dis nous lisons des Prestres, qui pour n'estre leur
 sacro-saintz misteres prophanez, n'en lais-
 soient le maniement aux estrangers. Parquoy
 luy, comme vray ministre d'Amour, vou-
 lant sonder le gué d'auantage aux propos de
 Philopole, qui au iugement de la compagnie a-
 uoit assez bien parlé, luy dist. Tels Philoso-
 phes, seigneur Philopole, en ont iugé comme a-
 ueugles de couleurs: aussi leur est il pardonna-
 ble, si peut estre, ilz en ont dit choses imperti-
 nentes: Veu mesmement qu'ils faisoient pro-
 fession de ne succumber à l'Amour, & n'ayans
 esprouué telles algarades que dites estre en moy,
 à peine qu'ils sceussent considerer les moyens
 de s'y sçauoir bien gouverner. Je ne sçay
 que vous en estimez, seigneur Monophile, re-
 spondit Philopole, mais quant à moy telle est
 mon opinion, qu'il est beaucoup plus facile
aux

{ A qui il a-
 partiet par-
 ler d'A-
 mour.

aux gens, qui mettent toute leur estude en contemplation, iuger de telles affaires, qu'à ceux qui estans dans ce Dedalus, se treuuent si esgarrez, que tant s'en fault qu'ils sçeuissent ce qui leur est necessaire, que mesmement nous leur voyons souuent perdre sens, cerueau, & esprit, voire la souuenance d'eux mesmes. Aussi vous sçauuez que pour acquerir bruyt de bon medecin, n'est requis auoir esté long temps malade, ny pour estre excellent aduocat, auoir eu plusieurs proces en son propre & priué nom, ains au contraire au moyen des mouuemens & perturbations qui tombent aux espritz des hommes, par commune ordonnance des medecins, n'est permis au medecin, soy penser ou medeciner par son seul conseil, & à l'aduocat defendu de postuler en sa cause, comme par vn desuoyement d'esprit luy estant trop incogneue: Et aussi d'autant qu'auons le iugement beaucoup plus sain es affaires estrangeres qu'es nostres. Ceste comparaison, dist Monophile, n'apparoistroit du premier coup impertinente, toutesfois au cas qui s'offre, ie vous pry, seigneur Philopole, me dire, ne seroit-ce chose superflue, donner conseil en Amour à ceux, qui estâs exempts de ses loix, n'auroient besoin en cest

aux filozof
apartenance
par les del
mour plust
qu'au amon
les —

Araument
d'auger phil
pose prouu
son opinion

*Longfile,
e fidez car
unmet de
philopolo*
 endroit d'aucun amonnestement ou precepte?
 Or si pour ce regard telle Philosophie demou-
 roit vaine & inutile, ne seroit l'homme beau-
 coup plus sot & ridicule, qui n'ayant fait preu-
 ue de la Geometrie, deuant vn Ptolomée don-
 neroit precepte de cest art? l'homme qui en l'o-
 ratoire voudroit instruire vn Cicéron, ou bien
 vn Annibal en l'art militaire, celuy qui ia-
 mais n'auroit manié armes, n'auroit administré
 conduyte d'un exercite, ne seroit il vn Phor-
 mion, c'est à dire vne beste & vn grossier, tel
 que cestuy Phormion fut estimé par Annibal,
 lors que trop presumptueux, voulut endoctrin-
 ner ce bon Capitaine, en l'art auquel il estoit
 plus versé? Combien doncques se rendra ce pre-
 cepteur plus digne de mocquerie, qui voudra
 instruire celuy, qui estant bien auant dans l'A-
 mour, plus en apprendra à vn instant par soy
 mesmes, que non par tous les liures de telz quels
 Philosophastres non experimentez en telz œu-
 ures? A vostre auis auquel des deux preste-
 riez vous plus de foy, ou à vn Amadis de Gau-
 le représenté par noz Romans pour vn exem-
 plaire de vraye & loyale Amour, ou à vn
 Xenocrate, auquel tant s'en fault qu'il y eust
 aucun ne pour sçauoir sentir la vraye odeur
 de

de l'Amour, qu'à bon droit fut comparé à
 vne pierre, pour s'estre trouué vne nuit en la
 compagnie d'une femme, belle par dessus les
 autres, sans luy auoir iamais (nonobstant tou-
 tes caresses) touché. Et puis ordonnez qu'un
 tel nous établisse preceptes pour nous gouver-
 ner en cest art. Et vouloit passer plus outre, mais
 Charilée, le frustrant de son entreprise: Si ne
 vous souffriray-ie, dist elle, franchir ce pas, sans
 que premier me satisfaisiez à un poinct. Et
 puis que noz propos de l'un à l'autre sont tom-
 bez si auant, ie lairray arriere le motif &
 poursuite de voz disputes, fondées (me sem-
 ble) pour entendre la cause de vostre perplexi-
 té: remettant à voz bonnes & sages discre-
 tions la resolution de ce, dont vous vous tour-
 mentez en vain: En-quoy peut estre, seigneur
 Monophile, me rendray bien des vostres, mais
 non au proces que ie me prometx vous inten-
 ter, si vous ne changez d'opinion. Toutesfois
 pour autant que ceste cause n'est pas de petite e-
 stendue, reposons nous un peu sus ceste herbe,
 premier que ie vous descouure ce dont ie vous
 veux accuser, en la presence de ces deux miens
 compagnons, qui pourront iuger si à tort ie me
 porte partie contre vous. Ainsi se mettant un

LE PREMIER LIVRE

chacun à son ayse, selon que le lieu luy fauorisoit en mieux, & faisant placetz d'herbe verde, continua Charilée, d'une assez douce aspreté, sa parole en ceste sorte. C'est doncques à vous à qui i'en veux, seigneur Monophile, si vous ne iouez autre rolle, en ce que sus voz derniers propos, me semblez à tresgrand tort auoir blasmé ce Philosophe Xenocrate, pour ne s'estre voulu accommoder aux volontez d'une femme, bien qu'elle fust fauorisée en toute perfection de beauté. Vous voudriez doncques maintenir qu'un homme se trouuant en tel accessoire, seroit digne de mocquerie se departant sans exccuter son affaire. Quoy? ne scauez vous que cestuy Xenocrate auoit son cuer dedié à autre Dame, & l'ayant, trouueriez vous si estrange, comme en faites le semblant, qu'il se fust gouuerné en telle maniere, pour estre loyal à l'endroit de celle dont il estoit seruiteur? Ceste parole proferée de telle grace, causa un doux murmure parmy ceste petite troupe: D'autant qu'il n'y auoit celuy dentr'eux auquel ne fust assez cognue l'austerité de ce vieillard qu'elle disoit amoureux. Toutesfois pour satisfaire à sa demande, Philopole preuenant Monophile, luy respondit. Comment donc-

doncques, ma Damoyſſelle, ores que le ſeigneur Monophile l'eult pris en telle ſorte, & qu'il fuſt vray ce que vous dites, vous ſembleroit neantmoins ceſte opinion erronée? De ma part i'eſtimerois ceſtuy bien ſot (quoy qu'il ſe publiast porter Amour en quelque lieu) lequel ſe trouuant aux endroitz lairroit enuoler l'occaſion, pour puis, eſtant irreparable, ne la pouuoir recouurer. Vous le dites tout au plus loing de voſtre penſée, diſt la Damoyſſelle, & vous ſeigneur Monophile que vous en ſemble? preſtez vous foy à ſon dire? Ah ma Damoyſſelle, reſpondit il, ia Dieu ne permette que telle parole ſorte iamais de ma bouche, & ou l'eſprit l'auroit ſeulement penſée, ie la voudrois reparer avecq' telle penitence, que vous autres mes Dames me voudriez ordonner. Auſſi n'euffe-ie pretendu reprendre Xenocrate pour vn tel fait, en tant que ſon affection euſt eſté vouée à autre ſainte: car en ce cas tant ſ'en fault qu'il euſt encouru reprehension aucune, que ie le reputerois au contraire digne d'vne grande louange, pour auoir conſacré ſon cueur à vne ſeule, ferme & perpetuellement ſtable, comme vn rocher au mylieu des vagues & ondes. Et quant à ce que dit le ſeigneur Philopole, tant ſ'en fault que ie

Discours cõcernant la loyauté.

LE PREMIER LIVRE

luy adhere, que grandement i'abhorre & deteste telle opinion. Si est elle, dist il, fondée sus bonnes & anciennes loix, mesmes extraite des registres du temple de Venus, à Romme.

*Loy de Venus
entre la
royaute.*

Desquelles la teneur portoit ample & expresse permission, d'executer sa volenté, en l'endroit de toutes ou l'ocasion s'offriroit. Aussi ay-ie pour moy la coustume, qui desia est tant inueterée dans l'esprit des hommes, qu'il me seroit loysible auoir recours à elle, là ou la loy me deffauldroit. C'est doncques à bon escient,

*Charilée pour
la loyauté.*

dist Charilée: or crains-ie grandement que vostre loy ne trouueroit lieu en chapitre, bien que elle fust empreinte au temple de Venus, pour n'auoir esté publiée partout le temple, ains seulement à ceux qui faisoient demeure en la nef, & non aux autres qui auoient choysi leur residence dans le cuer: lesquelz pourront pretendre, la loy n'estre generale, ou en ce default alleguer cause d'ignorance. Et à ce, que ne recouriez à la coustume (ainsi comme vous menacez) vous scauez telles corruptelles de meurs, acquises par vne vsance deprauée, ne meriter nom de coustume: autrement faudroit par mesme raison dire, les vices esquels sommes enclins depuis le peché de nostre premier pere, auoir gagné

gné nom de coustume valable & legitime, pour vmbra^{ger} & couvrir les delictz que com^{met}tons. Ce propos esbranla tellement Philopole, que sans mettre de là en auant autre question sus les rangs, trouuerent en cest endroit prou de matiere à demesler. Et pour ce, luy re- contre l'
 chargeant Charilée contre le party de loyauté: Loyauté
 Je vous diray ma Damoysselle, repliqua il, ie croy que quand vous & moy voudrions entrer en ce combat, nous trouuerions tous deux bien empeschez, qui emporteroit le dessus. Par ce qu'il se trouuera autant ou plus de faulte de vostre costé, que du mien. Et pense estre vne chose autant desplaisante à Dieu, donner son cueur
à vne seule femme, comme à plusieurs, ie vou-
 lois dire d'un poinct d'auantage: car estant cest
 Amour extreme, d'hommes à femmes, & sur-
 passant tous autres, bien souuent delaissons l'A-
 mour de Dieu, pour faire nostre Dieu en elles.
 Chose si vulgaire par exemples, qu'il me semble
 n'estre besoin en faire aucun recit: seulement
 vous priray-ie, vous representer vne infinité Examp
 de grans personnages, lesquelz tant qu'ils se contre l'
 gouuernerent par vn grand nombre de concu- Loyauté
 bines, iamais ne tomberent en oprobre, mais
 lors qu'ilz se reglerent par vne tant seulement,

LE PREMIER LIVRE

entrèrent en telle confusion, que vous pouuez
voir aux histoires: tant furent raiuez & trans-
portez en leurs espritz. Aussi par vne rai-
son naturelle, toute chose esparse & dissipée
n'est iamais si aspre, que celle qui est en vn a-
massée. Parquoy ne voyez vous, ma Damoy-
selle, de combien il est meilleur faire conte de
toutes Dames en general, que souz vne vmbre
de loyauté, s'aneantissant aupres d'une, se ren-
dre à tout le monde ridicule? Sur ce poinct Mo-
nophile, auquel estoit la cause de loyauté au-
tant ou plus affectée qu'à la Damoysele, vsant
en son lieu de reuenge, prist en ceste maniere la
parole. Voyez, ie vous supply, ma Damoysele,
par quelle rethorique ce Gentil-homme nous
veult pallier vn grand vice, souz vne grande
couverture, qui est Dieu. Que ne disiez vous
par mesme moyen, seigneur Philopole (pour
vous satisfaire en vn seul mot) le mariage n'e-
stre bon, tel comme aujourd'huy obseruons &
en auons loix escrites, ains qu'à limitation Ma-
hommetique, faudroit auoir plusieurs femmes
en mesme temps, à ce que n'employans tout no-
stre cueur en vne, ne missions par auenture en
oubly l'Amour de Dieu? Soyex donques vo-
stre Iuge vous-mesmes, & vous condamnez
de

Pour la
loyauté.

de l'erreur auquel ores estes tumbé par vostre
 resolution : & tel, que presque vous auoy^{si}nez. *Les Ciniques*
 de ces anciens Ciniques, qui en leur sottie ima- *aprimet la*
 gination de Republique, entre leurs autres con- *communauté*
 ceptions, volurent les femmes en general e- *des femmes*
 stre communes. Laquelle opinion, neantmoins
 fut tousiours bannie de toute cité bien ordon-
 née & digerée. Mais qu'est il de necessité que
 ie m'estende en contemplations estranges ? n'a-
 uons nous nostre cité Chrestienne, qui nous ad-
 moneste en cecy ? Ne lisons nous en toutes pars
 estre requise la conionction d'un à une ? Voire
 mesmes encor que les secondes nocces fusses ad-
 mises de droit diuin, & humain, si ne se trou-
 uerent elles iamais si agreables, ny à Dieu, ny
 aux hommes ; que les premieres, pour ceste
 communication corporelle distribuée en plu-
 sieurs lieux. Aussi quant Adam entra en ce
 monde, Dieu ne luy bailla il sans plus une fem-
 me, laquelle il voulut tirer de ses os, pour nous
 apprendre, & certifier de l'incroyable amitié
 que deuons porter à nos femmes ? iusques à
 nous commander habandonner pere & mere
 (ausquels neantmoins tout droit de Nature
 nous ordonne obeissance) pour adherer l'un à
 l'autre. Et pourtant il me semble, seigneur Phi-

LE PREMIER LIVRE

lopoie, qu'à tresgrand tort nous voulez vous frustrer de ceste extreme amytié d'un à une, laquelle Dieu a tant, & tant, non recommandée, ains commandée. I'enten bien que sus ce pas m'allegueriez, là estre faite mention de mariage, & noz propos prendre leur cours de l'Amour simple: mais pour le moins vous auisse-ie, que là ou pretendiez, en l'opinion que soutenez encontre ma Damoyse, vous murer de quelque ombre de vertu, se trouuera en la sienne une plus vr. ye & naïue ymage du diuin, qu'en la vostre. Ce neantmoins si fault il que ie vous die, que c'est à mon grand regret (& Dieu m'en soit pourtesmoin) qu'il faille que nous constituions une double espece d'Amour, l'un gisant au mariage, l'autre dehors.

*deux especes
d'ameur*

Le motif
des troubles
de maria-
ge.

Au temps premier que tous mariages s'exploioient souz un mutuel Amour, ainsi que Dieu l'ordonna, n'estoit ceste distinction entre les hommes: mais quand par une corruptelle de temps commencerent à forligner, adoncques aussi commença ceste difference d'aymer. Ce fut en l'introduction des douaires, lors que les legislateurs, d'une assez mauuaise consideration, pour inuiter les hommes à ceste conionction reciproque (ou neantmoins estoient naturelle-

rellement enclins) les établirent es Republicques. Car pour ceste mesme raison, furent contrains ordonner infinies loix aux adulteres: D'autant que cognoissans le mal, ou par leur indiscretion estoient tombez, pour auoir priuez les mariages en partie de leur acoustumée amitié (au suplement de laquelle auoient inuentez les douaires) leur fut necessaire, pour entretenir au moins mal qu'ils pourroient, leur Republicque ia depraüée, trouuer nouuelle medecine: Qui fut la cohercion de ceux qui enfraindroient telz mariages, bien que par leurs constitutions, ils les eussent renduz corrompus. Et qu'il soit ainsi que ie dy, vous le trouuerex aueré par la republicque de Sparte, en laquelle ce bon legislateur Licurge, n'establit aucune loy de l'adultere, pour ne le rendre à ses citoyens cogneu. Mais qui leur rendoit non cogneu? estoit-ce que les aiguillons de Nature ne tombassent en leurs espritx, aussi bien qu'en l'entendement de tous peuples? Non, non, ie vous auise messieurs, ains ceste excellente ordonnance sans plus, par laquelle ce grand legislateur & Philosophe, deboutant les dotx de sa Republicque, voulut les mariages se paracheuer par vne seule & cordiale amitié.

Licurge
n'ordonna
aucune loy
contre l'adu-
tere.—

LE PREMIER LIVRE

Inconuenient Ains ne se fault-il esbahir, si ceux qui pour le
uauient a iourd'huy se celebrent, se brassans seulement
eus qui ce iourd'huy se celebrent, se brassans seulement
ariet s'ule souz vne attente d'argent, se trouue ceste dif-
erit souz une ference en Amour: au grand interest bien sou-
tarite d'argent uent, & preiudice des maris, qui pour ne s'estre
 adressez à leurs vrayes & entieres moxtiez,
 voyent souuentes-fois leurs femmes, s'adon-
 ner à celuy qui semble que les cieux luy ayent
 des le commencement destiné. Or ou tend don-
 ques tout ce discours? ie veux dire que si en ma-
 riage (qui pour le iourd'huy ne se fait que par
 appetence du bien) lon estime se deuoir gar-
 der loyauté, non moins deuons nous faire le sem-
 blable hors mariage, voire & à l'endroit de la
 Dame mariée, si parauenture il eschet que cel-
 le part, nostre affection se transpote. Quoy? si
 ie disois d'auantage, serois-ie de vous repris?
 car on ne me sçauroit faire entendre, que le lien
 des loix Ciuiles puisse plus que celuy des loix
 de Nature: Et toutesfois ie ne passerois plus
 outre, ains me restraindray en cecy. Vous auisant
 seulement que celuy qui d'une vraye & non
 fainte Amour, s'est voué en quelque endroit,
 se doit porter, voire se portera enuers toutes au-
 tres Dames, pour le regard de la sienne, plus
 que ne fit Xenocrate (dont noz propos prei-
 gnent

gnent leur cours) enuers la bonne Dame Phryné. A l'heure Philopole, plus pour esueiller la compagnie, que pour autre occasion (toutesfois d'une assez bonne grace) luy respondit.

Ie voy bien, seigneur Monophile, qu'en nous se trouuera verifié le commun dire, c'est qu'une fable attire l'autre. D'autant que plus vous avancez, & plus me semonnez à vous respondre, non seulement au poinct duquel a pris fondement ceste presente question, mais aussi en beaucoup d'autres: ausquels si ie voulois entrer, ie crains que vous & moy nous missions à nostre ayse en un borbier, duquel l'issue seroit par trop difficile. Si ne demeureray-ie pour ce coup muet en chose si fauorable. Et combien qu'il semble que les passages de mariage, qu'ores auez mis en auant, pour rendre vostre amitié d'un à une plus authorisée, ne concernent gueres nos propos, si vous satisferay-ie en cest endroit si ie puis. Ie m'auoy sine, dites vous, d'un Mahomet, qui aprouua plusieurs femmes en mesme temps, ou bien d'un ancien Cinique, qui voulut toutes les femmes estre communes. Laissons leurs noms, ie vous suply, par le moyen desquels me voulez rendre odieux. Car qui vous a appris, seigneur Monophi-

Contre la
loyauté.

LE PREMIER LIVRE

le, le mariage d'un à une estre meilleur, que celui d'un à plusieurs, si non la loy? laquelle neantmoins, si par maniere de dispute il nous est loysible mettre hors (comme sont nos pensées libres) estimez vous, que ce dernier mariage ne se munisse de deffense, tout aussi bien que le vostre? Car si entre tous animaux Nature voulut créer le seul homme, vray sociable, nous aprenant (pour entretenir ceste humaine société) nous reunir l'un à l'autre, me voudriez vous ores nier que l'union ne soit plus grande, d'un seul avecq' plusieurs, qu'avecq' une seule femme? Toutesfois, seigneur Monophile, ie ne suis de ceste opinion. Car outre que nous en auons loy escrite, qui en cest endroit nous lie & la pensée & la parole, à dire le vray, l'union de telz mariages demeureroit imparfaite. Pource qu'en ceste maniere, se trouueroit l'homme auantagé au desauantage de la femme: car estans reciproquement tous enclins aux aiguillons naturelz, qui seroit celui de nous, qui pourroit iamais vacquer au contentement d'elles toutes? Ainsi seroit ceste union defectueuse, non toutesfois despourueue d'aparence & superficie de raison. Mais quel besoin, de nous estendre aux mariages, avecques lesquels nostre

stre

stre dispute n'a rien commun, sinon d'autant que ne pouuant mieux verifier vostre belle loyauté, vous estes voulu d'iceux sus le commencement ayder, & toutesfois recognoissant vostre faulte, sus la fin de voz propos, les auez habandonnez, vous regeant contre leur parry. Car quant à ce que m'auez mis sus, de la communion des femmes: ie n'aprouue pas, seigneur Monophile, la communion (en laquelle toutesfois ie me pourrois remparer, non d'un Cinique seulement, ains d'un Stoique, de tous ces peuples iadis appelez Massagetes, & encor parauanture d'un Platon) mais en suis autant eslongné, comme vous par vostre opinion, vous en rendez aprochant. Que pretens-ie doncques soustenir? C'est que beaucoup plus est pernicleux en vne Republicque, celuy qui prend son adresse à vne Dame mariée (comme estimez) pour en faire son propre & particulier, & plus voyfin de ces folastres Ciniques, que l'autre qui sans arrest prend son vol en tous lieux, ou le vent luy donne en queue. Chose que ie me prometz vous monstrier, & par ce moyen i'espere, que vous mesmes, vous impropererez le tort, qu'à tresgrand tort me donnez. Or de soustenir simplement, qu'il seroit bon que les

LE PREMIER LIVRE

femmes fussent communes (comme estimoient ces Ciniques) on sçait que ce sont propos : ny plus ny moins que ceux , qui se rompent le cerueau à disputer , & sçauoir si la communauté des biens seroit plus profitable au genre humain, que la diuision , que pour le iourd'huy obseruons . Car quel profit est-ce de mettre en controuerse , vne chose qui ne peut tomber en vsage ? Ce neantmoins ce sont trouuez plusieurs gens , desquels es vns pleut la communion des biens,es autres celle des femmes. Mais auant que passer plus outre , ne fut plus estimée celle communauté de biens,en l'ancienne Republique des Lacedemoniens,ou les furtz & larrecins furent permis , qu'en Rome , en laquelle les larrons furent puniz ou au double,ou au quadruple? Ie ne sçay pas qu'en iugerez:mais de ma part il me semble, que tout homme de bon iugement , en ce condescendra à mon dire . Donques descendons maintenant des biens aux femmes (qui semblent auoir quelque symbolisation de l'un à l'autre) & ainsi trouuerons nous , à laquelle des deux Republiques se rend vostre opinion plus conforme. Vous aprouuez la loyauté, & mesmement voulez qu'une femme mariée s'adonne à son amy seul: n'est-ce à l'imitation

tion d'un Licurge, vouloir par un occult larcin pratiquer à soy une chose, qui neantmoins appartient par loy à autrui? Voyez quelle confusion vous mesmes (sans y penser) introduysez, ne laissant rien particulier aux hommes, sinon celuy ou vostre naturel vous pousse. Et apres avoir gaigné une Dame, persistant non à la loyauté que dites, ains à une sottie opinionistreté, voulez qu'à tousiours mais vous demeure. A mon iugement, seigneur Monophile (outre cest erreur de communion, ou estes inaduertement tombé) comprenez vous assez mal l'ordre de toute Nature. Car si toutes choses de ce monde ont leurs saisons, esquelles successiuement tombent de l'une à l'autre, n'est-ce, par mesme moyen, raison, qu'estans paruenus au but ou pretendons, cedions nostre lieu à un autre? Si les quatre saisons de l'année se trouuoient en ce different, que l'une s'estant emparée de nous, ne voulust (son terme expiré) donner sa place à une autre, comme le printemps à l'esté, l'esté à l'autonne, & l'autonne à l'hyuer, n'estimeriez vous s'aprocher toute la ruine du monde? Il fault par influence celeste, que chaque chose preigne sa vogue: & voyons mesmes, les bien grandes Monarchies estre tom-

LE PREMIER LIVRE

bées d'un peuple à autre, par vne entresuite des choses, & d'un Assirien au Mede, d'iceluy au Perse, puis au Grec, puis au Romain, & encor de rechef au Grec. De maniere qu'à tort vous penseries vous proposer vne eternité en ce monde, ny vne volonté perdurable, tant que resterez sus la terre. Car ne le permet Nature, laquelle pour nous apprendre, combien luy estoit agreable ceste grande varieté, se voulust diuersifier en cent millions de sortes, pour nostre vsage. Et non seulement es choses qui concernoient nostre vsage: mais en infinies autres mutations, dont elle s'est reserué le nombre. Et voions mesmes celle premiere sùstance, laquelle Dieu se progetta rendre en ce monde incorruptible, prendre neantmoins diuerses formes, selon le progres du temps: Et vous, seigneur Monophile, mal recognoissant la Nature, ains quasi la despitant, voudriez tousiours demourer vn.

Fry vinct
de la Loy
 D'auantage quelle profession d'honneur & louange faites vous, quand iusques là abastardez vostre esprit, qu'auant pratiqué vne Dame, ne vous osez auenturer à plus grande entreprise? Vraiment tousiours estimeray-ie en vn homme, la vigilance, qu'il peut mettre en la conqueste d'un tel butin: Mais aussi l'auoir

con-

conquesté, demeurer si peu hardy, de ne se hasarder à plus hautaine victoire, me semble le fait d'homme peu vaillant & magnanime. Pourquoi doncques sera l'homme si aneanty, qu'il vueille terminer son esprit en vne seule, veu que plus il en conquerra, & plus demourera en reputation & estime ? Si Alexandre se fust seulement proposé, se maintenir dans ses fins & limites, fust-il iamais paruenue à ceste vniuerselle Monarchie ? Mais quoy ? encores n'estoit il content, ains vouloit employer ses victoires à entreprises plus hazardeuses, si par puissance humaine, eust sçeu excogiter plusieurs mondes. Aussi vn bon cueur est trop grand, pour se contenter de bien peu. En quel mespris est doncques celui qui borne sa gloire d'une seule, sans se deliberer de l'estendre vne autre part ? Iamais ie n'improuueray en telles choses, entreprendre vn peu librement sus les terres & marches d'autrui: mais se l'aproprier à iamais, il me semble que ce seroit nous oster vne trafique & commerce entre les hommes, pour vn commun entretènement de ceste humaine société. La fable ne vous est incogneue, que cest ancien Orateur proposa au peuple Romain, pour le reunnir & lier avecques les Senateurs,

LE PREMIER LIVRE

lors qu'il leur representa l'humain corps, lequel sans doute prendroit fin, sans vn ayde mutuel & trafique, que les membres ont l'vn en l'autre. Ainsi furent en toutes Republicques introduytes les venditions, emptions, locations, & d'abondant les prestz, empruntz, & pre-caires, sus lesquelz sans plus ie preten me fonder. Et voire en telle maniere qu'en recognoissance du bien que ie reçoÿ, les maris d'un autre part, reçoÿuent mille courtoysies & gratieuses-tes de moy, desquelles autrement ne seroient participans. Car pourquoy? la raison ne veult-elle pas que tout ainsi que familièrement i'em-prunte sus eux pour vn temps, aussi pour le moins, en recognoissance d'un tel bien, ie leur en sache bon gré? Ou vous autres qui mettez toute vostre estude à vous rendre à vne seule, tout le plaisir que receuez, est la brefue mort & depesche d'un pauvre & innocent mary. Ne cognoissez vous doncques à l'œil, quelle perturbation introduisez par vostre raison, accomplissant voz larrecins d'un homicide: au contraire quel bien & vtilité ie vous aporte par la mienne motiue d'une plus grand liaison & vnion entre les hommes, que les loix mesmes par leurs menaces & commendemens. Phi-
lopoie

lopole aiant donné fin à son propos, ce ne fut sans grand' risée de toute la compagnie. D'autant que tout ce discours s'estoit trouué accompagné d'une si naïue gayeté, qu'on ne sçauoit s'il parloit seulement pour plaisir, ou bien que ainsi il l'estimast. Au moyen de quoy Charilée, n'ayant encor' acheué son rire: Vous estes grand guerroyeur & conquerant, seigneur Philopole, dist elle, & par auenture plus grand que cestuy Alexandre, duquel vous dites imitateur, i'entens es prouesses, esquelles voulez apliquer vostre esprit: Lesquelles neantmoins abastardissez en partie par le fait de marchandise, que sus la fin de voz propos vous vantez excercer parmy voz braues entreprises. Et crains qu'elles ne vous soient non plus honorables, qu'à celuy qui de noble deuient marchand.

Mais auisez, seigneur Philopole (& m'en croyez) estant si hardy trafiqueur qu'empruntiez à si hault interest que lors que serez en ce degré de mariage, il ne le vous faille payer auecq' vne vsure illicite. Car ainsi le voit on eschoir iournellement: aussi est-ce, ce que lon dit: qu'il ne fault faire chose, dont lon n'attende le semblable de quelque autre. Et pour vostre regard, seigneur Monophile, combien

LE PREMIER LIVRE

que ie n'eusse en deliberation m'entremettre en vostre querelle (vous voyant tenir mon party) ains vous la laisser poursuyure à vous deux selon vostre bon plaisir: si est-ce que ie crains que, vous acordant tout le reste, ie ne me rende des vostres, en ce que desirez nostre Amant se maintenir d'une parfaite loyauté enuers la Dame mariée. Si vous eussiez dit que le mary eust deu se porter enuers sa femme, d'une integrité telle qu'il la desire en elle, vous n'eussiez esté en celà par moy desdit. Mais qui vous acorderoit, que celle qui est ia en ce nœu de mariage, doyue porter respect & reuerence à autre homme, qu'à celuy auquel si non Nature, pour le moins les loix ciuiles l'ont liée? Et ne luy estant permis franchir telles bornes, qui sera celuy si hardy, qui ose avecq'vous maintenir, qu'elle doyue auoir aucun esgard de loyauté enuers les autres estrangers, ausquelz elle ne doit porter qu'une amitié generale? Car encores qu'il y ait aparence de contenter ceste affection, par ce que Nature nous y incline, si la fault-il moderer, puis qu'ainsi il a pleu aux loix: & né fust-ce que pour vn entretien politique. Autrement introduyrions vn grand Chaos, ne pouuans discerner souz l'ombre de ceste

ceste amytié mutuelle, auquel se deüst attribuer la femme, ou à celuy qui ayme parfaitement n'estant mary, ou au mary qui seulement s'est induyt prendre femme pour occasion d'argent. Si n'en fera il ainsi de mon consentement : car encores qu'au mary n'y ait toutes les choses, pour lesquelles on peut estre attrait à l'Amour, si le doit la femme aymer seulement, d'autant que c'est son mary. Et à mon auis ne trouueroit icy lieu, la subtilité de celuy, lequel ayant induyt vne femme à confesser, que plus luy agréeroit le beuf, la maison, le champ de son voysin, s'ilz estoient meilleurs que le sien, voulust successiue-ment conclure (la pensant auoir encheuestrée dans ses rethz) que plus elle aymeroit son voysin, s'il se trouuoit de meilleure paste que son mary. Certes il erroit grandement pour la diuersité de raisons. Car la femme, bien que celuy auquel elle est pourueue, ne soit riche, bon, ny beau comme tous les autres, ou que sans aucune amytié se soit aueques luy coniointe, si se doit elle en luy seul temperer & resfréner : Et aproprier sur ce la réponse que fit vne bonne matrone de Rome à son mary, lequel se courrouçant contre elle, pour autant que par vn si long espace de temps, auoient ensemblement

comparez


{ LE PREMIER LIVRE

vescu, sans toutesfois l'auertir d'un vice d'ha-
leine, qu'on luy auoit en compagnie reproché. En
bonne foy mon amy (respondit elle) ie pensois
que tous les autres vous ressemblassent en cest
endroit: ainsi fault il que toute femme n'ima-
gine dans foy mesme, plus grãde beauté ou bon-
té qu'en la personne de son espoux. Voire que
si d'auenture il eschet, que par auenglée concu-
piscence se rende en ceste part retieue, si doit el-
le neantmoins prendre conseil de raison, pour
corrompre, non ce à quoy sa Nature, mais sa
desordonnée volonté la pousse & incite.

Autrement, si vostre dire trouuoit lieu, le pour-
roit on adapter es autres choses iniustes, quand
par un sot mouuement elles nous retournent à
gré? Chose toutesfois qu'il ne fault iamais per-
mettre: & nous ont esté baillées les loix pour
nous seruir d'une bride à nos concupiscences
charnelles, lesquelles nous ne pourrions bien sou-
uent maistriser, sans la crainte que nous auons
d'encourir punition. Et pour ce fut aprouuée es
Republicques la cohercion des adulteres, pour
ceux qui delinqueroient contre les statutz de
mariage: seulement pour obuier à ceste fragili-
té humaine, & non pour la cause qu'imposez
aux douaires, lesquels tant s'en fault qu'ils
trou-

troublassent les mariages, qu'au contraire leur donnerent acheminement. Quoy? si ie vous monstre, seigneur Monophile, par raisons presque invincibles, qu'ils ont esté necessaires pour l'entretienement de ceste société humaine, & par vne bien bonne & meure deliberation, ne me confesserez vous, encore que pour la seule consideration du dot se fust commencé le mariage, qu'il ne fault pourtant l'enfraindre en aucune sorte ou maniere? Je ne dy pas que si estions en cest aage doré, auquel fut la premiere institution de mariage, ie ne trouuasse vostre dire tresconforme à la raison: & que tant seulement deurions nous lier avecq' noz femmes en leur faueur, sans aucun autre respect. Par ce qu'en ce premier temps n'estoient les gens oppressez d'une telle varieté d'afflictions & pauuretez comme sommes pour le iourd'huy. D'autant que sans aucun labeur & peine, viuoient au bon plaisir de la terre, qui non encores coustumiere ny lasse d'aporter fruitz, ne vouloit estre cultivée, comme depuis l'a requis. Au moyen dequoy, sans aucun discord auoient toutes choses en commun, rien n'estoit distinct ny separé l'un de l'autre. Et par tant leur estoit-il loysible en telle affluence de biens, prendre femme seu-

Pour les
donaires.



LE PREMIER LIVRE

lement à leur plaisir, & telle que bon leur sem-
bloit. Ainsi que voyez, pour le present, grandz
seigneurs, qui ont puissance de nourrir & en-
tretenir leurs femmes. Mais quant à nous, aus-
quelz Nature n'a esté si prodigue à departir
& eslargir ses biens & thesors, il me semble
qu'encores nous auroit elle bien mal pourueuz
d'entendement, si sans autre consideration que
de l'Amour, entrions en ce lien de mariage.
Ne fault-il viure avecques sa femme? Quand ie
dy viure, i'entens s'entretenir moyennement
en son estat, soy alimenter, nourrir enfans &
sa famille, se secourir aux maladies qu'il n'en
vienne inconuenient: & de toutes telles peines
le seul fais regorge au mary. Car ainsi l'a or-
donné ce grand & souuerain Iuge du Ciel par
vne grand' preuoyance. Voulez vous doncq'
ruiner vous, & toute vostre maison, par vne
vaine & sottie opinion qu'aurez emprainte en
vostre esprit, & possible au plus grand tort du
monde? Si en celle Lacedemone, par vous en
voz propos alleguée, eust esté le peuple si depra-
ué comme estoient les gens de Rome, lors que par
leurs sages Iurisconsultes les douaires trouue-
rent lieu: ie croy que cestuy Licurge, entre tous
bons Legislateurs tant estimé, n'eust vsé d'une
moindre

moindre sagesse & prudence enuers ses Lacedemoniens, que les autres Magistratz enuers tous les autres peuples. Car le Legislatteur est à l'endroit de ceux qu'il veut former & instituer, ainsi que le bõ medecin à son malade, auquel souuent permet vser de mauuaises viandes, pour luy donner goust des bonnes. Et s'il le vouloit tant restraindre à vne obseruation de ses estroitx preceptes & regimes, plus tost luy apporteroit mort que santé. Ainsi se conformans bien souuent les Legislatteurs aux volontez de leurs suietx, est necessaire leur permettre choses mauuaises, en vne deprauieté & corruption de meurs, pour les acheminer aux bonnes. Comme voyez aux douaires, lesquels pour ceste raison ont esté trouuez necessaires au mariage, qui n'est qu'une commune societé. Et si entre marchans est permis pour entretenir leur trafique, que l'un parfournisse aux frais, en contre-eschange de l'autre qui preste son industrie, que deuons nous estimer en ceste association d'homme à femme, en laquelle (comme ores ie vous disois) tout le fait de ceste humaine pratique depend du cerueau de l'homme? En bonne foy, seigneur Monophile, il seroit tres-mal seant & conuenable (encores que ie parle

LE PREMIER LIVRE

au desauantage de mon sexe) que ce double
 fais & fardeau regorgeast dessus vous autres
 (i'entens & que prestassiez voz peines , &
 aportassiez les escus) & qu'à la seule femme
 fust delaisé le contentement & plaisir , sans au-
 cune sollicitude , que celle ou volontairement el-
 le se voudroit adonner. Ne voyez vous donc-
 ques par ce peu que i'ay deduit , comme par vn
 grand auis fut besoin que les douaires eussent
 leur cours aux mariages ? Et estans ainsi ne-
 cessaires , si ne fault-il toutesfois par vne abu-
 siue Nature , que l'homme ou la femme (trans-
 gressans tout ordre de droit) pretendent vio-
 ler les loix de chasteté ordonnées es mariages.
 En cest endroit finit Charilée , quand Mono-
 phile non content , luy repliqua. Ce propos tom-
 be fort bien en vostre bouche , ma Damoyelle ,
 toutesfois n'a pas long temps , me trouuant en
 compagnie de braues gens , ou s'esmeut telle que-
 stion que celle qui à present s'offre , quelque vn
 ayant discouru toutes les mesmes raisons que
 nous venez de proposer , se rencontra vn gen-
 til-homme de bon esprit , lequel ayant longue-
 ment presté l'oreille à ce discours , ne le voulut
 laisser passer sans luy donner quelque attainte ,
 que ie suis trescontant vous reciter sus le champ ,
puis

puis que l'occasion le requiert. Je trouue (dist il, Des mariages qui se font seulement pour argent.) vostre dire fort bon : & encor le trouuerois-ie meilleur, n'estoit que l'Amour est par dessus tous voz statutz & ordonnances humaines. Et scauez que la ou Nature parle, il fault que la loy se taise, mesmes lors qu'elle y contreuient. Qu'ainsi soit, à vostre auis scauroient toutes noz loix mondaines, par toute leur grand puissance, tant que residons sus la terre, desnouer la proximité de parentage que nous auons l'un à l'autre? Par auenture trouuerez vous, que pour aucune faulte ou delict, nous frustreront quelquefois du droit, qui sembloit nous appartenir, au moyen de la parentelle : mais non de la consanguinité dont nous sommes ensemblement des nostre natiuité coniointz. Par ce que Nature seule & non les loix y ont ouuré. Ainsi en vn mariage, qui seulement souz ombre de douaires s'entrepren, ne pensez point mesfieurs, que la loy qui l'a ainsi permis & toléré, ait peu en aucune sorte desuoyer le cours de nostre Vraye Nature. Non point que ie voulusse ouurir vn tel Chaos es Republicques qu'on penseroit : l'obeissance & residence est due aux maris par vne obligation ciuile : mais par vn

LE PREMIER LIVRE

lien naturel la singuliere amytie que nous portons à nos amys. Et croy mesmement que les loix (encore qu'elles n'en ayent rien à l'ouuert déterminé) n'ont ce neantmoins esté taiblement mal contentes de telles amytiez reciproques. Car si iadis (comme encores pour le iourd'huy) elles ont tousiours excusé, en la chaude colle, executer la vengeance en celuy qui nous outrageoit, iusques à commettre meurdre (autrement bien punissable) pour l'occasion sans plus d'un naturel apetit, qui nous induit à ce faire: que devons nous estimer de l'Amour, lequel (n'estant que la mesme Nature) nous contraint, contre nos volontez bien souuent, à aimer en aucuns endroit? Et possible que la peine des adulteres (seul & vnicque remede des mariages) ne fut à l'encontre de ceux introduite, qui d'une affection violente vouent leurs cueurs à une Dame, ains pour ces petits mignons & muguetz (qui quasi d'un propos deliberé à tromper) preignent leur adresse en tous lieux, ny plus ny moins que de ceux, qui d'un guet à pans se vangent de leurs ennemis. Ainsi comme peut estre trouuerez aueré en une re-

u athenes
i femme ne publique d'Athenes, en laquelle pour un
omant. conſe temps (ſi quelques authers dient vray) eſtoit
oyr de ſon mari.
uy eſtoyt permis
vder d'un autre -

permis

permis à la femme, ne pouuant conceuoir de son mary, susciter sa generation en vn autre sien affectionné, moyennant que le fruit qui en naistroit fust estimé du mary. Or à vostre auis s'entrouuoit la Republique plus troublée pour cela? Non ie vous assure messieurs, ains en demuroit cent & cent fois plus en son entier.

Parce que satisfaisans à leurs ordonnances civiles, contentoient par mesme effet, celles que la seule Nature (sans autre chose) leur aprenoit. Non pourtant que ie ne fusse plus aise, que desracinant de nous ceste opinion de donaires, seulement entraissions en ce ioug de mariage, par une seule amitié, pour nous oster toutes telles occasions. Car quant à ce que lon pourroit maintenir, auoir esté necessaires pour vn estat politique, tant s'en fault que ie le croye, qu'au contraire ie pense estre le seul fondement de toutes les perturbations (au moins de la plus grand' partie) qui viennent aux gens mariez. Dites moy, ie vous suply, d'ou depend cest entretenement, sinon d'une amitié reciproque, que nous nous deuons l'un à l'autre? Laquelle fut exterminée par ceste inuention malheureuse. Car si peut estre il eschet que portant bien bon Amour, à vne fille de basse estoppe, par vn

Repruue
Doires -

LE PREMIER LIVRE

mouuement Naturel ie m'acompagne d'elle en
 mariage, ne dira soudainement ce peuple, en
 ce par moy auoir esté commis vn exemple de
 vraye folie? ne m'abhorreront mes amis? ne me
 fuiront tous mes parens? Comment? (diront ils)
 luy qui estoit de noble lignée, & si bien apa-
 renté, s'estre mis en lieu si bas (voyez de gra-
 ce que peut ceste impressiõ de douaires) &
 nonobstant ne cognoistront qu'en ce auray trou-
 ué mon paradis, ou en vn autre serois tombé en
 vn enfer: Car & l'vn & l'autre sont compris
 souz ce nom de mariage. Mais si par vne au-
 dité d'auarice ie m'adresse à vne Dame fort o-
 pulente en biens, verrez à l'instant ceste aueu-
 glée ignorance, me louer, estimer, congratuler
 de ce qu'elle estime tout mon bien, qui est mon
 extreme dommage. Il a beau viure (dira ce sot
 populace) sans prendre peine, son mariage est
 de quinze à vingt mille liures. Mais dira l'au-
 tre vn peu plus sage & accort: Si ne voudrois-
 ie pour tous les escus de ce monde (bien que ie
 soye pauvre & chetif) auoir espouse telle femme
 pour viure en telle peine & seruitude. O temps!
 ô meurs doncques trop depraüées, ausquelles
 il fault que l'argent vsurpe le nom de mariage,
 & la conionction des personnes soit apellée
 seruitu-

servitude. Or qui cause tel malheur? N'est-ce l'avarice, à laquelle nos ancestres ouvrirent la porte, lors qu'ils admirèrent les douaires? Et puis esmerueillez-vous & debatez, avecq' vne infinité de voz plus subtiles raisons, si vne Dame, froissant la porte de voz loix, outre son acoustumé mary, trouue bien souuent vn amy, & le mary au reciproque, ioue semblable personnage enuers sa femme. Car si (comme voulut en sa Republique de Sparte ce droiturier Licurge) vn chacun s'adressoit à celle ou reposeroit son entiere deuotion, osterions toutes les peines & trauaux, que voyons ce iourd'huy regner entre tous les humains. Qui seroit beaucoup meilleur, que non ceste commodité que vous, mon Gentil-homme, ores nous auez alleguée de l'administration de famille. Ce n'est pas le tout, ce n'est pas le tout, messieurs, de trouuer voye aux mariages, si vous ne les associez d'vne mutuelle amytié. Et ne seront oncques les citez heureuses, tant que reprenans la route de nos premiers ancestres, establissions nos mariages sus vn cueur, par le moyen duquel, & non autrement banirons non seulement tous les deffaux de telles conionctions, ains mesmes d'vne Republique : laquelle ne tendant,

LE PREMIER LIVRE

qu'à perpetuelle concorde, à peine qu'elle en puisse iouir, se trouuant entre l'homme & la femme simulation secrette au lieu de vraye amitié. Et s'il est ainsi que de ceste copulation maritale, soit prouenuë à la file, ceste vniuerselle police (par ce que du commencement n'estant le monde que diuisé en l'vnion de deux personnes, multiplia du depuis petit à petit, en villages & villes closes) certes estant le fondement de telles liaisons corrompu, aussi fault necessairement que l'edifice soit ruineux. Et à dire le vray, ie croy que de ceste corruption des mariages (qui sans plus se font pour argent, estans l'homme & la femme au demeurant mal conformes) vient la cause, pourquoy nous verrons ordinairement, tant d'inimitiez & rancunes entre les freres & sœurs: d'autant qu'estans composez d'humeurs diuerses & non acordantes, il est difficile qu'entr'eux, non seulement ilz acordent, mais aussi bien souuent en eux mesmes se treuuent & sentent combatuz de deux diuerses qualitez & contraires, qu'ils empruntent des peres & meres. Or n'est-ce toutesfois icy le vray poinct ou ie preten, pour ne m'estre commise es mains la reformation de noz meurs: mais ie veux dire, que pour y donner vn

iour ordre, & banir de nous ceste corruptelle de douaires, peut estre ne sera il hors propos à la Dame, s'estant ainsi mariée, auoir vn amy de reserve, avecq'eternelle assurance de luy garder entiere foy & loyauté. A la charge de servir aux autres d'un bon & fidelle exemple, de ne se marier aux biens, ains à celles ausquelles l'amour les destine. A tant mit fin à son parler ce brusque Gentil-homme, avecques vn assez grand aplaudissement de toute l'assistance: pour ce qu'il n'y auoit aucun, qui y pretendit interest. Or ne sçay-ie si à bon esciant, ou en ieu il referra telz propos. Toutesfois, ayant longuement debatue, par vne infinité de trauerses, ses raisons en mon esprit, ie ne voulu tellement faire mon profit du sien, que ie ne me resseruasse la liberté de le desdire. Car quant à ce que si asprement maintenoit, l'Amour passer toutes ordonnances humaines, vrayement souuoioit il fort en la question qui s'offroit: car qui seroit celuy si esblouy, qui ne cogneust à veue d'œil, le mariage n'estre ordonné par les humains, ains par establissement diuin, & inuenté par l'eternel, comme seul & vnicque moyen de la conseruation de nous autres? Ainsi d'aproprier chose si haulte à nostre humanité

LE PREMIER LIVRE

fragile, ny auroit ordre, ains demeureray bien en ceste part cy des Vostres, ma Damoyſſelle, non ſeulement en egard à ceſt entretenement que vous nous auez allegué: mais auſſi bien d'auantage pour ce que Dieu le commande, qu'il fault que la femme ne ſ'acommode à autruy qu'à celuy auquel l'eglise l'a liée. De ſorte, qu'encores que l'Amour ne fuſt entre elle & ſon mary, ſi fault il ſe forcer ſoy meſme & contraindre ſon naturel, pour viure en eternelle paix. Toutesſois auſſi ſ'il auient, que ce mariage ſoit du nombre de ceux, qui ſont ſi deſſectueux, que l'Amour ne ſ'y puiſſe mettre, à foy d'homme de bien, ma Damoyſſelle, ie ne puis que ie n'excuse, & ne trouue aſſez legitime, ce que diſoit le Gentil-homme, de ſe ranger vers vn amy. Et ou le trouuerez mauuais, en premier lieu i'ay la Nature qui prend ceſte cauſe pour moy: auſſi ne me fault il le mariage, lequel (au lieu de m'acuser) luy meſme ſ'il pouuoit parler, ſe feroit en ma faueur & à cauſe de moy, partie pour auoir eſté par ce mary deſſeigné ſouſ vne promeſſe d'argent, de ſon vray manoir & heritagé, qui eſt Amour. Ainſi à bon droit pourra dire auoir eſté contre raiſon vendu: Et ſi poſſible me contraignez moy-meſme prendre la

cauſe

cause en mon nom, sans appeller aucun garand. Ne voyez vous es Republiques bien ordonnées (puis que vous estes voulu ayder de l'ordre d'une Republique) estre permis beaucoup de choses, par ce qu'il semble que la necessité le requiert, lesquelles toutesfois autrement seroient estimees mauuaises? Je vous laisse doncques à penser le surplus, d'autant que ce passage me semble assez chatouilleux, mesmes pour les gens mariez. Or face Dieu, qu'ils ne soient en cest estrif: tous choysissans vne femme, que la Nature leur destine, & non que l'argent leur moyenne. Autrement s'ilz s'en trouuent mal, en remettent la coulpe sus eux. Lors Glaphire, qui pendent tout ce discours s'estoit tenu tout à quoy: A present, dist il, cognois-ie en nous verifié, ce qu'autrefois disoit le poete Horace, de trois personnages par luy conuiez à vn banquet, tous trois de diuers goustz, tous trois de diuers apetitz, & tous trois de difficile contentement: mais plus à mon auis le tiers. D'autant qu'au premier plaisoit le doux, au second l'aigre, & à cestuy n'agreoit ny l'un, ny l'autre, tant estoit de delicate complexion. Je pourray possible en cecy le ressembler, voulant trouuer moyen entre les deux extremittez, que

LE PREMIER LIVRE

ie voy si bien par vous debatues. Car à ce que
 i'ay peu aprendre de voz querelles (comme vn
 propos conduit l'autre) de l'Amour simple
 (ainsi l'auex vous appellé) estes descenduz au
 mariage. En l'Amour maintenez, seigneur
 Monophile, l'vniõ de seul à seule, sans aucu-
 nement enfreindre le deuoir dont sommes obli-
 gez à noz Dames: & en l'Amour, à vous, sei-
 gneur Philopole, plaist le contraire. Et cest
 Amour, seigneur Monophile, permettez des-
 border aux mariées, bien que par droit de ma-
 riage elles ne nous touchent en rien: ce qui ne
 plaist à ma Damoiselle: en assignez tout le def-
 fault aux douaires, qui nous desnuent de l'a-
 mytié, qui en telz actes seroit requise, & vou-
 lez les mariages s'executer souz le tiltre sans
 plus d'Amour. Or quant à moy, messieurs, en-
 tant que touche le premier poinct, ie ne preste-
 ray foy, ny à vous, seigneur Monophile, &
 moins encor à vous, seigneur Philopole: non
 pour aucun desir que i'aye de vous contrarier,
 mais par ce qu'estans les iugemens des hommes
 diuers, vn chacun a loy de penser tout ce qui
 luy plaist. Et pour le regard du second, qui
 concerne l'affection maritale (de laquelle pour
 sa dignité ie suis deliberé parler, premier qu'en-
 trer

trer en ceste seruitude d'Amour, que nous au-
 uez denotée) il me semble, seigneur Monophi-
 le, que combien que vous compreniez en par-
 tie le motif des troubles de mariage, si est-ce
 que trop bastissez vostre edifice sus Nature:
 Car de nous frustrer en tout des douaires, com-
 me vous seigneur Monophile voulez, il me
 semble assez estrange: d'autant qu'encor' que
 nous n'en deuions faire conte clos ny arresté,
 ains qu'il soit seulement requis nous marier pour
 la conseruation de nous mesmes en nostre espe-
 ce, si en deuons nous vser quasi comme d'un ay-
 de, & ornement pour l'auenir. La Volonté
 doncques pourquoy nous entrons en ce lien de
 conionction mutuelle, est pour donner à noz
 futurs enfans, l'estre: mais les douaires, pour
 leur trouuer (& à nous aussi) le bien estre. Or
 fault il qu'en c'est endroit nous nous arrestions,
 & demeurions d'acord avecq' ma D'amoï-
 selle, qu'auoir aucun regard de loyauté enuers
 la Dame mariée, par autre que par le mary,
 n'est loysible à aucune personne. Car combien
 que les affections (comme celles de l'Amour)
 semblent estre infuses en nous par vne influence
 celeste, qui volontiers vsurperoit la domination
 sus nous, si doit elle estre refrenée par la raison,

LE PREMIER LIVRE

qui nous fut baillée à la semblance de celuy qui domine sus tout le monde, par ce que tout ainsi que l'vniuers n'est qu'un grand corps, auquel il semble que les autres tiennent le siege des passions: d'autant que ny plus ny moins qu'elles en nous, aussi eux par leur cours & confrontemens reglent en tout la bride de ce grand animal, que nous appellons le monde. Pour laquelle proximité, les Romains d'une bonne grace donnans & aux astres & aux passions, communs noms, les apellerent indifferement, mouuemens. Et toutesfois encores que telles puissances soient estimées tenir en partie le gouuernement de ce rond, si est-ce que nous voyons le tout estre demouré en la main de celuy, qui (comme vne raison vniuerselle de ce grand corps) s'en est resserué la totale superintendence. Ainsi deuons nous dire de l'homme, lequel estant un petit monde, composé en sa qualité comme vne image de l'vniuers, ores que bien souuent semble estre enclin, à quelques propensions naturelles prouenans (comme maintiennent quelques vns) de l'astre, souz lequel il est né: si constitua neantmoins Nature, un trosne en son cerueau, auquel la raison presidant, domineroit en son petit regne sus ceste influence des cieux, qui sem-
bloit

bloit le destourner de quelque operation vertueuse. Partant, encores que vostre Amour participe tant de la Nature, comme vous dites, si fault-il terminer noz actions en la loy: laquelle bien que selon vostre iugement ne corresponde à raison, pour quelque cause q' i vous meut, si est-ce que la mesme raison vous apprend à y obeir. Pource qu' ainsi vous est commandé, par ceux qui peuuent vous commander. Ainsi estans les adulteres deffendus, non seulement de ce temps, ains de toute ancienneté & memoire, ne fault qu'il tombe en noz pensees porter Amour à celles, que la loy voulut pour autrui destiner. Ce neantmoins, par ce que noz inclinations naturelles sont si libres (comme vous, seigneur Monophile auez deduyt) resteroit seulement trouuer vne gnyde pour conduire icy la raison, & obuier à ces deffaulx qui tombent es mariages, par l'occasion de ces Amours estranges, sus lesquels auez assez longuement discoursu. En quoy vous & moy demeurerons encor pour ce coup differens: Par ce que pour y trouuer remede, voulez telles conionctions s'exploiter, par ce reciproque Amour, qu'estimez instinct de Nature, que les aucuns nomment en meillcur terme, passion: & au contrai-

LE PREMIER LIVRE

re, ie pense telles affections vehementes ne de-
 uoir tomber en mariage, ains l'amytié seule-
 ment, qui procede de la raison. Car si vous gui-
 dant par cest extreme Amour que figurez, pen-
 sez oster es femmes mariées, ces intemperan-
 ces ausquelles pretendons remedier, aussi sera
 il necessaire que nos passions ne varient, &
 qu'estans transportez d'affection à l'endroit
 d'une personne, tousiours demeurions fermes
 & stables. Ce que toutesfois nous voions or-
 dinairement defaillir. Ainsi encores par vostre
 vehemente ardeur n'osteriez vous à la longue,
 des fantasies, ny des hommes, ny des femmes, ces
 defectuositez que trouuez. Et n'empesche-
 riez que plusieurs qui ont l'esprit assez libre
 (que ie ne dye volage) ne peussent par vn trait
 de temps ficher aussi bien leur Amour en autre
 endroit, comme du commencement au vostre.
 Au moyen dequoy i'eusse trouué bien meilleur,
 si pour garentir les mariages (chose que ie veux
 discourir, deuant l'Amour duquel nous par-
 lions) & entretenir en ceste amytié & loyau-
 té, les eussiez estimé se deuoir faire & com-
 mencer, non par ceste Amour dont parlez, qui
 est trop volage: mais par bonne & meure de-
 liberation, par vn conseil pris d'une longue
 main,

Qu'un ma-
 riage se doit
 bastir sus
 bonnes
 meurs.

main: bref cognoistre premier qu'aymer, & entrer en cest indissoluble anneau de mariage. Et tout ainsi qu'un bon gendarme, lors qu'il s'equippe, pour prendre la route d'un camp ou il delibere faire monstre de ses forces & prouesses, premier qu'acheter coursiers, les court, les picque, en fait essay par tous moiens: s'il y treuve quelque tare qui luy desplaise, ne les prend: s'il les treuve bons, pour aucun grand pris qu'on les luy face, ne les veult laisser sortir hors de ses mains: Aussi en ceste breue course de vie, laquelle deliberons parfournir avecq' noz femmes, en toute consolation, en toute ioye & plaisir, me semble requis & necessaire contempler, non point d'un Amour dont possible à la vanuole sommes frappez, ains d'un bon & sain entendement peser les meurs & conditions de la Dame, à laquelle nous voulons lier, considerer sa parenté, sa premiere nourriture des son enfance: car ainsi la choisissant trouuerons moien de luy faire entretenir la chose qui plus luy doit estre recommandée: c'est son honneur, qui est l'honneur, & gloire du mary, comme celui du mary, est le seul honneur de la femme. Le gendarme examine son cheual avecq'si grande consideration, duquel du iour à lendemain

LE PREMIER LIVRE

se peut deffaire: & nous n'examinerons point
 noz femmes d'un bon & meur iugement, avec
 lesquelles deuons eternelle residence & demeu-
 re iusques à la mort. Nous lisons les mariages
 au temps passé, auoir pris dissolution pour bien
 petites occasions: Les vns auoir renōcez à leurs
 femmes, pour s'estre trouuées parmy les gens
 desuoylées: autres, pource qu'elles s'estoient as-
 sises en un spectacle au descen de leurs marys:
 autres, pour auoir esté au baing publique. Telles
 gens, sans point de faulte, auoient moyen se re-
 leuer des peines de mariage: mais nous estant
 auioird huy, tant par droit humain que diuin,
 ceste liberté tollue, que deuons nous considerer
 à ceste haulte entreprise, qui apres doit redon-
 der, ou à nostre extreme felicité, ou au cime de
 tout tourment & malheur? I'ay souuent ouy
 dire du sot peuple, que qui se propose mariage
 doit deliberer y entrer les yeux bandez: mais si
 i'auois autant d'yeux comme l'ancien Argus, ou
 comme le ciel a d'estoilles, me mariant, ne les
 estimerois suffisans pour les y bien employer.
 Tant me semble chose ardue & de haulte spe-
 culatiue ce lien. Et ne trouuay oncques, à ce
 propos, bonne celle consideration des anciens
 Romains, qui à douze ans permirent marier
 les

les filles, & les hommes à quatorze: ayans seulement egard à l'habitude du corps, & non de l'esprit: & estimans qu'en tels aages l'homme & la femme se pourroient coupler ensemblement, pour la multiplication de ce monde. Ils permirent à l'homme aliener son corps, & à la femme du semblable en l'aage de quatorze & douze ans: & toutesfois en tous autres contractz, leur interdirent alienation de leur bien, deuant l'aage de vingt cinq ans. Ils disoient les mariages, en tout & par tout, se deuoir faire par vn seul consentement d'esprit: ce neantmoins les permirent en si peu de cognoissance & distinction du bien & mal, ny de ce qui leur agreoit. Car l'enfant (mesmement en tel aage) est comme le sion qui se plye en toutes sortes & à tous vents, & treuve tous obietz bons, selon que ses premiers mouuemes le guident. Et luy semblent plusieurs choses bonnes, lesquelles par succession de temps il desdaigne, abhorre, & a en contennement. Plus me plairoit, & cent fois plus me plairoit ceste institution de Platon, qui en sa Republique n'admettoit l'homme au mariage, sinon en l'aage meur, qu'il estimoit trente cinq ans, & quant à la femme, qui plus tost se meurit que l'homme, en l'a-

LE PREMIER LIVRE

ge de dix-huict à dix-neuf ans. Et si peut estre telle reigle vous sembleroit trop estroite, choisissiez le temps en l'homme auquel le pensiez venu en plaine maturité, & alors qu'il peut ou doit auoir entiere cognoissance de ce qu'il pense luy estre profitable. Voylà la cause pourquoy nos Iurisconsultes voulurent, avecq' vn meilleur auis que celuy dont à ceste heure ie parlois, qu'aucun mariage ne se fist, sans le conseil des parens. D'autant qu'iceux enclins à nostre bien autant & plus que nous mesmes, ne nous voudroient adresser à femme, qu'ils n'estimassent nostre grand bien & honneur. Car si ainsi comme le prenez, seigneur Monophile, les mariages se font, c'est à dire par vn Amour, qui n'est qu'une passion interieure qui nous tourmente, encores que pour le commencement tel mariage ne nous retourne qu'à toute ioye & plaisir, si est-ce qu'aians attainctz à nostre desordonné desir, s'ensuiuit vne eternelle penitence (derniere vlcere des plaies de nostre esprit) laquelle rongera de sorte l'entendement, que nous trouuans frustrer de ce grand plaisir que nous nous promettons en elles, nous trouuerons entrez au labirinthe de malheur, que nous mesme à nostre grande confusion, nous serons pourchassez.

sez. Vous aurez femme, ce vous semblera, à vostre plaisir, pensant trouver tout contentement en elle : mais quoy? si elle est lubrique, si impudique, si desobeissante à vous, si iniurieuse, si mesdisante, telles facheries ne viendront elles en contrepoix de vostre fraile contentement? Si cognoissez vne fois qu'elle vueille diuiser & distribuer le plaisir, qui à vous seul est deu, ne trouuerez vous qu'à bon droit serez deceu de vostre vaine pensée, & que pour tout guerdon en porterez la repentance, qui estoit due à vne si temeraire legereté? Bien souuent vn doux baiser receu d'une Dame, mettra en vous telle poison, & vne petite œillade vous causera plus de venin, que la veue du Basilicq : de maniere que vous trouuerez mourir sus piedz, pour ne pouuoir trouver ouuerture à la mort.

Or si pour attaindre & paruenir à l'acomplissement de vostre desir, entreprenez bastir avec celle Dame vn mariage si de leger, ne pensez vous point vn iour vous en repentir à loysir? C'est vne chose naturelle, toutes choses prendre dissolution dont elles ont pris commencement. Les corps humains ont pris leur origine de la terre, en laquelle ils retournent : biens mal acquis mal desinent. Amytiez commencées avec

LE PREMIER LIVRE

*si aspres legeretez, ne sont de longue entretenue ny durée : là ou celles qui sont apuyées sus fondemens de Vertu perdurable & eternelle, iamaïs ne furent ruineuses, que par la separation du corps & de l'ame. Et telle doit estre l'Amour d'un bon & loyal mariage, pour trouuer l'un en l'autre perpetuelle beatitude. Car l'Amour, dont vous, seigneur Monophile, parlez, pour un commencement est grand, voire en toute extremité, qui cause que la diurnité n'en est longue : Celuy que ie descouure en mariage, encommencé par les moyens que ie dy, haülse de plus en plus ses ailes, & se treuve au dernier iour (auquel fault que l'un de nous paye le tribut à Nature) plus grand cent fois que la premiere nuit en laquelle nous fallut sacrifier à Amour, souz la conduyte du maistre des ceremonies Himenée. Et diray d'auantage (tant suis contraire à vostre opinion) que c'est la chose que l'homme doyue plus craindre, que de tomber en mariage es mains de celle, que par Amour il a longuement poursuyue. Car là ou lors faisoit estat de serf & esclaue, & pour tel se maintenoit enuers sa Dame, au contraire estant lié de ce nœu non separable, a toute superintendence & domination sus elle: à laquelle toute-
fois*

fois elle ne se peut que par grande difficulté ranger, considerant la préeminence qu'elle auoit gaignée sus l'homme au parauant ce mariage. Ainsi ou par le passé se portoient vne amitié reciproque, tombent l'un & l'autre en haines demesurées. Par ce que tous deux veulent iouir de leur droit: l'homme qui plus n'a cure du dernier poinct ou tant il pretendoit, & pour lequel tant se deguysoit, desire estre mary & de nom & de fait: la femme au contraire veult entretenir l'ancienne acoustumance de seruitude, à laquelle s'estoit cest homme (non encor' mary) soumis. Sans faulte quand ces deux differens de maistrise occurrent ensemblement, iamais ne se treuve concorde. D'abondant considerons si la femme au precedant le mariage a esté si sotte se soubmettre à la volonté de l'homme, en quelles embles pourra elle de là en auant mettre son mary: quand avecques le temps refroidissant ceste inconsiderée chaleur, viendra remettre en sa memoire les priuantez dont elle aura vsé enuers luy, sans aucune obligation, si non volontaire & legere: desquelle pourra soupçonner qu'enuers vn autre sera aussi prodigue & liberale comme enuers soy. Qui soit vray, nous voions iournellement auenir que

LE PREMIER LIVRE

les choses qui pour vn temps nous semblent bonnes, venans à maturité de conseil, les trouuons aussi ridicules, comme quelquefois les auions eues en estime : & en est la cause, qu'auueuglez de nos passions, ne pouuons en ce premier feu discerner le bien du mal. Rien n'est au fol impossible, transporté d'un ardent desir : & rien n'est au sage possible du premier coup, iusques à ce qu'auécq' longue meditation, il ait songé à l'entreprise qu'il brasse. Rien n'est à l'amant impossible pour paruenir à son intention, mais sa grande colere refroidie treuue en fin de conte auoir seruy d'une grand' fable & risée à tout le peuple. Et quand il a à son commandement la chose que plus il apetoit, lors commence il à chanter autre chanson, & cognoistre que pour rien s'est tourmenté l'esprit, & pour un poinct, de peu de merite parauenture pour son regard, & toutes-fois grand, pour le respect d'une femme, qui en ce fonde & constitue le deuoir de son honneur. Or ne cognoist il & reuolue telle chose, premier que par plusieurs prieres rendue la femme en sa pleine puissance : mais quand il en entre en cognoissance (comme estant en ce mariage) adoncq' repoute sa femme plus que folle, pour s'estre ainsi abandon-

bandonnée à sa mercy, au precedant aucune obligation, & que par mesme moien se pourra à autres prostituer. Qui sera vn tel tourment à tous deux, que mieux leur vaudroit ne s'estre iamais mariez. Parquoy il me semble beaucoup meilleur (& possible en ce ne seray-ie de vous desdit) establir son mariage sus vne bonne information de meurs & conditions de vostre femme, qui vous donne contentement à tousiours-mais, que sus vn bref et passable plaisir, qui puis apres vous retourne en vn plus grand martire & desplaisance, que le commencement n'en auoit esté ioyeux. Et étant ce mariage ainsi fondé, ie m'assure que l'homme en recevra tant d'ayse, que ce seul plaisir estrangera de luy tous autres. Car pour le regard de la femme, bien seray-ie semblablement d'avis, que les parens d'elle ne choisissent vn homme seulement d'or. Et remet icy en memoire vne galante responce de ce braue Themistocle, quand il dist que beaucoup plus aymoient marier sa fille à vn homme souffreteux & necessiteux d'argent, qu'à de l'argent, qui eust affaire d'un homme. Car à bien dire, sans comparaison aucune, plus louable est le pauvre petitement acquestant, que le riche & opulent, extreme-

LE PREMIER LIVRE

ment despensier. Je ne veux doncques que le pere soit si mal conseillé, de mettre en lieu sa fille, sinon ou la vertu le guydra, ny qu'à la discretion d'elle se reigle & conforme aucunement. La friande encore trop imbecile, non sçachant discerner son bien: pour auoir vne fois deuisé avecq' quelque flagorneur, pour chose de ce monde ne le voudra habandonner: mais hélas! ne nous sert en cecy d'un oculaire exemple la Medée qui laissa pere & mere, & le meilleur de ses estatx, pour suyre un desloyal Iason? n'en auons nous bon tesmoignage par l'Oenone habandonnée de Paris? L'homme trompeur bien souuent, par vnes saintes sollicitatiōs, se publiera seruiteur affectionné d'une Dame, que pour elle il seiche sus piez, & que si le mariage d'entre eux deux ne s'ensuit, plus tost luy sera la mort agreable, qu'une si penible vie: la pauurette non acoustumée à telles attaintes, l'aymera de tout son cueur, & voudroit ia en soy mesme le mariage bien consommé, pour en recenir tous plaisirs (ce luy semble) mais à mon auis tous les malheurs & encombres que lon sçauroit excogiter. Se trouua il oncque homme, qui pour vne entrée, bien que son cueur fust adonné aux escus, & non à sa fiancée, toutes-
fois

fois ne luy fist aussi beaux acueilz, comme à sa plus parfaite amyë? Et si on liſoit dans luy, on le trouueroit du tout aliené d'elle. Nature bailla aux hommes la face (ce ſemble) pour leur ſeruir de maſque, & ſçauoir deguiſer leurs penſées. Tel fait à l'vn beau viſage, lequel dedans ſoy luy machine vne traitreuſe & malheureuſe mort, & eſt bien ſage celuy qui peut euitier les aguetz de ſon mal-vueillant ennemy. A plus forte raiſon doncques comment pourra diſcerner ceſte ieune fille, celuy qui l'ayme, en ſi grande diſſimulation de tout ce monde? Mais poſons le cas que l'homme qui la pretend en mariage l'ayme ſans fiction, fault-il qu'Amour tombe en l'eſprit d'vne ſi tendre creature? Nature crea la femme les yeux bas, & à l'homme donna les yeux eſleuez, voulant par ce nous faire entendre que la femme ne ſoit audacieuſe haulſer les yeux, ains touſiours les auoir enclins en terre, à ce qu'elle ne peuſt iuger de la contenance des hommes. Et ſi deſia elle eſt capable, de ſçauoir que c'eſt Amour, par meſme moyen peuuent entrer beaucoup d'autres malices en ſa teſte, deſquelles n'eſt beſoin qu'elle ſoit participante. Car ie ſouhaite vne fille ſimple, & telle qu'entrant en ce mariage, ne

LE PREMIER LIVRE

cognoisse le bien ou mal, pour puis apres se fa-
çonner da tout aux complexions de son mary,
Et n'en apprendre, sinon que ce qu'il luy plaira.
Que si telle elle est, Et que ses peres Et meres
luy choysissent tel mary qui luy verront estre
propice: ô qu'heureux Et heureux sera ce ma-
riage! ô que plaisant Et agreable à Dieu Et
au monde! ô que pourra dire ceste couple d'a-
mans estre entrez en vne felicité temporelle,
qui les cōduira en vne perpetuelle! Enseignera
ce mary sa femme, Et elle aux Volontez de luy
en tout Et par tout se conformera: Et ainsi pre-
nant l'habitude de ses meurs, obuiera ceste fem-
me, aux inconueniens Et scandales que tant
nous redoutons es mariages, se gardans ces
deux moytiez ainsi liées, reciproquement loy-
auté, auecq' vn Amour non fainct, plus tost que
par vne desmesurée Volonté, telle que nous a-
uez deduite. Car si pour aucun autre respect,
l'homme entre dans ce mariage, qu'il n'ait har-
diment regret, si par vne espace de temps, sa
femme se forge vn amy: Lequel toutesfois ie ne
veux estre si restraint Et reserré enuers sa Da-
me Et maistresse, comme vous, seigneur Mo-
nophile, desirez. Qui sera pour retourner sus
les erres de la loyauté par vous mise cy dessus.

Mais

Mais premier qu'entrer en ce champ, pour ne
 vouloir mesler chose si profane que l'Amour,
 avecq' ce sacro-saint mariage, ie vous supply, ma
 Damoiselle, nous descouvrir ce qu'en pensez. A
 ce, Monophile quasi comme non content: car sus
 toutes les choses de ce monde auoit l'Amour en
 recommandation: Vous nous auex, dist il, sei-
 gneur Glaphire, pourchassé propos vn peu es-
 loignez des nostres, ne scay à quelle ocasion.

Que le ma-
 riage se doit
 fonder sus
 vn amour.

D'autant que mon intention n'estoit, lors que
 ie conseillois à l'homme, qui se vouloit marier,
 s'adresser à sa vraie partie, mettre en ieu vn tel
 poinct, sinon à la trauerse, voire sans y penser:
 non souz espoir d'y faire si longue demeure,
 toutesfois puis qu'il vous plaist nous y arrester,
 aussi ne l'ay-ie à contrecueur. Et me semble que
 si bien eussiez entendu mes raisons, les eussiez
 eues en plus grand estime, que celles qu'ores nous
 ont par vous esté discourues: se trouuant au-
 tant de distinction entre les deux comme du vif
 avecq' le mort, pour estre vostre mariage assis
 sus vne consideration volontaire, ou plus tost
 artificielle, & le mien sus vne inclination na-
 turelle, laquelle ne pouuons enfreindre. Et tout
 ainsi que les lyens naturelz sont moins denoua-
 bles, que ceux que nous voions lyez par vn

LE PREMIER LIVRE

certain artifice, aussi fais-ie bien mon conte, mon mariage estre trop plus asseurement fondé, que le vostre. Et pour ne vous demourer moleste par vn trop long entretien, dites moy, seigneur Galphire, ne voyez vous iournellement eschoir tant de diuorces & simulsez entre la femme honeste, entre la femme chaste & pudique, & son mary? I'ay veu & cognois Dame, sage & prudente, si iamais en fut vne, toutesfois son mary si discordant avecq'ses complexions, que pour toutes caresses & accueilz qu'il receust d'elle, si ne se peut il oncq' induire à luy porter affection maritalle. Et qui luy en eust demandé la cause, n'eust allegué impudicité ou lubricité aucune, laquelle il ne cognoissoit en elle, ains seulement que iamais de bon cueur ne l'auoit aymée. Vous me iugerez cest homme digne de grand reprehension, par ce que la Vertu attrait à soy, mesmement les gens incogneuz. Mais toutesfois auisez que aiant ma femme, telle que l'auex pourtraite, i'aymeray la chasteté & vertu dont elle sera pourueue, & non sa propre personne, tant seulement par ce que mon esprit ny peut entendre: i'estimeray & honoreray en ma femme, celle prudence dont Dieu l'aura acomplie, mais non elle,

elle, qui de soy me desplaira. Je suis maintes fois tombé en compagnie d'hommes & femmes sus la dispute de mariage, & entre autres communs propos, bien souuent oyois esmerueiller, & vns, & autres, de ce qu'ils voyoient beaucoup d'hommes & femmes mariez, s'entretenir ensemblement par vn si doux & agreable accord. Car (disoient ils) si telle femme ou homme fust tombé entre mes mains, eussions esté incompatibles, ainsi que l'eau & le feu. Qui rendoit doncques ces deux si concors, qui diuisez, mal eussent esté assemblez avecq' les autres? C'estoit vn amour, vne conformité, c'estoit vn naturel fraternisant entr'eux deux, qui n'eust peu conuenir avecq' les autres. Car si requerez d'une telle perspective, vne perfection de meurs, en vostre femme de laquelle vous serez possible denué & depourueu, ne pensez iamais vous entretenir avecq' elle non plus que le Lion avecques l'Aigneau, qui de sa Nature est benin, & l'autre superbe & outrageux. La femme par mille moyens vous taschera gaigner, & par vne infinité d'obeissances, elle qui sera sage, scaura fort bien supporter voz imperfections, vous pensera à soy attraire, & rien ne profitera son penser. Ainsi

manquera ce mariage (sinon du costé de la femme) de la partie du mary, par ce que vostre cueur ne sera à elle adonné. Iamais ce naturel ne nous change, & comme disoient les anciens Philosophes, qui cuide changer sa Nature, pene autant que les Geans du temps passé, qui vouloient guerroyer les Dieux. Bien pourrons nous dissimuler pour vn temps ce que couurons en la pensée, & par vne fainte hipocrisie nous porter tous autres que ne sommes: mais à la longue, encore fault-il que ceste Nature ait son lieu, & se demonstre à veue d'œil. Là ou quand cest Amour y est vne fois empraint, tant s'en fault que l'homme & la femme mal conuiennent entr'eux, qu'encores que l'un & l'autre n'ait richesse, l'un & l'autre n'ait ces meurs que tant souhaitez, si sera la femme au mary chaste, pudique, riche, & telle qu'il n'y restera reproche. Quoy? ne vault-il pas mieux viure en telle sorte & plaisir, encores que l'un soit trompé & deceu de son opinion, qu'estant ainsi que vous dites, demourer en perpetuelle peine & tourment? Cest Amour nous esblouit tellement les espritz, que rien à l'endroit de celles qu'aymons ne nous est mauuais, prenons toutes choses en bien: & ceste sagesse que souhaitez, est de

de si delicat estomach, que rien ne luy tourne à gré, & fust la femme la plus grand' Iudich ou Penelope de ce monde. Adoncq' la Damoiselle les voyant ainsi acharnez: Il me semble (dist elle) qu'à tort nous tourmentons les espritz, en chose ambigue, bien que la matiere le merite. Mais pour demourer contens l'un de l'autre, ie trouue bon que chacun demeure en son opinion, puis qu'elle est si vray-semblable, & participante du vray. Nous voyons beaucoup de choses pratiquées, & bien propices en un lieu, lesquelles toutesfois en autre endroit seroient tresdisconuenables, pour la varieté des mœurs & façons des habitans. Ainsi estans tous deux de diuers auis, chacun demeure en son opinion, sans en vouloir desheriter son compaignon. Ie croy que s'il falloit que vous, seigneur Monophile, habandonnassiez vostre prise (ie veux dire vostre Dame) pour cspouser la plus riche femme du monde, ce vous seroit chose trop penible: & autant qu'au seigneur Glaphire, s'il luy conuenoit seulement en choisir vne pour son bien, ou seulement pour un Amour. Parquoy prenez contentement en vous mesmes, de ce qu'en pensez. Et vous, seigneur Glaphire, persisterez en vostre promesse, touchant la ma-

Resolution
des propos
cy dessus
passez.

LE PREMIER LIVRE

tiere d'Amour, de laquelle nous auez fait vne ouuerture, mais ie ne sçay comme presque, las & fasché de vostre longue peregrination, auez voulu faire vne pose: laquelle ie vous pry interrompre, pour l'enuie que i'ay de vous escouter. Il semble ma Damoiselle, respondit Glaphire que me vouliez prendre à pie leué. Et si ie ne vous cognoissois, ie penserois que fussiez comme ces delicatx creanciers, qui en deffault d'estre payez à iournommé, soudain enuoient sergent en queue à leurs debtors. Ie vous satisferay donques si ie puis: mais à la charge que receurez ma monnoye en payement, pour telle qu'elle sera: car autre ne vous bailleray, que celle que i'ay dans mes coffres. Et puis que me semonnez si auant, si bien ie suis memoratif en ce propos encommencé, le seigneur Monophile maintient l'Amour d'un seul à vne seule, & au contraire le seigneur Philopole veult aymer en plusieurs lieux. Ie feray doncq' en cecy ce que de vous, ma Damoiselle, i'ay tout sus le champ appris, & seray s'il vous plaist, maintenu & gardé en mes droitx, aussi bien comme eux deux. Car de faire si bon marché de son corps, & l'habandonner à la premiere (comme desire le seigneur Philopole) me semble n'estre chose bonne:

Glaphire,
sur la loy-
auté qui se
doit prati-
quer en l'A-
mour.

ne: aussi tenir la bride si estroite, & se proposer vne telle Idée de fermeté, que vous, seigneur Monophile, voulez, ie n'y puis bonnement descendre. Mais sçauous quoy? Plus me plairoit vne moyenne voye, à l'imitation des Iuriconsultes, es choses plus contentieuses. Je ne vous nieray pas, que le principal point d'Amour, & auquel vn chacun doyue plus tost entendre, ne soit loyauté enuers sa Dame: toutesfois, cognoissant ceste grande fragilité qui est en nous, pour estre tous hommes, & participer encore plus de l'humain que du diuin (estans noz espritz voylez & empeschez de ceste masse charnelle) ie veux dire que si par auenture, & ainsi que voyons ordinairement eschoir, il auient qu'il faille m'absenter d'une longue absence de ma Dame, & par cas fortuit ie tombe en quelque autre femme, à laquelle ie face plaisir de mon corps, ny aura aucune faulte, & si faulte s'y trouuoit, seroit neantmoins excusable. Parce que persistant tousiours d'une mesme volonté enuers elle, & accomplissant seulement sus l'heure mon vouloir, pour satisfaire à vn certain apetit, auquel naturellement sommes enclins, pour quelque chose suruenue, ne transporteray mon cueur à vne autre avecques telle

LE PREMIER LIVRE

desordonnée Volonté, ains retenant tousiours
 ma Dame & Déesse pour telle que ie la doy,
 seule la reuereray, tant absente comme presen-
 te : & tout ainsi qu'un soleil retient tousiours
 sa clarté & netteté, bien qu'il entre en un es-
 goust, ainsi diray-ie de celuy qui par fois visi-
 tera vne autre, ne luy estant affectée. Bref, pour
 ne vous tenir longuement suspens, l'amitié gi-
 sant au cueur (& non à ses petites intemperan-
 ces naturelles) ne me semble estre violée, par
 vne nécessité, forcée d'un instinct, cause de Na-
 ture. D'auantage considereꝫ quel tort elle
 peut receuoir, pour un peché commis à la desfro-
 bée, qui au iugement des bons compagnons est à
 demy pardonné. Non toutesfois quelque chose
 que ie propose, qu'il faille souꝫ l'vmbre d'une
 telle nécessité, lascher la resne à son plaisir à
 toutes heurtes. Car lors à bon droit se rendroit-
 il reprehensible & accusable, comme peu, ou du
 tout nonchallant de sa maistresse. Et sont beau-
 coup de choses pardonnables pour vne fois, qui
 venans à vsance, meritent reprehension grief-
 ue. A ce propos Monophile: Nous lairrons
 doncques les mariages, dist il, à ceux qui y pre-
 tendent interest, & retournerons à l'Amour,
 sur lequel nous estions entreꝫ : auquel encores
 n'estes

n'estes-vous si prodigue de vous mesmes, seigneur Glaphire, comme estoit le seigneur Philopole, & possible vostre opinion pourroit trouuer lieu entre le commun peuple, comme aussi representant vn ie ne sçay quoy de populaire, voylé d'une honneste couuerture. Mais n'estans icy pour disputer selon le vulgaire, ains exactement des choses, ie vous diray ce qui m'en semble, si par vous m'est permis passer outre. Or sus doncques, dist Charilée, ie vous garantiray en ceste cause, voire plegeray, si besoin est. Voire mais, ma Damoiselle, repliqua Glaphire, on tient que les femmes ne sont receuables es iugemens pour telles causes. Ce sont, dist elle, les sortes loix des hommes, qui pour s'autoriser d'auantage l'ont ainsi voulu: mais quant à nous, qui demandons à nous reigler selon la ligne de verité, ie croy qu'elles n'auront lieu entre nous pour le present. Remettons telle dispute à autre temps, dist Monophile: ie dy doncques & maintien que celuy qui fait profession de vraye amytie, doit tellement lier & refrener ses concupiscences charnelles enuers toutes autres femmes, que tant s'en fault qu'il acomplisse aucun desir, que dites estre naturel, que la volonté de ce faire ne luy tombera en

Opinion de
Monophile
touchant la
loyauté.

LE PREMIER LIVRE

l'esprit. Et ne me scauroit-on faire acroire, que qui passe telles bornes, ayt dedié son cueur entier enuers vne. Car en ceste cause ne me plairoit vn Scipion, qui au sac d'une ville ne voulut voir quelques souuerainement belles filles qu'on luy publoit, craignant exercer contre raison, aucune desordonnée volonté enuers elles. Cestuy par ce seul effect demonstroist, son cueur n'estre en possession d'autrui. Et plus m'agrerait Alexandre, qui apres la deffaite de Darius, voyant sa femme, filles, & Damoiselles estre toutes sous sa main, ne leur voulut non pas toucher, ains iouer aucun tour qui pensast leur pouuoir tourner à deshonneur. Non toutesfois que ie voulusse asseurer, que son esprit tendist ailleurs : mais encores seruira cest exemple pour vous monstrier, que posé qu'il fust exempt de toute passion amoureuse, que deura donques faire celuy, duquel toutes les pensées doiuent estre vouées à vne? Mais bien au contraire, dist Philopole, car gens qui aiment estans plus aiguillonnez de telle enuie, que les autres, ne pouuans bien souuēt paruenir au but de leurs attentes enuers leurs Dames mieux aymées, sont contrains trouuer autres adresses, pour passer ceste chaleur, ou par le moyen d'elles sont entre-
tre

trez. A ce propos, respondit Monophile, ie vous allegueray non vn Pyramus patron de loyauté, mais vn mien compaignon que possible cognoissez, lequel estant extremement trauaillé pour vne Dame, apres luy auoir fait longuement la court, & receu d'elle plusieurs gracieusetez & caresses: auint que se trouuant vn iour avecq' elle, forcé d'une extreme passion, luy requit le poinct auquel on dit qu'un chacun pretend en Amours. Ce que toutesfois pour lors ne luy estant acordé, par vn gracieux refus acompagné d'une certaine esperance pour le futur, ie vous laisse penser en quelle colere estoit entré ce pauvre poursuyuant: qui fut telle, qu'au sortir de là, sa resolution fut d'aller pourchasser quelque nouuelle proye, pour assouuir sa volonte: Laquelle ce non-obstant, estant sus les lieux, se trouua si refroydie, que tout confuz s'en retourna ainsi qu'il estoit venu. A vostre auis celuy là ne monstroit-il quelle puissance à l'Amour? & telle qu'encores que le vouldussions, si ne nous permet-il passer les bornes de raison. Que dis-ie le vouldussions? veu que n'en sçaurions auoir la volonte, & me semble que cestuy dont ie vous parle, bien qu'il meritaist quelque louange, si ne le mettray-ie au dernier degre des vrais amans: pour luy estre seule-

ment tombé en fantasie chose si sotte, que celle qu'il vouloit entreprendre. Quoy? si vn & deux (comme lisons dans quelques auteurs dignes de foy) ont par l'espace de six mois couché avec celles ou reposoit toute leur affection, sans toutesfois les toucher, pour n'estre desobeissans à leurs Dames, qui ainsi l'auoient commandé, ne se pourra vn vray Amant, pour la seule souuenance du plaisir qu'il reçoit songeant en sa Dame, en qui vid toute sa vie, abstenir de se conioindre avecques vne autre, encore que l'occasion s'y offrist? Ie ne m'estendray longuement en propos, encore que ie vous peusse alleguer aucuns que possible cognoissent: desquelz Dieu seul tesmoignera, si se trouuans avecques femmes bien affectionnées enuers eux, & ou pour l'occasion du lieu & du temps, pouuoient acquerir marque sus elles, oncques voulurent cueillir du fruit du iardin qui leur estoit ouuert: seulement pour la souuenance de leurs maistresses, qui leur causoit plus de plaisir que tout le reste du monde. Acheuant Monophile ceste parole, les larmes luy sortirent de yeux (combien qu'il les dissimula, au moins mal qui luy fut possible) qui asseura la compagnie qu'il parloit sans plus de luy. Toutesfois Philopole ennemy de telles Amours, feignant ne l'auoir entendu, luy dist.

Seigneur

Seigneur Monophile, ie croy que tous voz propos sont contes, non point de nostre temps, ains de ce premier aage, que l'on appelloit doré, auquel les hommes (si nous croyons à Hesiode) demouroient en enfance l'espace de cent ans. Car telles gens que nous descriuez pourroient demeurer deux cens ans en vie, que viuans en telle maniere, demeureroient en reputation, & de bestes, & d'enfans, lesquels pour n'auoir cognoissance d'aucune chose, & pour l'impuissance de leur aage, il faudroit apasteler. Car à telz les fault-il comparer, ou bien à vn Tantale, qui au milieu des eaux, se laissoit mourir de soif, en la plus grande alteration du monde. Or se rendront telles fables à quelques-vns (peut estre) croyables, mais non à moy. Aussi ne me suis-ie proposé, repliqua Monophile, le vous persuader, toutesfois si vous estiez non par moy, ains par vous mesmes bien & duement instruit & informé de l'obeissance & seruitude qu'en Amour nous portons à noz maistresses, pour crainte de les offenser, possible sans aucune doute, vous induiriez-vous à mesme opinion que la mienne. Mais tel deffault fera que chose que lon en pourroit mettre en auant, ne vous sembleroit (non plus qu'à beaucoup de gens, qui iamais n'en firent espreuue) que mon-

LE PREMIER LIVRE

struense & non faisable. Mais pour ne seiourner plus longuement à ce propos, & retourner à vous, seigneur Glaphire (auquel ie pense en partie auoir satisfait, touchant ceste necessité que disiez estre en nous naturelle) dites moy ie vous pry, quel scandale, quel esclandre scrtira, permettant que suyuant vostre opinion, souz pretexte d'un (ie ne diray quel) desordonné appetit, souz ombre d'une longue absence que nous publiez, vueillez deffrauder vostre Dame de ce qu'à elle seule appartient? Ne voudriez vous l'vnion de noz cueurs fonder que sus vne seule presence, comme si entre absentz l'Amour se diminuait? Ie ne le permettray, ie ne l'endureray iamais, ains à l'opposite il me semble, que l'absence tellement nous tourmente les esprit, qu'estans par ce moyen frustrez de ces solatieux propos, de ce gracieux œil de noz Dames, plus les aimerons, plus les souhaiterons, plus les desirerons: tant s'en fault que pour celà nostre affection vienne en diminution ou decadence. Et qu'ainsi soit, telle raison est tirée du fond de la Philosophie, que plus apeton choses moins à nostre commande, que celles que du tout auons à l'habandon. Et possible est-ce la cause, pourquoy beaucoup de gens estiment les Italiens estre plus fermes & persistans en leur

leur Amour (à mon iugement neantmoins as-
sez fort en cest endroit) d'autant qu'ayans
seulement iouissance de la veue, & non com-
munication des propos, tousiours s'accroist en
eux le feu & desir, leur estant interdit passer
plus outre. Ainsi est il de l'absence. Non pour-
tant veuX-ie inferer la presence moyenner de-
croissement ou diminution aucune. Mais vous
receuez tel contentement en la presence, que
tout martire, toute douleur passée vous est nul-
le, au respect du plaisir que prenez avecq' vo-
stre Dame, & elle du semblable avecq' vous,
pour participer l'un de l'autre de voz bons &
amyables propos : & au sortir d'elle, sentez
vostre cueur si opressé, pour estre priué de la
participation d'iceux, que vostre feu s'augmen-
te de plus en plus, & le desir de retourner vers
elle. Ce que ie croy nous à voulu figurer l'au-
teur d'Amadis de Gaule en son huitiesme:
lors que Niquée se representant deuant les yeux
dans le mirouer d'acier son Amadis de Gre-
ce, sentoit telle ioye en son cueur, que tous au-
tres plaisirs ne luy estoient rien pour le regard
de cestuy cy: mais des qu'elle en fut destituée se
trouua si perplexe & denuée de tout plaisir,
que toutes les ioyes precedantes s'anullerent en
vn instant par ceste seule priuation. Le sembla-

De la pre-
sence & de
l'absence en
Amour.

LE PREMIER LIVRE

ble fut-il en *Anastarax*, pour ne plus iouir de la presence de sa *Niquée*. Ie demande aussi, la *Penelope* sollicitée par tant de gens, altera-elle en rien le deuoir de l'amitié enuers son mary, pour la longue absence de vingt ans? Et toutes-fois ne sçauroit-on dire, qu'elle fust induite à ce faire, sous crainte de son mary, par ce qu'en tel interualle, & de lieux, & de temps, elle eust peu celer sa faulte. Qui doncques luy cau-
soit telle chose? Vne extremité d'amitié qu'elle auoit en son mary, qui l'empeschoit de four-
uoyer ou à dextre, ou à senestre. Et tout ainsi que disoit ce bon *Senecque*, encores que ie sceusse mon peché deuoir estre occult, non point au monde seulement, ains à Dieu mesme, si ne voudrois-ie pecher, pour la seule haine de peché. Aussi ce vray amant (quelque chose qu'il vous en plaise dire) ores qu'il sache son forfait ne de-
uoit tomber en cōgnoissance de sa Dame (chose toutesfois de trop difficile assurance) si ne tombera-il en tel inconuenient que vous dites, pour la parfaite amitié qu'il portera à sa Dame. La presence nous cause doncq' vn plaisir, vn contentement en toute perfection: mais l'absence vn insatiable desir enuers nos Dames, suffisant moyen pour nous reuoquer de toutes autres tentations. Voire que ce seul desir, ce
seul

*seul souuenir d'elles (pour estre extreme) nous
 osterà toute souuenance d'autre chose . Et tel
 tourment prouenant d'une telle absence , sur-
 passera sans comparaison tous plaisirs que lon
 pourroit ymaginer en toutes autres femmes du
 monde . Si qu'à dire ce qu'il m'en semble , tel A-
 mour est en soy si passionné , qu'il nous fait ou-
 blier toutes autres passions , qui nous pourroient
 choir es entendemens , nous rendans à demy di-
 uins . De sorte qu'encores que bien souuent par
 nostre grande fragilité ne nous pouuions distrai-
 re de ces intemperances dont parlez (bien que
 Dieu le commande) estans de cest Amour mu-
 nis , ores que tous les plaisirs du monde se re-
 presentassent deuant nos yeux si ne choperons
 nous d'un seul pas . Et pour le regard de ce que
 sus la fin de vostre pour-parler auez mis en a-
 uant , l'Amour ne gesir qu'au cueur , & non à
 ses inclinations naturelles , dont necessairement
 sommes frappez : Vrayement vous n'estes du
 tout hors propos , & pouuiez ce me semble sus
 ces erres alleguer cest Apophthegme qu'on at-
 tribue à Aelius Verus empereur Romain , le-
 quel pour couurir ses actes lubriques & volu-
 ptuaires , disoit n'estre permis par honnesteté
 maritale , habandonner ses passions à l'endroit
 d'une sienne espouse : par tant luy estre loysible*

LE PREMIER LIVRE

prendre son deduit avecques autres femmes publiques, pour n'inquiner ce mariage. Aussi pouvez vous apliquer, que pour ne contaminer ce precieux manteau de vraye Amour, vous estoit licite en faire autant, à l'endroit de celles, esquelles n'auiez arresté vostre cueur. Et toutesfois encore vous restraignez-vous, & ne desirez l'habandon en telles choses, ains quand par violence naturelle estes forcé de ce faire. Or me dites, seigneur Glaphire, si auiez espousé vne femme, non pour Amour que luy voulussiez, ains seulement pour la grandeur de ses biens (comme disions nagueres les mariages prendre leur commencement) à vostre auis, si telle femme presentialement vous portoit affection & obeissance, neantmoins taisiblement s'adonnaist à quelque autre, telle chose vous sembleroit-elle suportable? Ce ne seroit pas tout vn (respondit il) d'autant que toute femme se doit borner & conformer seulement au plaisir de son mary, & non au reste du peuple. Mais encor, demanda Monophile, ne vous sembleroit vn tel acte insupportable? Plus encor, que ne dites, respond Glaphire. Et toutesfois vous n'auriez espousé vostre femme (repliqua Monophile) que sous pretexte de lucratiue, sans aucun deuoir d'amitié. Que diriez-vous donc-ques

ques si celle laquelle il semble que les cieux vous aient ordonnée, faisoit prest de son corps à vn autre, ne vous seroit-ce la plus grand' fescherie, moleste, & desplaisance qui vous pourroit auenir? De ma part encor que ie ne sois soucieux de m'informer de telles choses, si fay-ie bien mon conte, que ce seroit la plus grand' playe dont ie pourrois estre nauré. Ne pensez doncques point, seigneur Glaphire, que le reciproque ne se trouue à vostre Dame, & que ne luy soit vn grād creuecueur, toutes et quantes fois qu'apliquez vostre entendement en tel œuure en autre endroit. Et posé qu'elle en deust estre ignorante, si ne fault-il que pretendiez iouer tour à vostre maistresse, que ne voudriez qu'elle exerçast enuers vous. A quoy le seigneur Philopole: Cestuy est encores vn poinct qui donneroit lieu à question. Et par auenture vous en liureray-ie tantost la guerre, seigneur Monophile: Par ce que ie trouue assez estrange, que vouliez faire marcher d'un mesme pas l'homme & la femme. Toutesfois ie remettray ce que i'en pense à autre heure, pour me descharger à present contre le seigneur Glaphire, qui pour trouuer lieu à son dire, nous veult donner à entendre Amour ne faire residence qu'au cueur, & non en ces intemperances naturelles, qu'il dit nous

L'opiniō de
Philopole
touchāt l'A
mour.

LE PREMIER LIVRE

tomber es esprits. Veritablement, seigneur Glaphire, il me semble que nous voulez tout à rebours instruire de la force & vertu d'Amour. Car qui fut oncq' cestuy amant qui n'aymast pour ceste fin, laquelle tant eslongnez & bannissez du parc d'Amour? Qu'elle est (à vostre auis) la cause, qui nous induit aymer Dames, si nō ce dernier contentement que pretendons trouuer en elles? Car si vostre opinion à lieu, pour vous bien dire, ie ne sçay qui nous inuite à aymer d'un si fort & extreme Amour, plus tost les femmes que les hommes. Et ay leu & relu beaucoup de liures concernans ce mesme fait, mais oncques n'en tomba vn en mes mains, auquel l'amant à la parfin n'ayt requis à sa Dame le poinct que nous apellons fruit de vie, lequel seul à mon auis est le motif & seule fin de ceste extreme amytie. Que dy-ie le seul motif? Veu que c'est le mesme Amour, n'estant Amour autre chose, que desir de iouyssance. Voire que tousiours m'à semblé peu entendu en ceste matiere celuy qui voulāt blasonner sa Dame fit en faueur d'elle ce sonnet.

Elle eut les yeux du Soleil gracieux,
De ses cheueux Phœbus la couronna,
D'une main blanche Aurore l'estrena,
Dont

Dont le blanc lis deuieudroit enuieux.
 Elle raut mon ame par ses yeux,
 Des ses cheueux mon cueur enuironna,
 Et vn tel coup de sa main me donna,
 Que prest ie suis d'en laisser ces bas lieux.
 Le ciel haultain luy ottroya ce bien
 De me voler ce qui lors estoit mien,
 Le ciel haultain ne me le sçauroit rendre:
 Des yeux, des mains, des cheueux mon mal
 naist,
 Es yeux, es mains, es cheueux mō bien est,
 Et d'autre part guarison ne puis prendre.

*Grand est certainement & gracieux l'effet de
 l'œil, main, & cheueux, mais non de tel efficace
 qu'en eux puissions trouuer l'assouuissement des
 tourmens que nous souffrons. Quoy doncques?
 Vous l'aprendrez par celuy, qui deplorant ses
 Amours apetoit vn poinct d'auantage, à l'exem
 ple du Dieu Mars, quand il paruint à la plaine
 iouyssance de sa Venus.*

Trop desastré s'estima le Dieu Mars,
 Lors que prenant deduit avecq' sa Dame,
 Fut descouuert de Sol, & par les ars
 Du Dieu boyteux, tōba en si grād blame:
 Moy trop heureux, qui viuât dans la flame,
 De Cupido suis consommé & ars,

LE PREMIER LIVRE

Sentât braſer dedâs mon corps vne ame,
 Par vn doux ris, par vns frians regardz.
 Eſtraint ie ſuis d'un nœu, & ſay mon conte
 Que par Pheb⁹ mes amours ſôt cogneuz,
 Dont ie me dy cent & cent fois heureux.
 Mais d'autre part, ô moy trop douloureux,
 Pour ne pouuoir encourir meſme honte,
 Que receut Mars auccques ſa Venus.

*Ceſtuy ſeigneur Glaphire, ne tendoit-il au blanc
 ou nous tous deuons en Amour viſer? Car à di-
 re le Vray, encores qu'un es œillades prouenans
 de bonne grace, nous ſoient vn extreme conten-
 tement, ſi ne ſont elles rien au regard de la
 iouiſſance, à laquelle il fault que toutes noz
 penſées ſe dreſſent: & tellement ſ'y dreſſent,
 que i'eſtime celuy bien deſnué d'entendement,
 qui pour autre conſideration pretend porter
 Amour aux Dames. Il vous ſict tresbien, ſei-
 gneur Philopole, diſt Monophile, & vous part
 de bien bonne grace aux propos que nous auons
 encommencez entrelaſſer la poeſie, qui ſem-
 ble du tout affectée, & des apanages d'A-
 mour. Et vous remercie d'autre part, en ce que
 pour fauoriſer en partie mon opinion, m'auex
 voulu preſter voſtre aide: ſans lequel toutesfois
 ie croy que le ſeigneur Glaphire, ayant ouy mes
 raiſons,*

*Diſpute de
 la puiſſan-
 ce d'Amour,
 & de ſa na-
 ture.*

raisons, fust cōdescendu à mon dire, eſtāt de ſoy trop deſenſable. Et penſe que ſur ce pas luy & moy demeurerons d'acord, pour le party de loyauté. Mais non pas vous avecques moy, bien que par vne grande ingratitude ie reconnoiſſe aſſez mal le bien que m'avez préſenté. Pour autant que tresmal me ſemblez comprendre toute la nature d'Amour. Car en ce ſeray bien des vostres, que l'amant doyue apeter la choſe que tant avez en recommandation: mais ie veux maintenir cōtre vous (& vous pry, ſeigneur Philopole, le prendre de la part de celuy, qui parle du vray amant) qu'aymer ſeulement pour ce reſpect, n'eſt vray Amour ny perdurable. Comme le voions par effet en beaucoup de gens, qui pour s'eſtre propoſez ſeulement ce but, aians eu l'acompliſſement de ce ou ils pretendoient, deuiennent ſoudain auſſi froidz comme eſchaufez à pourchaffer l'execution de leur ſotte Volonté. Auſſi cognoiſſent-ils aſſez mal ſa nature, la diſpoſant ſeulement ſus vn contentement ſi fraile, eſtant choſe ſi diuine & admirable: & le poinct apres lequel ils ſe rangēt, ſi paſſable, & de nulle entretenue. Biē vous diray-ie vne choſe, que Nature pour la multiplication de ce grand corps rond, par vne grande ſapience, mit en nous les ayguillons, que quel-

ques-vns voulurēt à bon droit apeller brutaux: d'autant qu'ils nous estoient communs avecq' tous autres animaux: & non seulement avecq' eux, ains quasi avecques les arbres, & choses non sensitiues, lesquelles semblent fertiliser, pour la pullulation de leurs semblables. Ceste ardeur à la verité fut en nous autres necessaire: autrement tost eust trouué fin toute ceste ronde machine. Voilà pourquoy precipitans noz volontez, & guidans noz affections par ces desordonnez apetitz, que la necessité mit en nous, portons à la communauté des femmes, quelque estincelle d'affection plus vehemente qu'aux hommes, & elle du semblable à nous. Comme nous pouuons voir à l'œil par vn exemple ordinaire: par ce qu'oncques ne se trouua si mal façonné personnage (& m'en deschargeray sus sa foy & conscience) qui naturellement ne receust, estans les choses conformes, plus de contentement en son esprit en compagnie de femmes, que d'hommes. Car encore se resiouyt nostre nature en elles, se voiant par la conionction de l'vn à l'autre immortalisée. Ainsi par ce seul moien se treuve vne affection fort ardente, que nous portons tous ensemble à toutes femmes: mais non celle amitié particuliere d'vn à vne, de laquelle nous parlons, qui à mon

iuge-

ingement gist en cause plus ardue, que celle que nous proposez. Et de ce m'en rapporteray à quelques gens de bon esprit, aymanz de telle affection leurs Dames, qu'encores que grandement ils pretendissent atteindre à ceste extremité, si est-ce qu'aians deduit beaucoup de choses en eux, se tenoient pour trescontens & satisfaitz auoir sans plus la iouissance de la veue, de la presence, & du parler. Pour ce que tant s'en fault qu'ils estimassent cestuy poinct estre cause de leur Amour, que grandement ils craignoient qu'y estans paruenuz leur Amour vint en quelque alteration ou changement.

Quoy? ne dit aussi communement le populaire, qu'aians acquis ceste barre sus vne Dame, ia commence l'amour prendre fin & decadence, & que meilleure en est la chasse, que la proye? De maniere qu'il semble, à le bien ouyr raisonner, que le mesme suiet, qui est selon son iugement la vraye source d'Amour, en soit aussi l'entier & vnique decroissement. D'autant qu'apuians leur bastiment sus vn fondement trop fragile, se resoult la matiere en soy: se trouuans bien souuent telz sotz amans (aians eu ce qu'ils pourchassent) aussi deceuz de leur entreprise, comme leur pensée estoit vaine. Or maintenant ie vous demande, seigneur Glaphi-

re, encores que deux vrais amans ne fichent leur esprit en ce contentement dont parlons, estimez-vous toutesfois si parauenture il eschet, que l'un d'eux face prodigalité de son corps en autre endroit, que celà ne soit avecq' un grand regret de sa Dame, si peut-estre elle le sçait? Je dy cecy pour autant qu'establissant vostre Amour sus le cueur, estimez ces intemperances naturelles (ainsi les apellez-vous) ne toucher ou blecer en aucune sorte les amans: & quant à moy, telle est mon opinion (& en ce conforme à la vostre) l'Amour faire sa seule & vraie demeure au cueur, l'Amour ne se susciter pour telles intemperances, ains pour quelque autre cause plus grande, comme bien tost ie deduiray: ce neantmoins l'un des deux amans ne pouuoir faire part à autrui, sans nostre extreme desplaisir. Et pourquoy doncq' pour autant que la vie des deux amans depend du tout l'un de l'autre, viuant du tout l'homme en la femme, & elle du semblable en l'homme. Parquoy seroient-ils tous deux grandement marries, qu'autres qu'eux s'ingeraissent de donner plaisir, non seulement tel que celuy ou Nature nous amoneste, ains en toute partie, à leurs Dames, ou à leurs Seigneurs. Et toutesfois ils s'y espargnent pour leur réciproque regard. ay-
mans

mans trop mieux se repaistre d'un doux & emmiellé desir, par cest apetit qu'ils en ont, que d'une sacieté, cueillans le fruit l'un de l'autre. Voire & vous diray d'avantage : que tant sommes vouez en elles, elles en nous, tant nous plaist le plaisir que nostre faueur leur moyenne, que si par songe il eschet, qu'en leurs imaginations, elles se treuvent trompées, pensans avoir eu part en nous : d'autant que nous voyons estre motif d'un si grand bien, en receuons autant de ioye en noz cueurs, comme si eussions esté presens à l'execution de noz volontez.

Car, pour vous dire le vray, le plaisir ne nous stimule point tant en nous, que l'envye qu'auons d'estre cause de celuy, dont participeront noz maistresses. Estans ne pour elles & non pour nous, viuans en elles & non en nous, mourans en nous, pour nous trouuer vif en elles. Aussi le bien que nous nous promettons recevoir d'elles, ores qu'en extremité il soit grand, si ne vient-il en telle perfection, que celuy qu'esperons leur pourchasser. Ainsi ne doutez qu'il n'y a celuy en Amour qui ne soit fasché à oultrance, que sa pretendue moytié trouuast contentement en autre homme qu'on sache dire: non pour tant que leur amytié (comme n'agueres ie disois, & encores de rechef dy-ie) soit

LE PREMIER LIVRE

fondée sus ce bastiment. Vray que nous apeton
 ce poinct. Nous l'apeton certainement,
 par ce que Nature pour bien grand cause nous
 l'a appris : mais l'apetant, vne trop grande ar-
 deur d'Amour nous apprend à nous en retraire,
 & ne le prendre quelquefois, estant à nostre
 commande. Que diray plus? Encores qu'il n'y
 eust esperance d'aborder à ce commun port, &
 que ma Dame m'eust de tout poinct debouté de
 ceste attente acoustumée, si persisteray-ie touf-
 iours en mon Amour engraué, aussi bien qu'au
 parauant. Mais à la charge toutesfois que ie
 me puisse asseurer, que non par faulte d'amytié,
 ains pour plus grande raison qui sert à l'entre-
 tenement de nostre Amour, elle se soit induyte
 à m'esconduire en telle sorte. Car si pour autre
 occasion, dont i'en puisse auoir cognoissance,
 comme pour se rendre plus affectionné à autruy
 qu'à moy : alors veritablement, n'en decroi-
 stra mon Amour, ains s'acueillera telle tristesse
 dedans moy, que viuant sus terre ie mourray
 de cent & cent mille mors. Par ce que seule ie
 desirerois estre en possession de luy donner le
 contentement qu'elle apete, plus en contempla-
 tion d'elle, que de moy. Que si seulement mon
 Amour n'aspiroit qu'à ce but là, i'amaïs ie ne
 reposerois premier qu'en auoir bonne yssue. Et

neant-

neantmoins l'apetant ie ne le desire, ne le desirant ie l'apete, quasi comme vne affection extrinseque, au regard de celle que i'ay en elle. Qu'est-ce doncques que ce vray Amour, qui d'un si doux tourment, passionne tant le monde? Ie le vous diray s'il vous plaist. Les anciens Philosophes, qui par vne grande perspective, penserent atteindre à l'intelligence de la Nature, ymaginans l'Amour estre vne excellente Idée, qui en tout outrepassoit l'humaine consideration, nous figurerent vne Androgine: Par laquelle voulurent entendre un homme composé du masculin sexe & féminin, lequel estant en sa perfection, s'orgueillit d'une presumption outrecuydée à l'encontre des Dieux: au moien dequoy fut depuis miparty en deux. Ainsi disoient ces anciens l'homme aimant penser se racointer à sa moytie, laquelle s'est esgarée.

Mais que ceste reunion de moytiez ne s'entende de la conionction des corps, ains d'espritz, c'est chose trop manifeste. Par ce que ceste superficie de corps que nous voions en nous-mesmes n'est pas l'homme dont nous parlons, ains un organe sans plus de l'homme que nous conuons en nous-mesmes. Car ainsi voions-nous des le commencement de ce monde, Dieu nous auoir tous formez à sa semblance: qui fust tous-

Le corps
n'est que la
superficie
de l'homme.

LE PREMIER LIVRE

iours non voyable, & separée de toute masse corporelle, iusques au temps de l'accomplissement de ses promesses. Or fut-ce l'ancien Platon, qui premier mit ceste opinion de l'Androgine en auant: & combien que ie ne sois pas du tout acertené, qu'il entendist la seule conioction des espritz, si m'osé-je bien assseurer qu'il nous figura tel miracle, pour nous représenter quelque chose de celeste dans l'Amour. Et peut estre en disputa-il en telle sorte, comme celuy, qui aiant voyagé toute l'Egypte, auoit eu communication par les prestres de la loy, de l'histoire de Moysé en son Genese. Mais que nous-est il besoin recognoistre ceste Androgine es Grecs & forains Philosophes, qui seulement par fendasses entreurent le Soleil, veu qu'en auons la vraye lumiere chez nous? Et que tout ce qu'ils en parlerent, ce fut par vn larrecin, que depuis ils deguysèrent, pour n'estre veu rien emprunter des autres nations estranges, lesquelles ils apelloient toutes barbares? L'Androgyné vraye & vniue, est celle qui nous fut représentée, non par histoire fabuleuse, ains par miraculeux effet, en la personne d'Adam: lors que ce grand Architecte de toutes choses, d'une hautaine sapience, & à luy seul reseruée, voulut d'un corps & d'un esprit ba-
stir

stir deux corps & deux espritx. N'est doncques ceste amytié diuine, & plus celeste que tout le commun ne presume? Car si vous voulez que, passant outre, ie vous declare plus à plain (vous aiant en peu de paroles descouuert ce miracle si excellent, soux lequel est contenue l'ymage de vraie amytié) comme depuis Dieu a permis que nous nous aymassions l'un l'autre, la cause pourquoy nous aymons: assurez vous, seigneur Philopole, que ie ne me trouueray moins perplex & esperdu, que celuy qui aiant entrepris la dispute de la Nature de Dieu, la remettoit tous les iours, du iour à l'endemain, comme chose incomprehensible à noz espritx. Car, ô bon Dieu, qu'est-ce qu'Amour? Le diray-ie estre moienné d'une similitude de meurs? Le diray-ie prendre sa source d'une constellation & influence de mesmes ascendans, soux lequelx nous sommes nez? Non: car en l'une, & autre maniere, il faudroit par infaillible consequence, que tout homme aimant ne fust trôpé en son Amour, & trouuaist obiet reciproque: ie veux dire, que tout homme aimant fust aimé. Apuiray-ie cest Amour sus une mesme education & nourriture ensemblement? encores moins: car la nourriture mutuelle cause bien une habitude, & quelque estincel-

LE PREMIER LIVRE

le de priuauté entre deux personnages : mais non vn cueur, non vn eſprit. En bonne foy, ſeigneur Philopole, conſiderant en moy-meſme, celle grande diuinité dont nous parlons, ie me trouue ſi ſurpris, qu'il me ſemble auoir beaucoup meilleur conte, iuger ce qu'Amour n'eſt point, que cuidant eſleuer ma penſée plus hautement, vouloir voler en ſa demeure, pour vous deſcouvrir en ſon naif, la force dont Nature l'a muny des le commencement de ce monde. Et tout ainſi que celui qui pretend comprendre quel eſt ceſtuy grand fabricant de nous autres, vient à diſcourir en ſoy-meſmes ſes grandiffimes miracles, toute ceſte ronde machine, ce commun entretient de l'vniuers : puis ayant paſſé & rapaſſé tous ces diſcours en ſon eſprit, trouue en fin par la grandeur de telz effectz, ce grand Dieu n'eſtre comprenable, ains ſurpaſſer toute humaine conſideration. Ainſi qui ſe promettroit entendre au long, quel eſt l'Amour, luy conuiendrait en particulier deduire tous ſes admirables faitz, puis reſoudre & terminer, n'eſtre choſe dont la cognoiſſance puiſſe tomber en noz eſpritz. Que diray doncques eſtre l'Amour? Or pregne-il ſon eſſence, ou d'une influence celeſte, ou d'une conformité de meurs, ou d'une habitude & conuerſation mutuelle,

tuelle, si diray-ie tousiours & maintiendray encōtre tous, l'Amour estre vn ie ne sçay quoy, lequel est beaucoup plus facile sentir & supporter au cueur, que de proferer par parole: qui tellement nous lie & vnit les espritz, que nous causant vne perpetuelle mort, nous fait reuiuifier en vn autre, nous faisant oublier nous-mesmes, pour nous souuenir de nous autres nous-mesmes: & qui par diuine puissance, nous estraint d'vn si fort & estroit lien (reuenans à la premiere Androgine de nostre Adam) qu'il met deux espritz en vn corps, & par vn mesme miracle, fait que deux espritz soient faitz vn esprit en deux corps. A vostre auis cestuy n'est-il souuerain & plus qu'extreme miracle? Et à fin qu'entriez en meilleure intelligence de mon dire, sans penser que ce soit fable: n'est-ce auoir vn esprit en deux corps, quand l'homme & femme n'apetent choses dissemblables, ains se conformans en mesmes volontez & affections, ne souhaitent si non ce qui plaist à l'vn, ou à l'autre des deux amans? Et toutesfois estans vn esprit en deux corps, se treuuent en fin, par vne singuliere metamorphose & eschange, estre deux espritz en vn corps. D'autant que ma Dame, estant paisible possesseresse de mon cueur, & moy au reciproque du sien, ie

LE PREMIER LIVRE

m'estime par mesme effet, posseder le mien & le sien, & elle le sien & le mien. Par ce que si ie suis dit seigneur du sien, qui est entier maistre du mien, ne puis-ie à bon droit estre dit seul possesseur de noz deux cueurs? Ainsi sommes tous deux priuez de deux espritx & deux cœurs, lequelx neantmoins l'un & l'autre auons en nous. Et puis qui sera celuy qui dira la cognoissance de l'Amour pouuoir tomber en noz espritx? C'est pourquoy les bons peres & philosophes, entre les Demons qu'ils establirent (seulx selon leur iugement instigateurs de noz œures & pensemens) apellerent l'Amour Demon, quasi nous voulans donner à entendre, estre vne chose poussée d'un instinct naturel, & quasi d'une recognoissance & impression que nous auons de nostre ancienne ymage sans autre consideration. Chose que vous pourrez decouurir par un oculaire exemple. Car tout ainsi que nostre entendement vacile, lors que rencontrons quelqu'un de noz vieux amys, lequel ne pouuons recognoistre, pour sa longue absence: toutesfois nous rassurons en nous, à la parfin voyons estre celuy mesme, qui pour le commencement nous auoit rendu si douteux: parquoy nous acostans de luy, avecques vne assurance acōpagnée d'infinites caresses & festoyemens,

mens, estimons le iour bien heureux d'une si heureuse rencontre. Ainsi retenans quelque notion de ceste vieille habitude, qu'il semble qu'eussions es cieux (s'il fault parler en Philosophes) du premier coup que voyons celle ou nostre naturel nous pousse, commençons tous esperduz à rentrer en cognoissance (& non encore bien assurez, ains sentans quelque petite estincelle de l'ancienné conionction) puis petit à petit nous fortifians en nous mesmes, quasi comme ayans pour le seur retrouvée l'obiet auquel le ciel nous voua, nous delectons, esgayons, familiarisons & prenons tout plaisir & contentement en son esprit. Je ne dy pas toutesfois, qu'estans telz caracteres dans nous engrauez & ces deux amans conioinctz d'un esprit par ce ie ne sçay quel bien qu'ilz n'entendent, car ainsi m'a l'Amour appris le dire, apres par une longue usance, nous ne desirions la conionction du corps l'un de l'autre, qui est cest apetit que nature a mis en nous autres en general, voire & ne le trouuions toutesfois meilleur en noz dames qu'en toute autre femme qui soit, pour ceste grande sympathie & liaison qui est entre elles & nous. Que si parauenture il auient apres un tel commencement, & poursuite d'une si galante amitié, que nous entrons en

LE PREMIER LIVRE

iouissance, tant s'en fault (au moins ainsi me le
 semble) que cest Amour tombe en quelque de-
 faillance, que tousiours trouuera accroissement
 de plus en plus. Là ou si du cōmencement n'eust
 esté qu'à acquerir ce poinct (que le vulgue appelle
 dernier) en ayant fait la conqueste, soudain se
 fust cest amant refroidy. Ainsi oncques ne trou-
 uay bon ny perdurable cest amour, si amour se
 doit appeller, qui seulement se repose sus ce poinct.
 Ny semblablement aprouueray l'opinion de ce-
 luy qui pour estre trop paoureux, craignant la
 grand' ardeur de son amour prendre par ce
 moyen fin, n'osa oncques supplier sa dame pour
 ce regard. L'amour est doncq' vne puissance,
 qui gist entre les deux extremités vicieuses,
 n'appuyant son origine sus ceste volupté com-
 mune, mais aussi qui à la longue né la veut du
 tout reietter, ains admettre. Qui est la cause
 (comme ie croy) pourquoy toutes noz loix pon-
 tificales à la consummation d'un vray maria-
 ge (auquel deuroit gesir le but de vraye amitié)
 ne requierent que le consentement des parties:
 Considerant ce vray amour de mariage, ne de-
 uoir estre fait que pour vne conformité d'es-
 prit, & non par apétence charnelle.

A ceste parole mit fin le Monophile, quand
 la Damoiselle, le favorisant grandement, luy
 dist,

diſt. Ie vous enten, ſeigneur Monophile, vous voulez dire que tout ainſi que les archers, tous drefſent leur fleches en vn blanc, non tant à cauſe de ce blanc, qui de ſoy eſt bien peu de choſe, ains pour autre plus grand reſpect, qui eſt l'honneur, lequel ils tiennent abſcons dans leurs teſtes: ainſi encores que voſtre amant tende à ce poinct de iouiſſance, ſi eſt-ce que ce n'eſt la fin pourquoy principalement il aime. Or n'en ſerez vous par moy deſdit pour ce coup, trouuant voz propoſ ſi conformes & conſonantz au vray, que ſi le meſme Amour ſortoit de ſon temple pour en diſputer, ne pourroit plus naiuement viſer au but de telles affaires. Et à bien dire ie croy que par voſtre bouche, en ce lieu ſe rendent les oracles de Cupidon, deſquelz, ſeigneur Monophile, ſoyez eſtably archipreſtre. A ce mot ſembla le clair Phebus vouloir obſcurcir les rayons de ſon beau viſage, pour baigner vn peu la terre de ſes pleurs, & d'une tendre roſee. Toutesſois pour toutes ſes attaintes n'eut ſceu offeſſer en aucune ſorte ces quatre vaillantz combatantz. Car le petit dieu Amour, quaſi d'une prouidence diuine, les auoit ſi bien remparez de murailles, & conuertures des arbres, dont ils eſtoient entourrez, que pour rien n'eut eſté en la puiſſance du ſoleil, les endommager

d'un seul point. Au moyen dequoy, apres vne petite pause, reprenant Charilée sa parole, & la liant auecq' ce qu'elle auoit proposé au parauant. Toutesfois, dist elle, si Cupidon vous doit porter faueur pour voz propos, ie ne sçay pas si le Soleil en demeurera content. Car il semble vouloir estaindre le feu qu'auiez en nous allumé de la diuinité d'Amour. Parauenture le fait-il pour vne enuie: voyant que ce petit puissant Dieu plus nous esclaire dans les cueurs, que luy qui est estimé l'astre le plus lumineux, pour esclairer sus l'vniuers. Sauf vostre grace, ma Damoiselle, dist Glaphire, le seigneur Monophile luy a reduit en memoire ses anciennes amours, desquelles ne se peut souuenir, sans nous faire part de ses larmes, remettant en son esprit, la grande ingratitude qu'il receu de sa dame Daphné, apres vne infinité de merites. Ie l'excuse doncq', dist Charilée, mais ie me promets bien, quelques pleurs qu'il vueille espandre, ne partir premier de ce lieu, que voz propos n'ayent pris plus long trait & autre issue. Et ce pendant tousiours demeureront en moy les vostres, seigneur Monophile, esquelz semblez auoir diuinement satisfait à la diuinité d'Amour, & aux moyens, non comme l'amant se doit porter, ains comme sans y penser

volontairement se maintient. Que vous en semble, mes gentilz-hommes, ne donnerez-vous voix à mon dire? Mais Philopole peu soucieux de toutes telles contemplations, & qui plus se plaisoit en toutes compagnies, ou il se rencontroit mettre les femmes aux ambles (ienten en colere) s'il pouuoit, desirant brasser à la Damoiselle vne nouvelle lutte, & conuertir ses armes, non contre le seigneur Monophile, ains taisiblement contre elle, d'une assez bonne grace luy respondit en ceste maniere. Volontiers ma Damoiselle, presteroi-ie consentement aux paroles du seigneur Monophile. Car par ce moyen me rendroy-ie agreable, à luy premierement, & en second lieu à vous, qui tellement l'approuuez; mais puis que si auant nous sondez, i'en descouuriray librement & en bref ce que i'en pense. J'ay assez longuement presté l'oreille à ce qu'il luy a pleu mettre en auant, & entre plusieurs de ses discours, ay trouué les aucuns bons, autres passables, & les autres assez lourds & fascheux. Mais sus tous me suis tousiours arresté que le principal but ou il visoit estoit à nous faire trouuer bonne la loyauté de l'homme à femme. Et bien que pour l'enuie que i'eusse de ne donner occasion à la discontinuation de voz propos, seigneur Monophile, ie

LE PREMIER LIVRE

vous aye laissé passer ce point, auquel tant nous publiez la foy, si est-ce que vous voyant ores vn peu de repos, ie me delibere entrer en camp contre vous (& ainsi vous l'auois-ie promis) en ce que d'une assez bonne rethorique, pour respondre au seigneur Glaphire, l'auiez estably iuge en sa cause, sçauoir si au cas ou sa Dame auroit forfait en son endroit, il en receuroit aucun contentement. Eſperant par tel moyen, luy tirant les vers du nez, le rendre confuz en son dire. Or puis que d'une si grande courtoisie, vous estes voulu rendre sindic & procureur general de la communauté des Dames, ie croy que ne trouuerez estrange, si moy du semblable esmeu d'une affection naturelle, delibere me porter protecteur, pour maintenir en son entier le droit & party des hommes. Qui sera tel, que i'espere vous faire tant cognoistre par mes iournées, qu'encores que la loyauté soit requise de la femme à homme, si ne faudra il penser, les hommes estre obligez à telles loix, quoy que la femme le soit. Ie vous mercie de bien bon cueur, dist Glaphire, puis que de si bonne volonté, & sans aucune priere, il vous a plu entreprendre la deffense de ma cause. Mais puis que si liberalement vous estes offert à me faire ce plaisir, le seigneur Monophile se peut bien assseurer

asseurer, que combien qu'au combat que luy vou-
 lez deliurer il emportast le dessus de vous, si au-
 ra-il encores prou d'affaire à se deffendre, en
 ce qu'il maintient l'Amour ne gesir qu'en vne
 chose, laquelle il ne peut expliquer. Car toutes
 telles Idées non expliquables; ne me semblent
 tomber en l'Amour. Lors ie (qui comme ie
 vous ay dit) par cas d'auenture estant entreue-
 nu sur leur deuis, me tenois illecques à requoy
 dans l'espeisseur des arbrisseaux, en delibera-
 tion d'exercer plus tost mes oreilles, que ma
 langue, les voyant passer si à la legere les der-
 niers propos du seigneur Monophile, & vou-
 lant suplérer à leur deffault, conclu en fin en moy
 mesme, rompre ma premiere entreprise. Par-
 quoy sortant de ce lieu, sans autre reuerence
 plus profonde, que si toute l'apres-dinée eusse
 esté entremeslé parmy eux, leur dy en ceste sor-
 te. Ces deux poinctz vrayment, messieurs,
 trouueront lieu de controuerse digne de ceste
 compagnie, & ausquelz fault que le seigneur
 Monophile pour son honneur prepare respon-
 ce. Autrement pourroit perdre en vn instant
 la grand' reputation, que de tout temps il a ac-
 quise en vostre endroit. Et si peut estre il m'est
 par vous autres permis seruir encores d'un
 combatant, volontiers me ioindray-ie avecq' les

LE PREMIER LIVRE

seigneurs Glaphire, & Philopole. Et pource
esguise si bon luy semble & sa langue & son
esprit: car il n'a besongne faite. Adoncq' la
Damoiselle, ensemble toute ceste compagnie,
bien estonnée de se voir ainsi surprise à l'im-
pourueu: Comment dist elle, seigneur Pasquier,
qui vous eust pensé en ce lieu? mais, en foy, qui
vous y amaine tant à propos? A quoy ie luy
respondy. Par le dieu d'Amours, ma Damoi-
selle, ie serois bien empesché le vous dire, & ne
m'en trouue moins que vous esbahy. Vray que
voulant donner lieu bien auant à mes pensées, à
cause de celle déesse que cognoissez, souz l'en-
tiere puissance & gouuernement de laquelle
toutes mes forces reposent, ie ne sçay par quel
bon vent i'ay esté icy poussé: ou vous voyant
tous entrez en telle deuotion, ay pris vn singu-
lier plaisir en la poursuite de voz propos: les-
quelz ie ne me deliberois entrerompres, sans l'oc-
casion que m'en a apresté le seigneur Monophi-
le, qui contre l'opinion du seigneur Philopole,
vous a voulu faire entendre l'Amour n'estre a-
petence de conionction corporelle. Ce que ie ne
luy puis accorder, encores que parauenture, ma
Damoiselle, en ce faisant ie contreuienne d'un
bien peu à vostre volonté. Vous nous dressiez
doncq' ceste embusche, dist Charilée, or vous en
pou-

pouuez-vous bien aller ainsi comme estes venu. Car si la compagnie me croit, premier que permettre vous auancer, on vous imposera silence: estans ia tous les propos du seigneur Monophile passez en nostre cour: mesmes avecques celui qui y deuoit pretendre plus grand interest que vous, qui est le seigneur Philopole, lequel n'y a contreuenu. Surquoy Philopole (apres toutesfois que ceste petite bande m'eut par quelques caresses festoyé pour ma venue tant inopinée) à moy ne tienne, respondit-il, qu'il n'entrepreigne pour l'amour de moy ma deffense. Et si peut estre i'ay laissé couler les propos du seigneur Monophile, sans y donner quelque attainte, ce n'a toutesfois esté que i'y volusse adherer, ains seulement pour l'enuie que i'auois de luy brasser autre menée, comme ie me delibere, ceste cy ayant pris son cours. Partant, ma Damoiselle, ie vous pry ne me vouloir alleguer, au preiudice de moy mesme, & que pour ma negligence ie ne perde point ma cause, si elle se treuue fauorable. Iamais ie ne l'entreprendray, seigneur Philopole, luy respondy-ie: car plus tost aimerois-ie me taire tout le reste de ma vie, avecques le contentement de ma Damoiselle Charilée, qu'encourir sa male grace, pour vne seule parole. Mais elle me respondit: Vo-

LE PREMIER LIVRE

stre courtoysie, seigneur Pasquier, vous impetrera audience mais à la charge, qu'il n'y escherra replique, si possible mettez en auant propos, au desauantage de ceux du seigneur Monophile. Car plus nous agréent les siens (fussent ilz nuz, & despourueuz de raison) que les vostres, au suiet que nous proposez, acompagnez d'une infinité d'arguties. A quoy luy ayant respondu, qu'autre loy ie ne demandois, que celle qui luy plairoit m'ordonner, fut par Philopole repliqué, qu'elle n'auoit ceste puissance dessus ceste compagnie, & apres quelques petites paroles & altercations reciproques: Or là doncques, dist-il, adressant vers moy sa parole, seigneur Pasquier: car en vous repose ma protection. Ce n'est vostre protection que i'entreprend, seigneur Philopole, respondy-ie, ains celle mesme de l'Amour, & à l'encontre de celuy, qui pour se vouloir rendre son trop affectionné protecteur, le voulant par ses subtilitez viuifier, nous l'a cuidé amortir. En quoy ce neantmoins ie l'excuse, & en remet la seule coulpe sus l'Amour, lequel ores qu'il se vueille rendre à nous familier & communicatif, autant qu'autre chose du monde, choisissant sa demeure en noz cueurs, si ne veult-il qu'on le cognoisse, ains va couurant de plus en plus
sa

Autre discours
sur la
matiere d'a-
mour.

sa nature: en laissant seulement à vn chacun le iugement, selon sa particuliere affection. Car l'Amour estant comme vn Polipe, qui change de diuerses couleurs, selon ses diuers obiects, chacun en ceste matiere diuersifie son opinion, selon la varieté des passions qui sont en luy. Si est-ce qu'en telle diuersité, ne se trouua oncq' amant, qui ne pretendist au dernier poinct de iouissance, plus ou moins selon que la passion qu'il enduroit le transportoit. Car tout ainsi qu'en toutes choses nous pretendons à quelque but, aussi fault-il qu'en Amour y ayt vne certaine fin, ou nostre esprit s'arreste. L'homme travaille pour manger: le capitaine, ou bon soldat se met au hazard de la mort, pour acquerir au pris de son sang, marque d'honneur parmy le monde: l'auanturier va à la guerre pour auoir part au butin. De sorte qu'il n'y a operation, voire si legere soit-elle (n'estoit qu'elle procedast d'un homme tout insensé) ou nous esperions descocher nos fleches à coup perdu, & sans auiser quelque fin: laquelle ne prouient que d'une cupidité qui tombe en nous: & dont d'autant plus sommes tourmentez, que plus y fichos nostre cueur. Pourtant est-il necessaire en Amour y auoir vne fin: et encôres que nous sentiôs en cest endroit affectez selon la varieté de nos

LE PREMIER LIVRE

*passions, si fault-il y auoir vne cause generale, & dont, & pourquoy nous aimons. Toutesfois à ce que ne soyons abusez par le moyen de l'e-
 quiuoque qui sourd de la proximité des causes, premier que passer ce pas, entendez, seigneur Monophile, que tous Philosophes maintiennēt,
 comme certainement il est vray, en toutes les choses de ce monde, y auoir deux causes principales, l'efficiente, & la finale. Celle nommēt-ils efficiente, dont la chose est: & la finale celle pourquoy, & en faueur de quoy la chose est. Ces motz, peut estre, sembleront tenir de leur scolastique à quelques petitz delicatz, si est-ce qu'ils sont necessaires en la question qui s'offre, & à tout homme qui veult entendre à la cognoissance du vray. O que trois & quatre fois est heureux celuy, qui cognoissant ces deux causes, les peut distinguer l'vne de l'autre. C'a esté comme ie pense, qui vous a fait si lourdement choper. Car pour oster de l'impression des gens, que ceste apetence charnelle n'estoit la cause dont nous aimons, auez voulu maintenir estre vne chose accidentaire. Ce que neantmoins est certain, estre de la vraye & pure substance d'Amour. La cause efficiente, & dont nous aimons vne Dame; est veritablement cest instinct que dites naistre en nous, quasi par
 per-*

permission du ciel : mais la fin pourquoy nous
 aimons , est pour attaindre à l'entiere iouissan-
 ce. Ainsi vn chacun de nous aime, pour vn iour
 estre iouissant : & la cause qui l'induit à plus
 apeter ceste conionction avecq' sa Dame, qu'a-
 uecques toute autre personne , vient de ce ie ne
 sçay quoy, que dites estre plus facile sentir que
 exprimer: lequel imprimons en nous d'une cer-
 taine opinion qu'en conceuons: faisans vn pesle-
 mesle de raison avecques la passion. C'est ce dont
 nostre mere commune , nous a voulu^x distin-
 guer de tous les autres animans , lesquel^x sans
 aucune discretiō de ce qui leur plaist, ains meuz
 sans plus de ce premier mouuement, qui est en
 eux pour la conseruation de leur genre , s'adres-
 sent tous indifferemment à leurs femelles. Ain-
 si ne sçauent que c'est aimer: car en eux default
 l'opinion, cause qui engendre l'Amour . Bien
 est vray qu'aucuns voulurent dire, qu'ils en a-
 uoient quelque imagination & estincelle ; tou-
 tesfois pour n'auoir iamais esté beste , ie m'en
 raporte à ce qui en est , aussi n'est-ce pour les
 bestes que ie parle , ains pour les hommes ay-
 mans. Lors Philopole faignant non y penser: Si
 auois-ie tousiours entendu, dist il, que les amans
 estoient bestes. Ie ne sçay quel^x amans (luy dis-
 ie) mais ie me puis bien vanter pour auoir hono-

LE PREMIER LIVRE

ré, & encor honorer vne Dame, d'un ydiot
estre deuenu mieux appris, que ie n'eusse sçeu fai-
re par tous les preceptes du Courtisan. Toutes-
fois pour ne m'eslongner de mon propos: ie se-
ray doncques bien des vostres, seigneur Mono-
phile, en ce que dites l'Amour naistre de cest
instinct naturel, restera seulement à prouuer en-
tre vous & moy, & deduire par quelques
moyens suffisans, si la seule fin de l'Amour re-
garde à la iouissance. En quoy si par commune
opinion du peuple il me falloit fortifier, certai-
nement, seigneur Monophile, vous n'emporte-
riez le dessus, ains vous faudroit du premier
coup habandonner, & camp, & armes. Car
qui est celuy en ce monde (hors mis vous) qui

Quelle est
plus violen
te ou l'A-
mour, ou
l'amitié.

n'aime pour ceste fin? Toutesfois pour ne me
vouloir asseurer sus iugement si fragile, ie vous
suply dites moy, si l'amitié d'homme à femme
ne pretendoit qu'à l'esprit, pourquoy nous sen-
tirions nous agitez en icelle, tantost d'un tour-
billon de ioye, & à l'instant de douleur, puis
tout soudainement de crainte, & en celle d'hom-
me à homme ne sommes ainsi tourmentez: si-
non qu'en ceste cy, nous nous tenons tous con-
tens & satisfaitz, d'estre d'eux sans plus ay-
mez, ce que cognoissants auons ia touché à no-
stre pretendu: mais en l'autre, outre l'esprit, a-
compa-

compagnons noz desirs d'un espoir, qui nous promet quelque iour cest heureux port de iouissance? D'auantage dites moy, si cest Amour se guidoit seulement par vne liaison & conionction d'espritz, ne deurions nous par raison naturelle plus aimer celuy que Dieu voulut faire en tout & par tout à nous semblable, que non la femme laquelle il voulut bastir d'un degré plus basse que nous? Or eschet-il ordinairement le contraire, & aimons sans comparaison plus la femme que l'homme. Voire que nous voyons par cest Amour feminin, auoir esté violée & rompue la loy de vraye amytie, qui estoit de l'homme à homme. Je vous pourrois en cecy faire recit d'un Tite & Gisippe: desquelz Tite combien que de toute ancienneté fust affectionné enuers Gisippe, & tellement affectionné, que pour mourir n'eust voulu de sa volonté rien entreprendre au desauantage de son amy, si se trouua-il si forcené de l'Amour, que forçant tout rāmpart de ceste amytie ia de long temps inueterée, aimade telle furie la future espouse de son amy, que sans l'ordre que Gisippe y sceut donner, sa ruine se preparoit. D'autant qu'en son ame sentoit deux extremittez toutes contraires: mais l'une plus forte que l'autre: C'estoit l'Amour, dont il estoit si extremement

LE PREMIER LIVRE

outré, qu'ores qu'il s'en voulust deporter en fa-
 veur de l'amitié qu'il auoit en Gisippe, si n'e-
 stoit il en sa puissance y donner aucun remede,
 sinon par la seule mort, à laquelle il se resou-
 doit. Vn semblable exemple vous pourrois-ie
 alleguer d'un filz de Roy (recité, si ie ne m'a-
 buse, par Iustin) lequel violant tout droit des
 hommes, & de Nature, se trouua si sollicité &
 espris, pour vne sienne marastre, qu'encores
 qu'il portast à son pere toute obeissance de filz,
 si ne se peut-il iamais garantir d'un tel mal, si-
 non par l'acomplissement de son desir, ou si la
 mort ne luy eut apporté medecine. Qui causoit
 donc telz outrages en ces deux hommes (outra-
 ges puy-ie apeller, brisans par toute force tout
 droit d'amitié & nature) sinon qu'en l'amitié
 d'homme à homme n'y a que conformité d'es-
 prit, en cest Amour gist vne simpatie entre-
 meslée & de l'esprit, & du corps? Quand ie dy
 du corps, j'enten ceste copulation charnelle, seule
 fin de nostre Amour. Et qu'il soit vray: car tout
 ainsi qu'en toutes choses, estans paruenus à no-
 stre but auons en nous contentement & satis-
 faction bien grande, aussi par ce seul moyen, ces
 deux cy dessus nommez, attaignirent à l'assou-
 uissement de leurs passionnez desirs. Et non
 seulement ces deux: mais tout autre, estant ar-
 riué

riué à ce tant desiré point de iouissance . Car au lieu ou au parauant nous sentions perplex & esesperduz en ces extremes desirs, estans abordez à ce port, cessent en partié les trop violentes passions, & prèd l'Amour en nous nouuelle forme & habit selon que nostre nature s'y dispose, demourât tousiours toutesfois en son essence d'Amour. Voilà pourquoy fut figurée par les Etniques celle mesme Androgine dont auez voulu disputer, quand les deux partz & moitiez desassemblées, tachèt à se r'acoupler. A l'imitation de laquelle, quelque poete de ce temps, dans vn epithalame, escrit les ames estre là sus acouplées ensemblément.

Leans estoit le repoz

Des espritz de tous les hommes,
Desquelz, maugré l'Atropos,
Estions faitz telz que nous sommes,
Tous deux à deux attelez,
Hors mis qu'estans apellez
(Ainsi que fut l'Androgine
Sus nostre prime origine)
Par la volonte des Dieux,
Sommes distinctz l'un de l'autre,
Et d'un mypartiz en deux,
Ainsi est la moytié nostre,

LE PREMIER LIVRE

Vn temps de nous deschainée.

Vray que petit à petit,
 Commençons de nous cognoistre,
 Sentons en nous l'apetit
 De nous reioindre, s'acroistre:
 Si que par mesme amytié
 Reprenons nostre moytié,
 Et ainsi qu'au lieu celeste
 Viuions vn-deux sans moleste,
 Ainsi prenans noz deduytz
 Auecq' vn autre nous-mesme,
 Là ou mieux nous sentons duytz,
 Viuons en plaisir extreme,
 Et ioye desordonnée.

*A laquelle opinion vous mesmes volontiers
 fussiez condescendu (n'eust esté la crainte qu'a-
 uiez de vous entretailer) quand nous auez con-
 fessé, l'Androgine estre l'apetence de reunir
 les deux moities esgarées : Et si peut estre
 voulez venir à celle que Dieu des le commen-
 cement de ce monde nous proposa (dont auez
 pensé faire vostre profit, mais toutesfois à cre-
 dit) ne nous fut en icelle, par termes beaucoup
 plus expres ordonné, que fussions deux espritz
 en vn corps & vne chair, qu'un esprit dedans
 deux corps ? Vray que ie ne veux pas dire, que
 pour*

pour former l'Androgine, l'un & l'autre ne soient requis: mais c'est pour vous monstrez, que si desirez un esprit seulément en deux corps, rendrez ceste nostre Androgine defectueuse & imparfaite. Car quant à ce que pour donner fueille à vostre dire, sus l'issue de voz propos (quasi pour la bõne bouche) nous auez voulu servir de voz loix, en ce qu'ils requierent le seul consentement pour bastir les mariages: que veux-ie dire autre chose, sinon que ce consentement, prouenant de celle conionction d'esprit & non commune, fait & engendre cest Amour: mais la communication des corps le parfait & le consume? Ainsi l'entendirent noz loix, & voyez en tous endroitz, maintenir la vraye fin de mariage, estre la multiplication de ce monde. Et si suis encor en grand doute comment ils voulurent prendre cestuy consentement dont parlez. Par ce que nous voyons auoir esté permis aux hommes & femmes se marier, voire en l'aage d'indiscretion, & ou il semble n'y auoir grād' cognoissance, moienant qu'ils eussent pouuoir de cohabiter. Si qu'il semble qu'elles ayent entendu par cestuy consentement, vne propension mutuelle à ceste conionction des corps. Qu'ainsi soit, nous le voyons, ven qu'un mariage se peut rompre & desnouer

LE PREMIER LIVRE

à la Volonté de l'autre, si l'une des parties se treuve en cest endroit froide & maleficiée : ce qu'autrement n'eussent permis, ny les loix de noz Papes, ny de noz Iuriconsultes, ausquelz i'en remetx ceste dispute. Seulement vous suffise les mariages se former par ce consentement que dites, mais se fermer par ceste copulation corporelle. Et par ce que semblez estimer l'Amour estre trop celeste, pour se fonder en chose qui trop participe selon vostre auis du terrestre: Voyez en quel erreur vous tombez & mal reconnoissez le grand heur qui est en Amour, pour tendre seulement à vne si heureuse fin, par laquelle nous est moyennée l'immortalité en noz mortelz corps, par la propagation de nous autres en noz semblables. Vray qu'en ce point cy Nature fit ainsi que la sage & discrete mere, laquelle cognoissant le bien qui est necessaire pour le futur à son enfant (dont il ne peut auoir cognoissance pour son bas aage) par dons, par presens, par vn doux & amiable parler, & autres telles petites amorfes qui plaisent à ce petit mignon, l'aleche & induit (sans toutesfois qu'il y pense) à s'acheminer au but, qu'elle s'est en soy mesme progetté : iusques à ce que par vn long progres de temps, & venant l'aage plus meur & parfait, se treuve cestuy filz

Pourquoy
Nature a
mis en nous
l'appetit de
iouiſſance.

filz venu au point de la chose que plus luy estoit necessaire, au grand contentement, & de luy & de sa mere: ainsi ceste sage mere Nature s'estant en soy proposée la multiplication de ce monde, plante en nous des le commencement de nostre aage, telles petites semences d'Amour, nous amorçant l'un à l'autre, par ce pretendu plaisir. Mais à quelle intention? est-ce sans plus pour l'estincelle de ce plaisir qui nous est commun avecq' tous autres animans? Non, non, seigneur Monophile, ains pour nous rendre comme ie vous disois (& vous-mesme l'aveu à la trauerse confessé) immortel en nostre mortalité. Et vrayement nous cache-elle ce secret, par le voile du premier plaisir qui s'offre en ceste communication mutuelle. Mais à la fin, estans paruenus plus outre, cognoissons encores par vn plus grand & iteratif plaisir, que ceste fin tendoit à plus haulte fin, qui estoit, auoir enfans: esquelz (comme ayans atteint tout nostre dernier but) naturellement nous nous plaçons & resiouissons, plus qu'en autre chose terrienne. Or est-il ainsi, que ceste fin est vne fin interminable, & qui ne treuve point de fin. Par ce qu'onques Nature ne se fascha ou lasa d'auoir enfans. Ainsi se renouuelle tousiours en nous la cupidité du plaisir, & par mesme

LE PREMIER LIVRE

moyen le desir, lequel n'est pas si passionné d'autant qu'apres la iouissance, nous nous tenons assurez d'y trouuer vn prompt remede, ce que nous n'osions pas affermer au parauant. Ainsi là ou deuant, nageyons entre l'esperance & la crainte, viuons apres en assurance d'auoir ce point, ou tous noz pensemens se dressioient. Si bien que tousiours demeure l'Amour: mais prend diuerses qualitez: par ce que si au precedant se nommoit desir garny d'une esperance, puis apres s'appelle desir acompagné d'une assurance. Je veux doncques dire que l'Amour (pour bien diffinir Amour qui tourmente ainsi les hommes) est vne passion, conceue d'une opinion, prouenant d'un certain instinct qui s'imprime dedans nous, tendant à la conionction corporelle de l'un à l'autre. Amour sera doncques vn instinct, comme vous, seigneur Monophile, maintenez, mais toutesfois vn instinct acompagné du desir de se reioindre: & semblablement le desir tousiours marchant avecques l'instinct. Et par ce moyen trouuerons peut estre lieu de satis-faire à quelques vns, qui à cause de ceste apetence qui se rencontre en cest endroit, voulurent maintenir, l'Amour ne deuoit acquiescer tel nom, iusques à plaine iouissance. Certes combien que ie ne face grande profession des

termes,

*Diffinition
d'Amour.*

termes, étant de vous entendu, si me semblent telz personnages auoir grandement sur ce foruoyé: car encores que ne soyons entrez en ce poinct de iouissance corporelle, si se treuve il autre chose, de laquelle en nous mesmes iouis sans, acquerons le nom d'amant enuers noz Dames: c'est ceste naturelle impressiō & idée de leur meilleur, que nous couurons dans noz esprit: au moyen de laquelle, nous les aimons plus que les autres. Car, à bien dire, de cest instinct depend principalement l'Amour: par ce que peu souuent marche en ieu, qu'il ne se garnisse tousiours de l'apetence naturelle qu'auons de nous reuinir. Là ou souuentesfois apetons ceste operation de Nature en plusieurs femmes, sans les aimer neantmoins, ains quasi conduitz & menetz par vne brutalité, & sans autre consideration que de passer nostre colere. Mais pour retourner sus mes erres, qu'Amour soit vne passion, ie croy que n'en faites doute, au moins nous l'auex-vous assez appris pendant tout vostre discours. Et quant à ceste communication des corps, si n'en demourez contens, si en pensé-ie toutesfois auoir dit ce que la necessité requeroit. Vray que pour le regard de l'instinct, encore qu'il ne se puisse bien bonnement descouvrir, si n'y a il celuy de nous qui ne sache, que

LE PREMIER LIVRE

naturellement nous sommes plus adonnez à quelques personnes, qu'àux autres. Et comme ainsi soit que noz iugemens naturelz sont diuers, aussi adonnons-nous noz cueurs, chacun en particulier, comme nostre nature nous guide. De là sourd la diuersité d'opinions: de sorte que quelques-vns voulurent dire, la verité estre submergée aux profonds abismes des puyz. D'autant qu'un chacun de nous iuge, non selon la verité, ains comme son instinct le pousse. Ainsi encore que ie ne puisse declarer dont prouienne cest instinct (sinon de nostre nature, par ce qu'autant se treuuent d'inclinations, comme d'hommes) si est-ce que ie cognois bien, que c'est ce seul & vnique, qui donne ouuerture à l'Amour. Et si peut estre se rencontrent plusieurs à aymer vne mesme Dame, c'est qu'ils sont ensemble aprochans de quelque commune influence. Or ay-ie baillé ceste diffinition à l'Amour, combien que ie soye bien seur, y en auoir un autre espece, qui semble tenir de Nature, & toutesfois ne procede de cest instinct dont parlons. Comme voyons ordinairement eschoir, qu'encores que de nous mesmes ne soyons enclins enuers plusieurs personages, si est-ce que bien souuent contre noz propensions, nous nous sentons induitz à leur porter affection, pour ce sans

ce sans plus qu'ils nous la portent. Et dit on en commun prouerbe, l'ingratitude estre trop grande, en l'homme ou femme, qui estans aimez ne veulent rendre le reciproque. Cestuy est veritablement vn Amour: mais non si vis comme l'autre dont nous parlons, & pour bien dire, retirant plus sus pitié que sus l'aimer.

Ainsi est-il à vn chacun familier se resentir du mal d'autrui (voire par fois de noz ennemis, lors que les voyons afliger) & non pourtant qu'il y ait vne affection, telle que l'amitié que nous auons en quelques certains personnages, ou nostre naturel nous inuite. Aussi ne me semblant ce dernier Amour, qu'une ordinaire compassion, que nous prenons de ceux, lesquels voyons en nostre faueur tourmentez, ne l'ay voulu comprendre souz celle diuinité dont parlons: de la perfection de laquelle, combien que ie n'aye parauenture disputé tout au long & que ie ne soye assésuré avecq' quel contentement pourrez recueillir mes propos, si me tiens-ie pour trescontent du peu qui vous a plu m'ouir. Vous auisant, toutesfois, quelque chose que i'aye mis en auant, n'estre d'aucune moyenne contemplation, ains de ceux, qui pour l'auoir moins que moy esprouué, en entendoient mieux la nature. Car pourriez-vous bien estimer, qu'en la

LE PREMIER LIVRE

seruitude ou ie suis, pour celle Dame que sçau-
uez, j'eusse en moy telle liberté, de pouuoir dis-
cerner, non seulement ceste matiere, ains quel-
que chose que ce fust? Lors Charilée, me respon-
dant auecques vn assez gracieux ris, sans tou-
tesfois faire semblant de m'acorder aucune
chose: Qui vous en a doncques tant appris? me
dist elle. Suffise-vous, ma Damoiselle, respon-
dy-ie, que ie le tiens de gens, qui l'entendent
mieux, que ceux qui estans en ceste obscure pri-
son, ne peuuent cognoistre celuy qui les a ren-
duz si captifz. Si n'en demeurerez-vous plus
authorisé pour celà. (repliqua elle) car vous-
mesme des l'entrée de vostre discours auez
donné sentence contre vous: quand nous auez
voulu aprendre, que ceux qui deduisent l'A-
mour, n'en sçauroient autrement parler, que suy-
uant leurs passions. Mais s'ils n'en ont fait es-
preuue, encore se rendent-ils moins croyables,
pour en parler, comme clerks d'armes. Parquoy
en tout euenement ne pouez-vous estre de nous
creu. A ce mot Monophile, à qui ia pesoit se
taire si longuement, luy respondit. Pour vous,
ma Damoiselle, pouuez-vous donner assen-
rance de ne luy adionster foy: mais non pour ces
deux autres Gétilz-hommes. Et pour ce ie vous
suply bien humblement ne trouuer estrange, ores
que

que ce soit contre vostre ordonnance, si pour me deffendre en ma cause, ie veux donner response au seigneur Pasquier, en faueur duquel seulement, & non pour l'Amour de moy, ie croy qu'ayez estably la loy de non repliquer. Encore moins serez-vous creu, dist elle: Contentez vous sans plus l'un & l'autre, luy d'auoir eu audience contre nostre volonte, & vous du contentement qu'auons prins en voz propos, lesquels n'ont besoin d'autre deffence, que celle qu'ils ont ia eue. En bonne foy ma Damoiselle, luy dis-ie, vous estes trop partiale, & pour auoir la cause du seigneur Monophile trop affectee, peut estre vous-mesmes ne serez pas creue. Pour ce ie vous pry, ne luy interdisez point la parole, pour dire ce que luy plaira. Ce propos sortit de moy avecques vne telle contenance, que Monophile tout fasché, pensa que ie le deffiasse, seulement pour vne assurance que i'eusse, qu'il ne me pourroit satisfaire. Au moyen dequoy, quasi demy indigné, plusieurs-fois voulut vser de reuenge: mais Charilée, faignant de se courroucer: Vous suffit-il pas (dist elle) que le seigneur Pasquier est vn supernumeraire, & non naturalisé en ceste nostre compagnie? Ce n'est en son endroit qu'ainsi il vous fault arrester, ains me sembleroit plus

LE PREMIER LIVRE

seant pour vostre honneur, que remissiex en
 memoire le combat, que n'agueres vous ont pre-
 senté ces deux autres Gentilx-hommes. Aui-
 sex doncques seulement à vous tenir sus voz
 gardes: car si leur pouuez satis-faire, vous fe-
 rez beaucoup pour vous. Ce sera doncques pour
 vous obeir, ma Damoiselle, respondit-il. Or
 s'estoient tenez, pendant tous ces menux pro-
 pos, Glaphire & Philopole sans mot dire: par-
 quoy Philopole ayant assez, ce luy sembloit,
 escouté: Je vous pry (dist il) ma Damoiselle
 desponiller toute affection, & atribuer l'hon-
 neur à celuy qui l'a merité, sans tant vous for-
 maliser, comme vous faites. Allez, allez sei-
 gneur Philopole, respondit-elle, n'estes-vous de
 la partié? Je vous pry seulement parfournir à
 vostre entreprise, en ce qu'auex mis sus les chās
 deuant la venue de Pasquier, pour puis (ayant
 acheué) donner lieu au seigneur Glaphire, au
 poinct qu'il a entamé. Vous dressez tresmal la
 partie (dist Monophile) & semble, ma Damoi-
 selle, que soux pretexte de me vouloir porter fa-
 ueur, pretendiez à ma totale ruine, parce que ne
 me permettez entrer en champ contre vn seul,
 & toutesfois esmouuez ces deux capitaines cy
 pour me combattre à toute oultrance. C'est trop
 parlé, dist elle, vous en trouuerez plus tost l'is-
 sue

sue par bonne execution, que le commencement par telles petites demarches. Sus doncques, seigneur Philopole, puis qu'auez ouuert l'ocasion de la noyse, desployez toutes voz forces, pour nous donner à cognoistre si serez aussi bon executeur, comme bon entrepreneur: d'autant que vous me semblez auoir choysi (à vostre esciāt) fardeau assez pesant, & dont, si ne vous gardez, sans y penser succumberez. Car qui seroit si hebeté qui auecq' vous voulust dire, la loyauté n'estre requise en vn homme comme en la femme? Ma Damoiselle, respondit Philopole, pour vous dire le vray, ie crains que voulant fauoriser & ayder l'opinion du seigneur Glaphire, ie ne me moyenne vn grand tort. Toutesfois puis que si auant me sollicitez en l'acquit de ma promesse, ie commenceray mon propos, lequel ne sera point long, ains seulement pour monstrer au seigneur Monophile (soux le meilleur auis neantmoins de toute ceste compagnie) que quant à ce qu'il demandoit, si nous receurions aucun contentement de noz Dames faisans communication de leurs corps anecques autrui: & que le semblable deuons nous estimer d'elles, nous habandonnans à autres, il me semble ceste comparaison n'auoir lieu. Non qu'en ce ie vueille deprimer le sexe

LE PREMIER LIVRE

feminin, pour extoller le nostre: mais on sçait de toute memoire, les femmes n'auoir esté colloquées en tel degré de liberté, que les hommes: & estre permis aux hommes beaucoup de choses, que non aux femmes. Je n'allegueray administration de Republicques, maniement d'armes, exercitation d'estatz politiques, desquelles ont esté deboutées comme inhabiles & non suffisantes à ce faire. Mais aussi ont désiré noz anciens, vne certaine pudicité en elles: laquelle seule ont estimée, au suplément de ce dont toutes noz loix, tant naturelles, que ciuiles, les auoient priuées. Ce qui n'a pas tant esté requis en l'homme, comme n'estant si fragile & lubrique que la femme. Au moyen dequoy Nature y obuiant par bös & raisonnables moyens, à imputé en la femme à impropere, ce qu'en l'homme à presque retourné en louange. Or qui de telle loy me demanderoit plus ample raison, à peine que ie la puisse dire, sinon que Nature nous l'a dictée. Aussi ne suis-ie destiné pour vilipender vostre sexe, duquel j'estime en partie mon heur & ma vie dependre (& disoit ceste parole, descourrant sa mocquerie) Suffise vous qu'estant telle chose imprimée de tout temps dans noz espritz par vne naturelle inclination, me semble n'estre besoin adapter en vn endroit

endroit, ce que lon pourroit approprier à l'autre. Vrayement (dist Charilée) vous en parlez assez sobrement, sans rien toutesfois obmettre. Mais quoy, seigneur Monophile, nous lairrez-vous en si beau chemin, sans estre de vous secourues? Certes i'en apellerois, mesmes me semblant souz ceste generalité, estre comprise & interessée celle déesse, que iournellement adorez, quelque part qu'elle reside, & fust-ce dans vostre cueur. Et quant à moy, ie sçay bien que i'aurois à dire, n'estoit que lon n'est receu d'auocacer en sa cause: Aussi que tel acte nous fut iadis deffendu, par voz belles ordonnances. Ma Damoiselle (respondit Monophile) n'a pas long temps qu'auex obuié à celà, lors que nous auex fait entendre, que n'estions point en iugement si scrupuleux: aussi qu'opugnant le seigneur Philopole, ne serez reputée maintenir vostre propre cause, ains bien la mienne, puis qu'il vous plaist me faire tant de faueur, d'ainsi l'estimer. Or doutoit fort Charilée, entrer en tel camp, par ce que iamais ne se mettoit en telle dispute (que celle qui sus l'heure s'estoit, à la suscitation de Philopole, présentée) sans outre-passer vn petit les bornes de raison, & se mettre à courir la poste, tant luy estoit ceste cause affectée. Au moyen dequoy

LE PREMIER LIVRE

Philopole pour l'ayguillonner d'auantage: Je voy bien (dist il) que pour ce coup demeurerez par faulte d'un bon cheualier, si vous-mesmes n'entreprenez la defense de vostre querelle, qui est de soy si hazardeuse, qu'à bon droit ne veult le seigneur Monophile passer la lice, pour entrer en ceste iouste, craignant estre mis hors les arçons. A quoy elle, d'une face toute transformée en vermeil, pour le sang qui illecq estoit monté, donnant assez d'aparence de sa colere: Non, non (repliqua-elle) seigneur Philopole, ne pensez emporter la victoire d'une querelle si auantageuse de mon costé, pour estre si iniuste du vostre. Et bien que par vostre entendement, pensiez renuerser l'imbecilité du mien, si opugneray-ie vostre dire, non souz l'apuy des forces de mon esprit (qui est nul) ains pour la validité de la cause, qui de soy-mesme se defend sans orateur ou auocat. Et puis que de ceste liberté que vous estes estudié attribuer à l'homme, estes descendu en plusieurs autres propos, assez lointains de la question qu'auiez en vostre esprit imaginée: aussi ne veux-ie faire mon conte vous satisfaire en ce dont la presente dispute s'est menee, ains à tout le surplus de voz raisons: A ce que ne pensiez m'auoir rien presté à credit, & que ie ne vous vueille

payer

Defence en
faueur des
femmes.

payer de monnoye, d'aussi bon ou meilleur al-
 loy que la vostre. Car s'il vous plaist conside-
 rer profondement la difference de noz deux
 causes, ie suis seure (& n'est ma fantasie vai-
 ne) qu'y trouuerez autant ou plus de distance,
 comme de l'ymage peinte, à la creature viue.
 Par ce que voz raisons estans fondées sus opi-
 nions mondaines, les miennes ne s'aydent &
 munissent que de la vraye & seule Nature.
 Laquelle comme vous pensez ne nous a exter-
 minées de tous actes vertueux & louables, non
 plus que les hommes, quelques cas qu'ayez vou-
 lu dire. Et qu'ainsi soit, representez vous de-
 uant les yeux vne administration de Republi-
 que, vn gouuernement de police, n'auex vous
 la Semiramis, la Tomiris, & infinies autres dont
 i'ay maintesfois ouy parler: qui non seulement
 par sagesse feminine, si bien establirent leur
 Monarchie & Royaume, mais aussi par vne
 prouesse plus que virile, guiderent de sorte leurs
 faitz d'armes, que leur posterité en a bruit &
 bruira tant que le monde sera monde? N'auons
 nous aussi vne Penthasilée? n'auons nous les
 Amazones, pour ce mesme respect de guerre?
 N'auex-vous en la poesie, Sapho? & mesme
 de nostre temps, haulte Dame & Princeesse feu
 de bonne memoire Marguerite de Valois? en

LE PREMIER LIVRE

Italie Vne infinité d'autres, dont les œuvres reluisent entre tant de bons & louables esprits? Demandez-vous l'éloquence fondement & appuy de toute Republique bien ordonnée? ne celebrent les anciens la Cornellia? la Hortensia? qui si bien s'en sceurent ayder entre les Romains, que par le commun accord des bien-disans, atteignirent au parangon des plus grans Orateurs de Rome? Et est chose trop assurée qu'encor' en eust-on trouué en ceste part d'auantage, sans l'enuyeuse loy des hommes, qui cognoissant le grand esprit des femmes, despourueu neantmoins de force corporelle (ainsi que nous voyons ordinairement les petis poisons estre deuorez par les grans) leur interdit plaidoyers & administration d'estatz politiques. Mesmes nous publions de si fragile esprit, iusques à nous deffendre donaisons, & alienations de noz biens, sans l'expres consentement de noz maris. Et non-obstant ce, vous voyez les bonnes & grandes maisons iournellement decliner & ruiner par la bestise ou prodigalité des hommes: au contraire l'augmentation & entretenement d'icelles, proceder du bon mesnage & sagesse des femmes. Qui me fait penser que là ou il leur seroit loysible appliquer leurs esprits à telles faciendes que les vos-

stres

stres (si ainsi est que l'ordre d'une Republique fraternise avecques celui d'une maison) par mesme moyen pourroit guider & dresser les affaire d'une ville . Et pour me deporter des exemples des Etniques: voulez-vous estat plus grand que le pontificat de Rome? auquel toutes-fois auons leu une femme souz habit viril, s'estre maintenue autant galamment que la plus part de ceux qui depuis luy ont succédé . Mais quoy? encore fut il necessaire, & à elle, & à la sus-mentionnée Semiramis, pour contenter le monde, & obuier à ceste opinion du vulgue, se desguiser souz vn habillement d'homme: souz lequel tant qu'elles furent masquées, rien ne leur estoit mal fait, tout vertueux, tout magnanime: mais incontinent qu'elles tomberent en la cognoissance des hommes, & qu'on les recogneut pour femmes, à vn instant fut amortie & estainte leur prouesse, vaillantise, vertu, & sainteté, qui tant s'estoient en elles trouuées recommandables . Tant à esté & est grande l'enuie des hommes encontre nous: lesquels cognoissans que possible par la sagesse des femmes pourroient perdre tout leur credit (à l'imitation des tyrans, qui defont & destruisent tous ceux dont ilz craignent) nous ont frustrées de la possession qui nous apartenoit, com-

LE PREMIER LIVRE

me à eux. Je ne doute point que sur ce ne vous aydiez que l'une & l'autre des deux femmes par moy & dessus alleguées, descouurit à la parfin sa folie, l'une par la lubricité qu'elle preten-
doit en la personne de son filz, & l'autre par sa grossesse: car tel est le commun dire des hommes, qui par ceste seule raison pensent triompher de nous autres. Mais, ô quel diuin argument! ô quelle subtilité digne de tout vostre sexe! comme si ceux, lesquels plus vous celebrez par voz escritz, soit en vaillantise, ou sagesse, ne sont tombez en telz desarrois & defaulx! Je n'allegueray vostre Hercule, par le moyen duquel à bon droit vous pourriez vous vanter auoir occis tous les monstres de ce monde, si luy mesme se fust tué, lors qu'au lieu de sa massue on luy vit manier le fuseau. Je n'allegueray vostre idolatre Salomon, seul parangon toutesfois (comme on estime) de toute sapience humaine: trop & trop en bruyent les histoires. Laissons doncques si sottes opinions, autant desauantageuses à vous comme à nous: Voire si de bien pres considerez plus en vostre preiudice, ayans esté crééz de Dieu (comme en tous lieux publiez) d'un cerueau plus sain & solide, que tout le reste du monde. Et pource, retournant à mon propos de l'opinion, & de la Nature: vou-
lez

leꝛ-vous plus sage Philosophe que Socrates? lequel toutesfois ne se taisoit de l'iniure & tort qu'on nous faisoit : nous reputant capables de toutes vertus & sciences, comme les hommes. Demandez-vous vn autre Socrates? Licurge? qui par ses loix accoustumoit les femmes à tous faitꝛ d'armes, & autres telꝛ excercices que vous autres estimeꝛ virilꝛ : au lieu desquelꝛ neantmoins n'auons pour recompense que la quenoille. Quoy? si ie vous monstre qu'au temps passé en Licie, les hommes exerçoient tous les actes, que pour le iourd'huy estimeꝛ feminins, tel exemple ne sera-il suffisant pour vous donner à cognoistre telle chose ne gesir qu'en opinion mondaine? Il ne fault doncques point, seigneur Philopole, penser que Nature nous ayt priuez non plus que vous autres de telꝛ actes, ains vostre tyrannie sans plus, estans noꝛ espritꝛ susceptibles de toutes telles sciences que les vostres. A l'heure Philopole: Vous m'induissez presque à le croire, dist-il, encore que ce soit quelque peu contre ma volonté. Mais vostre parole fortifiée & munie de si viues raisons & exemples, lesquelꝛ iamais ne me fusse persuadéꝛ tomber en teste de femme, me feront estre paraenture des vostres, Et vous diray d'auantage (dist il d'vne grace assez hon-

LE PREMIER LIVRE

neſte) que par moy en ma Republique , ſerez
 quelque iour installée, pour preſider, non es cho-
 ſes concernans le fait des femmes (comme ia-
 diſ ſit *Heliogabale* Empereur Romain , à ſa
 mere) ains es affaires & negocies plus arduz
 & neceſſaires, pour l'entretienement de mon e-
 ſtat . Il y en a de trop plus capables que moy
 pour tel effect , reſpondit-elle, quand ſerez en
 ceſte peine. Vray que ie ne ſay doute , que ne
 trouuiez eſtrange, reuenant à la commune opi-
 nion du vulgue, le peu que i'ay diſcouru: ſi vous
 veu-x-ie bien auifer, qu'encores que par vous
 hommes nous ſoit deſſendue & prohibée la
 lecture des bons autheurs , i'y employe touteſ-
 fois la meilleure part des mes heures . Auſſi
 pour communiquer quelquesfois avecques gens
 doctes, & verſez en toutes bonnes lettres &
 diſciplines. Ie croy , ma Damoiſelle , diſt *Mo-
 nophile* , qu'il n'y a celuy en ceſte compagnie,
 qui ne trouue voꝝ propos bons , comme proce-
 dans d'un bon cerueau. Et certes pour autori-
 ſer voſtre dire, ſans chercher exemples ſorains,
 vous deuiez ſeulement mettre en champ , pour
 confondre l'opinion de ceux , qui ſi temeraire-
 ment vilipendent voſtre ſexe. Car en ce euſſiez
 ſeruy d'un bon *Achilles* pour toutes les autres.
 Et quant à moy, pour vous donner à cognoiſtre
 de

de combien suis different de vostre opinion, ie dy
 & croy asseurement (suivant ce que si bien a-
 uez maintenant deduit) telle auoir esté la cau-
 se, pourquoy les Poetes du temps passé, attri-
 buans à toutes choses du monde leur propre &
 peculier dieu, ne les voulurent desgarnir de dé-
 esse. Et establirent au fait de guerre Vne Bel-
 lone aussi bien que le Dieu Mars, Vne Pallas
 sus la science comme Vn Mercure, Iunon sus les
 richesses aussi bien qu'un Plutus, en l'Amour
 Venus comme Vn Cupido, & sus la poesie les
 neuf Muses, tout ainsi que le Phœbus: nous
 voulant monstrier souz le manteau de poesie,
 les espritx des femmes, comme des hommes,
 estre capables de tous artx & sciences, &
 autres choses qui peuuent tomber en l'esprit de
 l'homme. Voire & d'un poinct d'auantage:
 d'autant que Nature leur defaillant en force
 corporelle, les auroit voulu recompenser en
 abondance d'esprit: n'estant empesché, ny voy-
 lé d'une si pesante masse de terre comme nous,
 mesme estans yssues de matiere plus purifiée
 que ne sommes, pour auoir pris leur origine de
 nous, & nous immediatement de la terre gros-
 siere, & sans aucune forme. Qui est veritable-
 ment Vn mistere qui nous doit assez figurer,
 quel chef d'œuvre voulut faire Nature, lors

Suite de la
 louange des
 Dames.

LE PREMIER LIVRE

qu'elle nous bastit la femme. Car tout ainsi que lon voit dans les alambicqs, s'extraire de matieres grossieres, eaux souefues & delicates, non pas en si grand quantité: aussi estant ceste femme quasi alambiquée de ce corps massif de l'homme, tira quant & soy le meilleur, ne luy laissant rien de reserve, que le terrestre (qui fut la force, comme à tous animans) & s'emparant du hault & magnanime courage en toutes choses vertueuses. Surquoy aiousta Philopole: vous dites vray: car Dieu ayant voulu tirer ceste femme des parties ou reposent les affections en nous, en voulut desgarnir l'homme, pour en façonner la femme. Parquoy l'ayant pourueue d'une aigre & vehemente colere, & d'infinies passions, fut par mesme moyen besoin la destituer de force. Autrement se fust trouué en elle vn animal plus violent & furieux (& dist Philopole ceste parole l'accompaignant d'un souriz de bonne grace) que le Lyon, qui dedans soy rongé vne perpetuelle ferocité. Ce sont propos, repliqua Monophile: d'autant que Nature, ayant mis en ceste femme vn si excellent courage, & ne voulant defaillir en cest endroit en aucune partie ne la voulut par mesme effect munir de telle chaleur que nous autres, pour la rendre en ce hault cueur plus atrempee. Par ce

que

que comme nous voyons les ieunes gens plus temeraires & enflambez que les autres, & quasi demy furieux, pour l'abondance du sang & de la chaleur qui domine en eux : au contraire les vieillartx estre beaucoup plus posez, d'autant que la fontaine des passions, qui en partie tire sa nourriture du foye, commence à diminuer, & deuenir imbecille : aussi desirant ce hault Dieu descouvrir son inestimable puissance en la personne de la femme, la voulut rendre par ceste deffectuosité de chaleur, comme lon peut voir à l'œil, aussi auisée en sa ieunesse, que les plus vieux & anciens de tous les hommes. Vray que pour estre garnie d'un pur sang & subtil, tousiours demeure en elle le courage, mais non un courage temeraire, comme de nostre auenglée ieunesse, ains en tout & par tout conduit par vne certaine prudence. De sorte que si de bien pres regardez, trouuerez les meilleures & principales Monarchies, auoir esté instituées, ou conseruées, par la sagesse, ou magnanimité des femmes, ou pour le moins par leur moyen, quasi d'une influence celeste: & au contraire, celles qui par le moyen des hommes trouuerent acheminement, de nulle, ou petite entretenue, ou bien des leur premiere entrée auoir pris nom de tyrannie, combien que ie n'ignore

qu'il n'y ait regle si generale qui n'emporte son exception. Et à fin, ma Damoiselle, que ie ne repasse par voz traces, en celle Semiramis, dont tant à propos vous estes voulu ayder : n'ouurit elle toutesfois le chemin, pour rendre ses successeurs Monarches, iusques à vn Sardanapale, qui par ses ordes & monstrueuses voluptez ferma la porte à ses suiuez, donnant occasion aux Medes d'enuahir l'empire sur eux ? De laquelle seconde Monarchie, toutesfois ie ne suis delibere parler, pour le peu d'estime qu'en font tous les Historicographes. Mais si voulons descendre aux Perses, qu'elle chose leur apresta commencement, pour dominer sus tant de peuples, sinon la brauade des femmes ? Lors que toute ceste nation (sous la conduite d'un Cyrus) se voulant guarentir par la fuite, de la fureur d'Astiage Roy des Medes, les femmes honteuses de l'infamie de leurs hommes, sortans de la ville, en laquelle ils pretendoyent se sauuer, se presenterent au deuant, & se rebroussans tout à plain, leur demanderent s'ilz vouloient y'entrer au lieu dont ilz auoient pris leur naissance : au moyen dequoy tous confuz, retournans face aux ennemis, les rangerent d'une si viue façon qu'ils les mirent à vauderoute. Et de là en auant eurent tousiours du meilleur, se fai-

faisans paisibles possesseurs de la plus grand' partie du monde. En memoire dequoy, & quasi pour eternal Trophée, fut ordonné que desque Vn Roy entreroit dedans la ville, dont les femmes estoient si valeureusement sorties, baille- roit à chaque citoyenne de ce lieu, quelque cer- taine somme d'argent, ainsi que la loy portoit. Quoy? ne fut ceste Monarchie par le moyen d'Alexandre, transportée aux Macedones? Voyez doncques, ie vous suply, de quelle durée elle fut: prenant commencement en luy, & en luy mesme terminant. Et pourquoy doncques? par ce que contre l'ordonnance des cieux, luy comme homme, auoit voulu entreprendre de sub- iuguer tout ce monde. Ainsi se trouua à Vn in- stant quasi par eschantillons diuisé l'Empire, que celuy que nous reputons plus vaillât de tous les autres, auoit avec si grans trauaux & fa- tiques conquesté. Mais que fault-il que ie m'ar- reste en cest endroit? quelle Republique se trou- ue plus magnifique que la Romaine? laquelle le- uant la teste sus toutes autres, se peut vanter auoir esprooué toutes manieres de gouerne- mens politiques. Qui fut toutesfois la source de son ancien estre, sinon les bonnes matrones de Troye? lesquelles abordées vers la coste d'I- talie, estans leurs maris allez au pourchas des

LE PREMIER LIVRE

viſtuelles, toutes d'un commun accord pour leur repos, & quaſi profetiſant non ſeulement leur grand bien, ains de toute la poſterité, s'auſerent de bruler leur vaiſſeaux & nauires. Ce qu'ayans mis à execution, par le conſeil d'une nommée Rome (en commemoration duquel fait la ville de Rome emprunta depuis ſon nom) donnerent occaſion aux Troyens, de dreſſer en ce lieu leur reſidence. Ainſi commencerent à eſtablir Roys, leſquelz ſortiſſans diuers noms & qualitez, comme d'Albanie, puis de Rome, ſe trouuans par ſucceſſion de temps abuſifz, encor permit le deſtin, qui couuoit en ſoy nouuelle forme de Republique, que par le moyen de Lucrece violée par un Tarquin, ſe changea ceſte Monarchie en un eſtat populaire, tel comme depuis fut obſerué par l'eſpace de cinq cens ans. Or fut à la verité, telle eſpece de Republique introduite, non par ſageſſe ou conſeil des femmes: mais encore voulut Fortune, que ſus elle tombaſt le ſort, pour inſtituer ceſte ville en autre forme plus profitable pour le commun. Et toutesſois, comme ne peut aucune choſe eternellement demourer en ſon entier, venant icelle Republique en corruptelle, par les ambitions & faueurs des Potentatz: la peruerſité de leurs meurs requérant nouuelle police, fut ſuſcitée

suscité Iule Cesar qui par vne haulte hardiesse, peruertissant & preposterant toutes les loix anciennes, retourna l'ordre de ceste ville en Monarchie: mais quelle Monarchie dirons-nous? ne fut cest empire Romain vne perpetuelle tyrannie, desguisee quelquesfois & masquée par la bonté de quelques vns, qui contre leur volonté, estoient semons & appellez à ceste dignité de Empereur? Aussi n'estoit-ce pour les hommes que les cieux aprestoient telles reformatiōs. Et à fin que ie ne m'estrange des bornes de nostre France, ne s'est trouuée depuis six vingts ans en ça vne pucelle, qui (mandée par prouidence diuine) seule se trouua suffisante, pour nous garentir du ioug de la seruitude, souz laquelle sembloit que nous autres fussons ia tous redigez? En façon qu'il semble que Dieu ayt reserué aux femmes la meilleure partie des victoires, pour ne nous laisser iouyr que du peu de leur demeurant. Voyez doncques, ie vous pry messieurs, si à tort tous noz ancestres voulurent deprimer ce sexe, pour penser donner illustration au nostre, lequel (pour ne deguiser verité) de cinq cens ou mile pas pres n'aprouche de son excellence. Adoncq' Charilée: Ie vous en sçay bon gré, dist elle, & ne fouruoyez en rien de voz bonnes & louables constumes, aussi ne

LE PREMIER LIVRE

vous eu-^{ie} oncques qu'en reputation & estime
 d'homme courtois. Toutesfois pour paracheuer
 ma carriere, & parfournir au surplus du pour-
 parler de Philopole: lequel tendoit à prouuer,
 la chasteté estre plus requise aux femmes que
 aux hommes: Je sçauois volontiers de vous, sei-
 gneur Philopole, par quelle loy auez plus tost
 receu tel priuilege, que nous autres? Est-ce par
 la loy diuine, qui abhorre autant le peché con-
 traire à chasteté en l'homme, qu'en la femme?
 Est-ce par statut humain? lequel ne sçauriez al-
 leguer en mon preiudice: aultrement soustien-
 driez en ceste cause, l'estat de iuge & de partie.
 Et toutesfois puis qu'ainsi vous est agreable ie
 ne contrenuiendray à vostre dire: Non pourtant
 que ie vueille tel auantage (car ainsi l'estimé-
 ie) estre causé par obligation ou loy naturelle,
 comme semblez maintenir, ains par vne cer-
 taine honnesteté, laquelle les femmes se propo-
 sans deuant les yeux, se sont tousiours plus e-
 studiées à contregarder leur honneur & cha-
 steté, que les hommes, qui à toutes heurtes &
 propos, s'imputent à grand louange, prester leur
 cueurs à credit. Or si par nostre prudence &
 sagesse, auons appris à refener & cohiber noz
 concupiscences charnelles, & vous autres hom-
 mes estes en possession immemorale, aualer
les

les resnes à voz desirs à l'habandon, & à l'endroit de la premiere qui s'offre: Si ne permet-
 tray-ie toutesfois qu'en matiere d'Amour, ayez ^{Qu'il ne}
 aucune prerogative par dessus nous: ains diray ^{fault prero-}
 plus (s'il est requis en ceste part que nostre dis- ^{gative en}
 pute s'estende aux opinions du monde) que, puis ^{amour.}
 que par le commun consentement du peuple, la
 femme est tousiours estimée auoir le dessus &
 auantage sus celuy qui luy fait la court (e-
 stant apellée maistresse, luy seruiteur) tel doit
 beaucoup plus craindre forfaire à l'endroit de
 sa Dame, que non pas elle enuers luy. Car ain-
 si me sera-il permis vous opugner en ceste part.
 Qui soit vray, n'est-il raisonnable que le mai-
 stre ait plus de licence & liberté en tout &
 par tout, que celuy qui fait l'estat d'un serui-
 teur? Et toutesfois pour ne vouloir adherer à si
 sotte opinion, quant à moy, ie ne me puis & ne
 veux persuader, qu'en Amour l'un puisse ou
 doye auoir plus de puissance que l'autre. Le
 tout desirant estre mutuel & reciproque: &
 ne l'estant, desia commence cest Amour à fail-
 lir, & manquer d'un pié, & à peine que ia-
 mais il sortisse le sommet de perfection. Car là
 ou la femme n'est en son endroit si troublée ou
 tourmentée que l'homme, ou au contraire l'hom-
 me que la femme, bien qu'ils se cherissent l'un

LE PREMIER LIVRE

l'autre, tant s'en faut que telles caresses meritent le nom d'Amour, que c'est pure & Vraye simulation, menée par vn ie ne sçay quel ayguillon, qui n'est neantmoins de durée. Pensez vous que ie face conte de celle femme, qui voyant vn pauvre amant passionné extremement pour son Amour, tantoſt l'acareſſera, pour mieux l'atraire dans ſes lacs, puis ſoudain changeant de chance, tournera la charue contre les bœufz, luy dardera vn cil d'œil accompagné d'un ris friant, & à l'inſtant recevra mille bonnetades de luy, ſans daigner aucunement tourner ſa veue vers luy. Tant s'en fault que ie priſe ou loue tel acte, que ſ'il m'eſtoit permis preſider en ceſte cauſe (comme m'a voulu eſtablir le ſeigneur Philopole) ie l'exterminerois & bannirois de la compagnie de toutes honneſtes Dames. Je ne nye pas que par-fois ne ſoyons contrainctz recevoir telles perturbations en Amour, qu'il nous eſt impoſſible telles-fois à, accueillir ou careſſer noz Dames, ou amis, ainſi que de couſtume: mais telle choſe ne doit tomber en noſtre cognoiſſance, & proceder par vn ſaint artifice, pour mieux leur donner martel, ains par vne certaine inſtigation naturelle, ſuſcitée d'un extreme Amour, ſouz lequel ſouvent ſont comprises, crainte, & douleur. Je dy

cecy, messieurs, contre l'opinion de ceux, qui me semblent temerairement pretendre quelque inegalité en Amour, laquelle iamais ie n'admettray, & ne permettray que la femme soit appelée maistresse de l'homme, que semblablement il ne soit dit paisible possesseur, & seigneur du cueur de la Dame. Et par mesme moyë maintiens-ie, quelque cas qu'il plaise au seigneur Philopole, n'estre plus loysible à l'homme, qu'à la femme, souz pretexte d'une sotte opinion conceue entre les hommes, se communiquer en plusieurs endroitz. A quoy ie suradiousteray:

Opinion la pouuez-vous bien appeller, ma Damoiselle, & non Nature, quelque chose que tout le vulgaire en estime. Et pour le vous monstrer plus à veue d'œil, seigneur Philopole, ie vous suply considerons vn Solon vray imitateur de Nature: ne permit-il par ces loix (comme quelqu'un de ceste compagnie disoit n'a pas long temps) à la femme non pouuant concevoir de son mary, susciter sa generation par autres moiens & aides? Et toutesfois vous dites estre chose si naturelle, que la femme ne participe que d'un seul. Qui vous allegueroit vne Chipre, pais auquel les filles gaignoient leur douaires à la sueur de leur corps, diriez-vous nostre coustume estre plus tost fondée sus Nature, que

Que l'homme
neur des Da
mes ne gis
qu'en opi
mon.

LE PREMIER LIVRE

celle là? Si ie vous allegue vn Platon qui voulut en l'vne de ses Republiques, les femmes estre communes, n'asseurerex-vous vostre dire sus mondaine opinion? Veu que ce grand Philosophe pensoit en tout se reigler selon les raisons de Nature? Or ne me plairoit telle loy, dist la Damoiselle (bien que peust estre elle se trouuast soustenable: mais à cause de la confusion des enfans, pour ne les pouuoir recognoistre en ceste qualité) non plus que le requisitoire des bonnes matrones de Rome du temps de Papirius, qui pretendoient auoir deux maris. Telles souhaitoient partrop satis-faire à leurs desordonnez apetitz. Vous voyiez toutesfois, dist Philopole, à quelle instance ces bonnes Dames importunerent le Senat pour ce regard. Et encor ne scay si elles se fussent contentées de deux maris, ains croy qu'elles fussent à la longue tombées au mesme desarroy, ou cheurent toutes ces femmes qui passerent par les mains de ces deux Cheualiers errans, Astolphe, & Ioconde, representez dans cest excellent Homere Italien Arioste. Vous vous abusez, repliqua Charilée, si toutes ces Dames eussent esté esprises de tel Amour dont nous parlons, iamais ne fussent succumbées. Et à dire le vray, vn seul bien-aymé & affecté nous causera plus de contentement,

tement, que cent autres par maniere d'aquit. En voulez-vous meilleur exemple que du lieu mesmes qu'alleguez? Cest Astolphe & Ionconde ne choysirent-ils pas en fin de ieu vne Dame, pour eux deux par mesme accord en elle se contenter, & neantmoins vn petit quidam qui en ce les auoit preuenus, quoy qu'ils fussent diligens & entendus à leur affaire, leur faucha l'herbe sous les pieds. Et pourquoy? l'Amour y auoit ia fait par ses embusches, conqueste. Mais encor tel propos ne me tousse, & ne veux sortir hors les rangs de ma dispute commencée, qui tend seulement à ceste fin, que combien que ie ne vueille la femme estre à vn chacun communicable, si ne veux-ie pourtant que pensiez telle chose se causer plus par vne naturelle raison, qui vous doyue estre auentageuse en nostre preiudice, que par vne bonté & sincerité de cueur qui là nous guida: & depuis s'imprima de sorte es esprits de tous les hommes, qu'ils estimerent forfaiture en cas qu'y contreuinsions. Chose toutesfois qui nous doit redonder, non à tel dommage que nous voulez moyenner, ains à tout honneur & profit. Sur ce Glaphire: A vostre honneur, dist il, redonde-elle veritablement, ma Damoiselle: mais quant à moy, ie croy telle loy n'auoir ia-

LE PREMIER LIVRE

mais esté constituée, qu'à nostre tresgrande confusion. Et ne voy point autre chose pourquoy vne femme soit caressée, & courtesanée par tant d'honnestes personnages, sans pouuoir at-
tandre au dessus de leurs desseins & pro-
getz, sinon souz l'ombre de ceste malheureuse
loy, faite en despit, & de l'homme, & de la
femme. D'autant que la femme, craignant en-
courir blasme & deshonneur enuers le monde,
ne s'oze departir à ceux qui luy font l'Amour,
sinon par tresgrand' astuce. Je ne sçay comme
l'un & l'autre conceuez ceste opinion, dist
Philopole, toutesfois il me semble qu'au propos
sus lequel nous sommes, Nature seule nous y in-
struit, & non humaines ordonnances. L'exem-
ple de tous animans nous en peut en ce rendre
sages, esquelz voyons le masle tousiours pour-
suyre la femelle, sans qu'elle (sinon par longue
poursuyte) se rende à luy volontaire. Qui nous
peut assez aprendre, qu'il ne faut la femme es-
tre si familiere en telle chose, que l'homme.
Vous en pëserez tout ainsi qu'il vous plaira, re-
pliqua-elle, toutesfois puis que desirez vous en-
doctriner par les bestes, aidez-vous de la Tour
terelle, & suyez en ce son exemple, laquelle
(soit le masle, soit la femelle) ne s'attribue au-
cune prerogative au desauantage de l'autre. Et

là ou

là ou ne vous agréra tel exemple, vous en pourrez abuser tout ainsi qu'il vous plaira, & cognoistrez en fin du ieu quel guerdon & recompense receurez de celle à qui seule faindrez dedier vostre cueur, si iamais elle s'en peut apercevoir. A ce mot mit fin la Damoiselle, non ennuyée ou fatiguée du long parler, ains par ce que Philopole d'une legereté assez prompte luy entre-rompit son propos. Chose non moins desplaisante au reste de la compagnie qu'à moy-mesme, qui admirant la promptitude & le sçavoir de ceste Dame, quasi tombant en extase: O cerueau (dis-ie lors en moy-mesme) non point feminin, ains plus que diuin & celeste! à present nous fais-tu cognoistre, & en murmure qui voudra, par la splendeur de ton esprit, que non seulement donneras embellissement à ton sexe, ains obscurciras le peu de lumiere, qui estoit resté au nostre. Et combien qu'en tout ce traité, ie ne me soye en partie proposé que servir d'un bon & fidelle secretaire à si honnestre compagnie, sans iouer autre personnage: Si est-ce que, desirant faire profit à un chacun en ce que ma possibilité s'estend, puis que ce lieu le requiert, ie ne veux passer ce pas (& peut estre ne sera il hors propos) sans vous prier, mes Dames & Damoiselles, qui faites profession & de

Auertisse-
ment aux
Dames.

LE PREMIER LIVRE

l'honneur & de vertu, vous mirer & prendre exemple en ma Charilée. Vous rendans aussi curieuses de sçauoir, comme elle s'est fait aparoir à ceste heure, par les discours qu'elle nous a poursuyuis. Vray que ie ne fay doute, que possible, entre autres propos, quelques-uns ne soient estimez mal employez en sa presence, pour l'honneur & pudicité de son sexe, comme aussi d'auoir esté le premier motif des propos qui en faueur d'Amour furent lors mis sus les champs: mais ie maintiendray pour elle, n'estre moins louable vouloir descouvrir la propriété de l'Amour, au quel Nature nous cache vn taysible enseignement, des le commencement de nostre aage, que par vn faint artifice, nous instruire & enseigner vn orateur, ou medecin, lesquelz quelquefois furent dechassez & deboutez des Republicques, comme peruertisseurs & corrupteurs, l'un des corps, & l'autre des espritz & bonnes meurs. Là ou l'Amour estant empraint & engraué en nous d'un si excellent maistre & ouvrier, tousiours a eu domination sus tous: par luy eut le monde naissance, en luy eut accroissement: par luy arbres & choses non sensitiues semblent prendre leur augmentation de l'un à l'autre. Qui sera doncques celuy qui trouue mauuais le desir que ma Charilée

rilée auoit, ſçauoir ſa condition & Nature?
Qui ſera auſſi ce mal raboté perſonnage, qui ne
cognoiſſant le bien que de moy il reçoit, pour a-
uoir enreſtré leur diſcours, m'impute à vice, le
peu que i'en ay eſcrit? Ie ne ſuis encor' à penſer,
que ceux qui de moy, auront cognoiſſance, ne
dient ces propos eſtre mal conformes à l'eſtat,
que de tout temps ie me ſuis progetté de ſuy-
ure. S'ils ne ſont decentz à l'eſtat, pour le
moins ſont ils conuenables à mon aage, qui de-
uant ſon temps ne veult participer de vicilleſſe.
Ains me metz au rang des plus heureux de
ce monde, puis que ç'a eſté le bon plaſir du puis-
ſant Dieu Amour, me choiſir de ſi bonne heu-
re des ſiens, pour m'inſtruire & acouſtumer à
ſes armes : leſquelles me ſeront plus ſuporta-
bles à l'auenir, que ſi ſus le temps auquel m'euſt
eſté beſoin vaquer à quelques autres facien-
des, m'euſt fallu eſtre de ſa ſuite. Penſez qu'il
eſt bien ſeant à vn vieillart faire l'Amour! Et
toutesſois, mes Dames, croyez moy comme
celuy qui pour rien n'entreprendroit vous men-
tir, & qui le ſçait par maintz exemples, A-
mour eſt de ſi eſtrange & hagarde Nature,
que ſi le meſpriſons ſus noz tendres ans, lors
que commençons entrer ſus l'aage, deſployant
de tout poinct ſes forces, nous fier d'une ſi af-

LE PREMIER LIVRE

pre pointure, pour faire aparoir sa puissance, qu'à la tresgrande irrision de ce monde faut que marchions souz ses estendars. Et si est d'une si douce clemence, qu'apres auoir eu à sa soude des la ieunesse vn bon & loyal seruiteur, quand il cognoist venir à plus grande maturité (à l'imitation des bons soldatz antiques qui apres plusieurs bons & agreables services faitz à la Republique, estoient affranchiz, & immuns de tous telz fais de la guerre) nous donne quelque relache & consolation: pour se monstrer n'estre si impiteux & cruel, comme beaucoup de gens l'estiment, lesquelz si ne l'ont esprouué, en feront quelque iour l'essay, Et de ce en supliroy celuy Dieu, qui fut le premier suscitateur de faire employer ma plume à ses armes, si aucun mal-vueillant se r'encontre qui les treuve de mauuaise digestion. Mais ou me pers-ie icy, & egare-ie en chose parauenture vn peu aliene de mon but? En bonne foy pour ne me vouloir mettre en oubly, presque me suis-ie oublié: & ne sçay en quel poinct ie laissay mes combatans, souz l'intention de vouloir moy-mesme deffendre. Si ie ne m'abuse, la plus grand' partie des propos qui sont passez, me semblent s'estre arrestez sus ce poinct de loyauté, laquelle Philopole ne vouloit estre si requise

requise en l'homme, comme en la femme. A cause dequoy Charilée d'une assez petite colere, luy auoit souhaité tomber quelque iour en femme, qui de luy n'eust aucun mercy. Mais Philopole, esperant luy rendre change de mesme monnoye, luy respondit. Je suis, ma Damoiselle, graces à Dieu, hors ces termes, & n'y voulu oncques entrer. Par ce que tousiours telle a esté mon opinion, estre chose impossible faire d'un commun un particulier & propre, & que là ou la femme auroit esté tant hardie, de faire part de son corps à aucun, le semblable pourroit elle faire à l'autre, puis à un autre, & ainsi à l'uniuersel. Mais Monophile prenant encontre luy la querelle: He Dieu (dist il lors) ia ne vous permettray en ma presence, si auantureusement blasphemer, sans vous remettre en bonne voye. Comment donc, seigneur Philopole, l'entendez-vous, faire d'un commun un propre? Cestuy est le commun erreur du peuple, qui pense sacrifier Amour, par ceste seule raison. Comme s'il estoit impossible que loyauté peüst iamaïs seiourner en la teste d'une femme. Qui vous allegueroit sur ce une infinité d'honnêtes Dames, lesquelles nous lisons dans les hystoires, auoir consacré leur honneur en un seul endroit, ie croy que tiendriez celà pour faulx, ou

LE PREMIER LIVRE

telles Dames pour monstrueuses. Pour monstrueuses dy-ie, les estimeriez-vous: vous qui en voz propos, iamais ne passastes tel destroit: mais quant à ceux, qui y habitent, ie me feray bien fort pour eux, qu'il n'y á celuy qui ne presume plus tost la loyauté en sa Dame, que trahison, ou forfaiture. Aussi tel argument ne me semble valable, pour impugner le Vray Amour. S'ensuyt-il, ie vous suply, que si mon cueur s'est adressé en vn endroit, il se doye pour ceste cause diuiser en diuers lieux: mais au contraire il me semble, que d'autant que naturellement s'est encliné en vne part, cela seul estre suffisant obstacle, pour le distraire de tous autres endroitz: ayant imprimé dans soy ce Vray Amour: duquel n'agueres nous parlions. Voir, que pour vous dire le Vray, ce degré de priorité, à mon auis est seule cause, pourquoy nous voyons iournellement tant de pauvres amans souffreteux ne toucher au but de leurs intentions, par ce que temerairement adressent leurs vœux & offrandes à Dames, qui estoient vouées à autres saintz. Pour ne tomber doncques en tel danger (dist Philopole se souriant) il vault beaucoup mieux m'en deporter, ainsi que i'ay fait au passé: par ce que de ma Nature ie suis impatient, n'ayant ce que ie demande:

ou si

ou s'il me fault faire l'Amour, ie la feray aux
 endroitz, ou ie n'auray occasion de me plain-
 dre. Vous en parlez tout à vostre aysé (dist
 Monophile) & ceste seule parole nous donne
 assez ample demonstration, que ne sçauex que
 c'est Amour. Vous ne voulez point aimer,
 dites vous, & si aimez, voulez choisir Da-
 me, qui soit à vostre commandement. Pleust
 ore à Dieu, seigneur Philopole, que le choix en
 fust en noz puissances. Vous ne voulez point
 aimer, & toutesfois lors que penserez estre
 le plus esloigné de l'Amour, vous trouuerez
 si surpris, que maugré-vous, serez matté de
 telle sorte, que changeant de propos vous fau-
 dra faire penitence du blaspheme ou mainte-
 nant estes trop indiscrettement tombé. Et qui pis
 est, r'encontrerez si mal, qu'aimant à outrance
 & desesperément, peult estre ne serez aimé.
 Voilà le pis, respondit Philopole, que i'y treu-
 ue qu'aimer (comme dit le vau deuile) sans
 party. Ce neantmoins si est-ce chose seure, quel-
 que cas que disiez, que ie ne m'induiray si tost
 aimer vne femme laide, que celle que verray
 douée d'une extreme beauté, & bonne grace.
 Pour autant que naturellement plus nous ape-
 tons le beau, que le laid. A quoy Monophile:
 vous dites vray, dist-il, mais gardez que vou-

L'Amour
 n'estre en
 nostre choix

LE PREMIER LIVRE

lant entreres reigles de Philosophie , ne chop-
piez en l'equivoque. Car lon ne vit iamais amât,
qui ne trouuast ses Amours belles. Et bien que
se treuuent les aucunes Dames plus excellem-
ment parfaites , que les autres , si croy-ie que le
petit Berger, ou paisan, ne vouldroit habandon-
ner sa Catin , pour toutes les Dames de France.
Et pourquoy doncques ? pource que celle part
son cueur repose : pource que celle seule , en sa
simple rusticité , luy aparoist plus belle & ex-
cellente , que tout le reste des autres qu'on luy
pourroit presenter . Ainsi doncques peult estre
n'est il moins studieux que vous de la beauté:
mais son esprit estant fisché & arresté en vn en-
droit, par vne opinion qu'il en a conceue (com-
me n'agueres nous deduisoit le seigneur Pas-
quier) encores que toute l'inciuité, & discour-
toisie du monde residast celle part, si ne luy sem-
blera le tout partir que de bon lieu & bonne
grace . Et voulez-vous meilleur exemple, que
celuy de l'Angelique , figurée dans l'Arioste
en son furieux ? Elle qui auoit esté aimée,
poursuyuie, & caressée par vne infinité de plus
braues & meilleurs Cheualiers de l'vniuers,
sans d'eux auoir aucun mercy : en fin lors que
plus se pensoit exempte de passion, se trouua si
forcée pour vn petit Soldat, non comparable
d'vne

d'une minime avecques les autres, qu'elle mesme eust volontiers fait le deuoir des hommes aux femmes, qui est, le requerir. Que voulez-vous donques? Et vouloit Monophile poursuyure son propos: mais Philopole luy trenha chemin. Je vous suply, dist il, seigneur Monophile, ne passez plus outre: car il semble que doutiez en moy vne chose, dont vous-mesme nous voulez icy offusquer, c'est l'equiuoque. Car par cest exemple qu'alleguez, ne nous voulut iamais enseigner autre chose l'auteur du Furieux, sinon la naturelle inclination de la femelle, n'estre de choisir le meilleur (comme fait l'homme) ains tousiours s'adresser au pire. Ainsi que nous voyons la Louue entre vne infinité de Loups, choisir tousiours pour sien, celuy que elle verra moins refait de toute la compagnie. Au semblable verrez-vous la femme dissimuler, vne Penelope, premier que se rendre bienueillante de quelque honeste personnage, mais aux lieux les plus couuertz & cachez se soumettre à la volonté de quelque valet d'estable, ou quelque souillard de cuisine. Or si ainsi prenez, pour le regard des femmes seulement, ceste inclination, & opinion, dont tant nous auex parlé, bien me rendray-ie des vostres: mais non autrement. Pardonnez-moy, seigneur Phi-

LE PREMIER LIVRE

lopole, repliqua sur ce Monophile, vous, & tous ceux qui mettez sus les champs la Louue (au desauantage de la femme) entendez assez mal sa Nature. Car au lieu que l'aleguez en detestation de ce sexe, il me semble, souz correction, cestuy estre l'animant entre tous les autres, qui plus nous apprend à aimer, & à la complexion duquel plus nous nous deussions ranger (si l'aimer estoit en nostre puissance) Sa-
 vous pourquoy? Par ce que la Louue poursuy-
 uie par plusieurs Loups, veritablement entre
 vne infinité de corriuaux, chosit pour sien le
 plus maigre, & plus deffait. Mais quel? ce-
 luy qui premierement à elle se sera adressé, lors
 qu'elle entre en sa chaleur, celuy qui par vne
 longue poursuyte & infinité de trauaux, se se-
 ra mortifié en telle sorte, que vrayement meri-
 tera-il le nom de plus laid: mais aussi en recom-
 pense de sa peine, estre receu au par-sus de tous
 les autres. A la mienne Volonté qu'ainsi le pra-
 tiquassent les Dames, qui preignent tout leur
 esbat & deduit au tourment & martire d'un
 pauvre affligé amant. Chose en verité detesta-
 ble, & à mon iugement abhominable deuant
 Dieu, & deuant les hommes. Mais quoy? en-
 cores à tresgrand tort luy impropereurons-nous
 ce vice. Car en celà, la peut garantir Cupidon,

C'estre ceux
 qui diēt la
 femme res-
 sembler à
 la Louue.

qui

qui seul vole & desrobe noz cueurs, lesquelz il surprend aux embusches, pour puis apres s'en faisant maistre, en disposer à son plaisir.

Ainsi entrera en ieu ce petit Dieu, & se mettant de la partie, alleguera que non aux Dames (qui tombent en telz inconueniens que descriuez) en sera la coulpe imputable, ains à luy seul, qui à nostre desceu, entame les meilleures & plus saines parties de nous, pour puis ne trouuer conualescence, sinon celle, & en celuy qui luy plaist nous ottroyer. C'est la cause pourquoy des anciens fut paint archer sans yeux, par ce que n'ayant egard aux qualitez des personnes, nous oste bien souuent la veue, & tellement aueugle noz espritz, que sans aucune consideration, habandonnons noz cueurs en telz endroitz, dont le peuple bien souuent en murmurant, s'en estonne, comme estans indignes de nous: Mais non cognoissant que la faulte n'est de nostre mouuement, ains de ce petit paillard larronneau, qui par mines se sçait emparer de noz cueurs. Et non pourtant, seigneur Philopole, que si quelques vnes tombent en cest accessoire, il faille souz noz propos comprendre vne generalité de femme, ainsi que me semblez faire. Car si ainsi estoit, voyez en quel desarroy nous tomberions: & tel, qu'il semble-

LE PREMIER LIVRE

roit que iamais homme d'honneur & valeur ne fut aimé d'une femme, ains seulement ceux, qui meriteroient nom de poltrons. Doncques cent mille Gentilz-hommes, doncq' une infinité de braues gens ne furent iamais aimez? Celà n'est-il oculairement abhorrent de toute marque de verité? Bien vous diray, se pouuoir faire que le plus vaillant & preux Cheualier de ce monde, le plus acomply en toute grace & vertu, mette son Amour en vn lieu à faulses enseignes, & sans recevoir quelque grace: se pourra faire aussi, que sans marchander longuement, reçoive le guerdon de ses merites. Mais c'est tout ainsi qu'il plaist au Dieu Cupidon, qui dedans sa trouffe se porte deux sortes de sagettes, aucunes enferrees d'or, & les autres de plomb. Celles-là, pour gagner & amollir les durs cueurs de ses suietz, & celles-cy, pour les rendre rogues, reueches, & du tout contreuennans aux volontez de ceux qui nous veulent mieux. Laquelle fiction ne nous voulut oncques aprendre autre chose, sinon que l'un se sent en vn mouuement battu & abatu pour quelque chose qu'il voit en l'autre, qui d'un ie ne sçay quel instinct l'attire à soy, & en l'autre n'y trouue rien, dõt il puisse adherer à son Amour. Adoncq' Glaphire: A ce coup, dist-il, me voulez-vous couper broche.

Cam-

Comment doncques ? respondit Monophile, D'autant que ie faisois mon estat, dist Glaphire, apres le propos du seigneur Philopole, ne vous laisser en requoy (comme ie vous auois promis) pour auoir maintenu, l'Amour ne se causer que d'une certaine chose, laquelle ne pouuez bonnement exprimer. Et quant à moy ie pensois, suyuant ce qu'autresfois m'auoient enseigné quelques anciens Philosophes, Amour ne dependre que d'une apétence de beauté. Sur quoy Monophile, adressant vers moy sa parole: Ceste cause ne depend point tant de mon chef (dist-il) que du vostre. Par ce qu'en la definition que nous auez donnée en l'Amour, vous-mesmes luy auez attribué ceste Nature. Et pource il me semble, seigneur Pasquier, puis que nous l'auéz pensé pourtraire de fondz en comble, qu'il vous touche & affiert (& non à moy) l'expliquer plus amplement. Seigneur Monophile, luy respondis-je, ceste apres-dinée vous est deue. Seulement ie vous pry recognoiestre l'heur que Fortune vous a moyenné, pour auoir gaigné la faueur de celle, qui est destinée pour iuger de nos propos : laquelle-tant s'en fault qu'elle vous y contrenienne, que plus tost faisant l'estat de Iuge, exercera-elle encore celuy d'un bon auocat, pour vous deffendre.

LE PREMIER LIVRE

Lors Charilée riant: Vous en pourriez mourir, seigneur Pasquier: Monophile est de tel merite, que ie ne pense estre trompée si ie luy porte faueur. Mais Monophile luy respondit: ma Damoysselle ie me doute fort, que l'amitié que de vostre grace me portez, esblouisse en cest endroit vostre bon & sain iugement, lequel ce neantmoins ie vous pry reseruer à mon absence. Mais pour ne detenir le seigneur Glaphire trop suspens, puis que vous, seigneur Pasquier, semblez vn peu craindre la touche, ie tascheray luy satisfaire au point qui s'offre de la beauté, de laquelle il pense l'Amour prendre son commencement, & non de cest instinct que nous auons mis en auant: Toutesfois deuant que nous eslongner, ie vous pry nous descourir ce qu'entendez, & comment ymaginez ceste beauté en vostre teste. Je le vous diray, dist

Glaphire, mais pour le vous mieux & plus clairement expliquer, entendez, seigneur Monophile, que la beauté ne gist seulement au corps, ains à l'esprit: celle là appelle lon beauté simplement, & ceste cy bonne grace, qui non seulement gist en bonnes façons & manieres de faire exterieures, ains en la vertu: ny plus ny moins que celle du corps, non seulement aux traitz & lineamentz du visage, mais aussi en vn bon

Discours sus
le beau.

com-

compartiment & proportion vniuerselle de tout le corps. Estant doncques en peu entendue la beauté, comme en est la vraye signification: mon auis est que sus les premiers iours qu'Amour se veult iouer de nous, sentons quelque estincelle de ceste beauté qui est en noz Dames: chose que depuis, & par succession de temps s'empraint tellement en nous, que perdons connoissance, non seulement de toutes telles choses, ains de nous-mesmes. Et ainsi que se trouuent diuersité de beautez, ainsi chacun s'enclinant selon son particulier entendement, à l'un plaist l'esprit, à l'autre le corsage, à cestuy le visage, à l'autre le parler: mais sus tous à l'œil puissance, autour duquel Cupidon vole & voltige auecques cent mille vire-voltes. Or en ce poinct cy suis-ie certain & resolu, que ce qui est laid ne nous plaist, & ne me pourray induire à aimer celle, qui sera desauantagée en toutes ces qualitez là. De maniere qu'une contrefaite ou tortue, ne se rendra point aimable, & croy qu'elle n'aura ceste faueur, de rencontrer aucun qui se die son seruiteur. Voylà ou ie vous attendois, dist Monophile: par ce que, suyuant vostre propos, il semble que vouliez establir quelques especes de beauté: chose neantmoins non faisable. A la verité il fault bien que ie

LE PREMIER LIVRE

vous confesse, & soye d'accord en ce avecques vous, vn chacun pretendre au plus beau: mais de constituer qu'une chose se doye dire plus belle que l'autre, pour aimer, c'est vn evident erreur. D'autant que chaque femmetrouue vn amant, qui se rend autant passionné en sa faueur, comme pourroit faire vn autre à l'occasion de quelque Dame, selon vostre iugement plus belle. Car si vostre opinion auoit lieu il faudroit dire celle seule aquerir seruiteur, qui à vne partie de telles proportions & ordonnances que nous auex ores deduites. Ainsi plus en auoit elle, & plus se rendroit aimable: combien que verrez le contraire la plus part du temps eschoir. Qu'ansi soit, representez vous deux Dames, desquelles l'une soit par le commun iugement du peuple acomplie en toute extremite, & l'autre moyennement belle. Si par celle beauté que dites estions attraitz, ne serois ie pas plus tost du party de celle, qui est belle selon la commune renommée, que de l'autre? Toutesfois vous verrez aussi tost auenir, qu'Amour fera son seiour (pour scauoir vaincre les hommes) en celle qui ne sera tant douée, qu'en l'autre ou lon pensera Nature auoir employé le meilleur de toutes ses forces, pour la rendre parfontement belle. Dites moy de grace, sei-

gneur

gneur Glaphire, ne cognoissez-vous pas celle Dame, pour l'Amour de laquelle vn vostre, & mien grand amy, fait tant de bons tours, soit du corps, soit de l'esprit? Je croy que presque presumeZ ce que i'eten. Or me dites s'il vous plaist, de quel don de grace iugeZ-vous que l'ayt auantagée Nature? Je sçay qu'autresfois m'en auez dit. Ce neantmoins, ie vous pry, voyez de quelle hardiesse, cestuy tant affectonné amant, l'a celebrée par ses vers: mais plus encore en son esprit, dont souuent m'en esmerueillant en fais moy-mesme risée.

Quant i'orneray en toute extremité,
 L'extremité dont ma Dame est pourueue,
 Pas ne croira cil qui ne l'aura veue,
 Qu'en terre y ait si grand' diuinité.
 Mais qui verra sa parfaite beauté,
 Lors il croira chose qu'il n'eust pas creue,
 Et publiera ma plume trop recreue,
 Pour parfournir à ceste deité:
 Car la faisant Nature sans pareille,
 Sus son beau corps a mis toute sa force,
 Et l'ayant fait, le moule en a rompu:
 Et pour l'orner en plus grande merueille,
 Le demourant du sexe a corrompu,
 Pour n'estre au pris de ceste cy qu'escorce.

LE PREMIER LIVRE

Voyez en quel blasphème, par ceste extreme amytié, il est doublement tombé, tant pour vilipender ainsi tout le surplus du féminin, qui ne luy semble rien, pour le regard de sa Dame, que pour luy attribuer louange, dont neantmoins (s'il faillloit peser Amour partelle beauté dont parlez) selon le iugement de tous elle n'a aucune parcelle. Mais oyons le en autre endroit.

De la louer qui a la hardiesse,

Il luy conuient faire comme Zeuxis,

Et entre tant de beautez choysir six,

Les aplicans dessus ceste Déesse.

Car pour monstrier du diuin la grandesse,

Le pourtrait fault tirer de ces sourcix,

Des deux Soleilz, dont les Dieux sont pensifz:

En autre part beauté n'a point adresse.

Et si quelqu'un meü par vn trop gräd zeü,

Met son esprit en œuvre si parfait,

Comme Apelles le lairra imparfait.

Mais pour autant que louange trop lente

Se pourroit mettre en matiere trop belle,

Mieux il vaudroit imiter le Timante.

*Il veult doncques à ce coup imiter le Timante,
pour ne pouuoir attaindre par son pinceau, à
l'ex-*

*l'excellence de sa Dame, laquelle ce neantmoins
il est contraint pourtraire tout au long depuis le
chef iusques aux piedz, en vn autre Sonnet, que
ie luy ay avec les deux precedans desrobé.*

O teste heureuse, ou gist si grand cerueau!
O langue heureuse, ou naist ceste faconde!
O néz heureux, dans qui ce musq abonde!
O yeux heureux, ou gist ce clair flambeau!
O toy heureuse & trop heureuse peau,
Qui as dās toy tout le plus beau du mōde!
O piedz heureux, qui par la terre ronde
Portez sus vous vn si digne fardeau!
O vous heureux tetins, lieu sauoureux!
Par ou liqueur si souefue est passée,
Qu'on en bruira par tout à l'auenir:
Mais toy heureux corps, heureux des heu-
reux,
Qui dedans toy tiens ceste ame enchassée,
Que l'vniuers ne sçauroit contenir.

*La voilà doncques bien extollée, magnifiée, &
belle à l'endroit de celuy que vous sçauiez, sus
laquelle toutesfois si vous & moy asseions noz
iugemens, en iugerions tout autrement. Qui cau-
se doncques ce beau en elle, sinon cest instinct
dont nous parlons, qui a reduit cestuy nostre*

LE PREMIER LIVRE

Vn chacun
tend au
beau.

compagnon en telle extremité, qu'il estime sa maistresse estre la mesme beauté? Voyez doncques, seigneur Glaphire, comme nous tous tendons au beau: & ce beau n'estant autre chose, que là ou nous guident & conduisent noz inclinations naturelles: fault par infalible consequence, telles inclinations estre motiues de l'Amour. Car de vouloir specifier, comme quelques-vns pretendent, l'excellence de l'œil gesir au verd ou au noir, le grand ou petit corsage estre les plus estimables, ce sont vrais & excellens abus, suscitez des affections que portons plus aux vnes qu'aux autres. Et par ce qu'ainsi les estimons, voulons qu'un chacun se conforme à noz volontez. Et pour vous dire le vray, ayant longuement resué & rauassé en ce, ie vous iure, que ie me trouue en fin de conte bien perplex pouuoir iuger & discerner, si le beau est le motif d'Amour, ou l'Amour cause de ce qui nous semble beau. Et apres plusieurs tracassemens en mon esprit, suis forcé de dire, que la perfection d'aymer, est seul moyen de nous faire aparoir les aucunes choses plus belles que les autres: d'autant que le seul beau est ce qui nous plaist & agréé. Et si par exemple plus familier le voulez apprendre fut-il ven iamais vn pere qui ne trouuaist ses enfans beaux, bien

bien qu'au iugement d'un chacun, Nature les eust renduz imparfaitz: qui les luy faisoit doncques si beaux, sinon l'Amour? l'Amour, dis-ie, auquel Nature, & non autre chose l'induit. Le semblable est-il en noz Dames, & nous fault tousiours reuenir à nostre instinct, qui seul fait, & que nous aimons noz Dames, & que les trouuons plus belles. Voire & encore d'un poinct d'auantage que le pere à l'endroit de son enfant. Parce que par vne longue absence, ne le recognoissant comme filz, & despoillant ceste affection paternelle, l'aura en telle estime que le commun. Là ou du premier coup, & ensemble toutes les fois qu'asseions noz veues sus noz Dames, nous sentons en elles si esperduz, & tellement esblouis, qu'il est hors de nostre puissance, pouuoir aucunement terminer, qui nous esmeut à leur Amour: Voire & fussent-elles laides en perfection, si demeurent leurs caracteres tellement en nous imprimex, par ce ie ne sçay quel instinct, que malgré nous, & les aimerons, & nous sembleront les plus acomplies de ce monde. A l'heure Philopole: A ce que ie puis recueillir de voz propos, seigneur Monophile, dist-il, vous nous figurez un Amour, gisant beaucoup plus en son-

ge, qu'au vray. Toutesfois encore est-il necessaire, qu'il y ait quelque cas qui soit dit beau, consistant à la pure verité, & non en l'opinion des hommes, ainsi que semblez maintenir. Vrayement l'ay-ie maintenu, repliqua Monophile, & encores le maintien-ie. Non pourtant que j'entende vous nier, qu'il ny ait quelque chose qui en soy doive estre dite belle: mais si elle est, ie dy que c'est le seul createur, qui en a la cognoissance. Et si par son ineffable grace, il en veut distribuer aux hommes quelque estincelle, ne pensez point, seigneur Philopole, qu'il soit en nous de le cognoistre: tant est nostre esprit offusqué, & apesanty de ceste paste terrestre. Certainement il fault que tous ensemble confessions, qu'en toutes choses y a vn vray: mais qui est celuy si hardy, qui ose tant s'assurer de l'auoir oncques trouué, sinon ce seul dieu, qui semble se l'estre reserué, voulant que ce nom à luy seul, & non autre demeurast? Telle fut nostre punition, depuis la faute du premier homme, qui de là en auant s'est tousiours continuée de pere en filz. Car là ou au parauant estoit nostre nature non corrompue, saine & non empeschée des tourbillons que nous sommes contrains sentir, voire estant (par maniere de dire)

Pourquoy
nous est ostée la vraye
cognoissance du beau.

re) la bonté mesme: du depuis venant par ce delit à corruption, se resentant encore de sa premiere felicité, luy est seulement restée l'apetence d'y rentrer, c'est de vouloir penetrer à ce bon & beau (qui simbolisent ensemble) sans que toutesfois de nous-mesmes y puissions iamaïs atteindre. Ce fut la cause possible, pourquoy quelques notables personnages voulurent iadis vsurper le nom de Philosophe, non point de sage: s'osans seulement promettre estre Zeleateurs & inuestigateurs de Sapience: laquelle neantmoins oncques ne peurent trouuer par tous leurs desers sillogismes, ains tous parlans de ce hault bien (auquel tous nous pretendons) chacun d'eux en disputa à part soy, selon sa particuliere intention. Qui doncques s'en fit possesseur? celuy qui (cognoissant l'incomprehensible haultesse de Dieu) confessa par vn extreme foy, ne pouuoir atteindre à la cognoissance de ceste haulte cognoissance, qui seulement gist es mains de l'eternel & souuerain. Car encores que Nature nous ait tous rendu participans d'une ame en soy raisonnable, pour tascher à cognoistre le vray, si l'accompagna-elle quant & quant des passions, qui luy empeschent en beaucoup ses meditations celestes. Ainsi disoient

LE PREMIER LIVRE

Des parties
de nostre ame.

les anciens Platoniques, nostre ame auoir trou-
uée en nous deux sieges, l'un desquelz colloque-
rent au cerueau, qui est raison, & l'autre es par-
ties inferieures, laquelle nommerent cupidité.
Et bien que celle qui gist es parties plus nobles,
doye supéditer l'autre, comme plus sage &
preuoyante, si est-ce qu'estans chatouillée par
ses flateuses & trompereuses passions, leur com-
muni quant ses secretz, & quasi taisiblement
coniurant encontre soy, se soubmet bien souuent
à leur mercy, à sa tresgrand' confusion: tant par-
ticipons de ce terrestre. Qui soit vray ce que ie
dy, voyons nostre premier pere Adam: qui est
celuy qui eust deu estre plus desnüé de toute
humaine passion (en son innocence) que luy?
Car encores estoit ceste nostre nature humaine
en sa plus grande perfection. Quoy? ne se laissa
il toutesfois plus transporter par concupiscence,
que guider par la raison, lors que trop ambi-
tieux, se rendit desobeissant & contreuenant
à la volonté de Dieu? Considerons encores de
plus pres es choses que voyons à l'œil: qui est,
ie vous pry, l'effet qui nous rend separé des be-
stes, sinon ceste seule raison, laquelle toutesfois
voyons en mille personnes tellement esgarée, que
plus semblēt participer du bestial, que de l'hom-
me?

me? Tesmoins en sont les furieux, tesmoins en sont les enragez & insensez : ce neantmoins iamaïs ne deffaillit en eux telle cupidité qui fait residence en nous tous : qui me fait penser, que lors que ce grand Architecte se proposa bastir l'homme, le voulut establir moitoyen entre le diuin & brutal. De maniere que du tout ne l'a voulu rendre ignorant du passé, ou preuoyant de l'auenir : mais aussi ne luy a permis voler par les ailes de son esprit à consideration qui à luy seul concernoit, telle qu'est la cognoissance du vray, ains s'est contenté de nostre seule foy & creance. Ainsi ne deuez vous trouuer estrange, seigneur Philopole, si en la beauté dont nous parlons, nostre iugement vacille. Car aussi bien se pratique cela en tous autres actes humains. Chose que i'estime se faire par grande prouidence diuine (mesmes en la question qui s'offre) à ce que celles, qui des aucuns sont estimées laides, aux autres aparoiissent belles, pour n'estre du tout habandonnées : car aussi bien sont elles propres pour la multiplication de ce monde, que celles qui sont en reputation de plus belles. Et fault neantmoins que pensiez, encore qu'en ceste opinion Amour se rende commun avecques toutes autres choses

L'homme
moitoyé en-
tre le diuin
& brutal.

LE PREMIER LIVRE

mondaines, auoir neantmoins quelque naturel en soy, dont il se rend tout celeste. Car hors mis cest vniuersel entretenement de police, qui procede de l'vnion de noz cueurs (duquel à present ie ne parle) i'ay tousiours entendu de ceux qui imaginoient la beatitude celeste, que le contentement, qui plus se presente en ce manoir super-
nel, est vne contemplation perpetuelle de ceste diuine essence, qui nous fait oublier nous-mes-
mes. Or sçay-ie bien qu'il ne fault apliquer si haultaine similitude au suiet dont nous parlons: mais toutesfois s'il nous est permis imprimer en noz cueurs vne image de ce diuin, ie dirois volontiers que l'impression qu'auons en nous de l'Idée de noz Dames, nous rauit tellement en elles, que non seulement nous fait estimer toutes les ioyes de ce monde transitoires, ains nous oste mesme la cognoissance de la cause pourquoy nous aimons, nous mirant seulement en elles, ny plus ny moins que pour contempler trop ententiuiement le Soleil, perdons à sa clarté la lueur de noz propres yeux. A quoy Glaphire: Ie veux bien tout ce que vous dites, repliqua-il, & que pour l'imbecilité de noz entendemens, ne nous est loysible voler iusques à ce Vray: & croy mesmement, que c'est la cause

L'extase
qui est en
Amour.

se de la diuersité des loix, toutes contraires en diuers lieux. Si fault-il neantmoins que me confessiez en la question de beauté, y auoir des choses, qui par commun consentement de tous peuples, sont aprouuées plus belles. Car qui contre l'vniuersel iugement se voudroit opiniastrer, le bossu ou tortu estre plus beaux, que ceux que Nature voulut créer droit & parfait, ne le iugeriez-vous plus tost de s'pourueu de veue, que de raison, ou de sens? D'autant qu'il fault que Nature opere en cest endroit, puis que ceste impression est demourée de tout temps inueterée dans nos esprits. Je ne parle point de monstres, dist Monophile, ains de choses communes & indifferentes. Car puis que Nature nous à tous voulu créer droit, ie metz hors de ma question encommancée, toute telle sorte de gens dont parlez. Et veux dire seulement que ne nous trouuans point deffectueux en nos membres, autrement qu'il à plu à Dieu nous ordonner en general, de quelque proportion que nous nous trouuions compartis, sommes assez suffisans pour estre aimez. Par ce que tout le reste des accidens qui nous suruiennent, ne se font aparoir à nous, beaux, ou laidz, sinon selon la diuersité de nos humeurs, qui nous induy-

sent à le croire. Mesme que vous voyez estre trouué en vn temps, quelque cas beau, qui en l'autre se monstre tref-vicieux. Si donc ceste generalité varie selon la diuersité des temps, trouuerex-vous, seigneur Glaphire, estrange, que noz espritz pour ce regard, se trouuent en particulier differens? Car quant aux Dames qu'ores nous auez alleguées, à peine encor que ie ne croye, en telle diuersité d'opinions, qu'elles ne trouuent quelque amy. Vray que non pas si frequent que les autres, pour estre plus esloignées de nostre commune Nature. Vous fourvoyez tous deux grandement, dist Philopole, iamais Nature ne procree chose si rare, que pour admiration. Et combien que par le corps, telles femmes ne se rendent à nous aimables, si est-ce que l'esprit se trouue tousiours en elles custumier, de satisfaire à ce deffault. Par ce qu'onques Dieu ne se trouua si auare enuers aucun personnage, que s'il luy a voulu deffaillir au corps, au supplément de ce, ne l'ait voulu recompenser en quelque excellence interieure. Et de ce pouuons nous prendre enseignement es choses inanimées, entre lesquelles nous voyons la vigne plus tortue & contrefaite, que tout autre sorte de bois, contenir presque en sa vegetatiue,

Des person
nes impar
faites au
corps.

tiue, l'esprit & ame de tous nous autres. C'est tresbien deuisé à vous, dist la Damoiselle, & quand autre parole ne sortiroit oncq de vous, si seroit-ce encore assez pourtrouuer abolition à tous les blasphemes, esquelz toute ceste apresdinée estes assez legerement tombé. Puis adressant vers toute la compagnie sa parole: Je vous suply, messieurs, dist-elle, que ce propos de Philopole ferme le parler d'Amour, duquel le seigneur Monophile semble auoir voulu triompher. Et puis que par son moyen il est tellement creu: ie-croy qu'il ne seroit impertinent, que dorensauant missions ordre, par maniere de deuis, à le vouloir abaisser, sans luy permettre plus par nostre moyē s'esleuer. Car en cest endroit serois bien de mesme opinion, que cest ancien Capitaine Athenien, lequel interrogé, s'il ne luy toboit à plaisir aprendre l'art de memoire: mais bien plus tost d'oubliance, dist-il. D'autant qu'à son iugement il retenoit bien plus toutes choses en son esprit, qu'apprises il n'oublloit. Mais sus tout si vne chose qui est en nous vne-fois engrauee, ne s'efface sans grande peine, s'estant l'Amour de nous saisy, il est presque impossible que par esprit humain le puissions de nous diuertir. Et pource ne seroit-il moins vtile, apprendre les moyens d'euader d'un

LE PREMIER LIVRE

tel lieu, cōme de sçauoir les causes pour lesquelles on y entre. Adonc Glaphire: Te serois, peut estre, bien de vostre auis, respondit-il, mais gardons que voulans faire vne course sus Amour, le serain ne nous donne à dos, qui nous pourroit plus offenser, que ne sçaurions apporter de moleste, ou fascherie à celui auquel voulez denoncer la guerre. Et pource trouuerois beaucoup meilleur pour le present faire vne bonne retraite, qu'vne dangereuse saillie. A la charge toutesfois, s'il plaist à la compagnie, de retrouver demain du matin ceste voye, pour aprendre si la fraischeur de la rosée, nous pourra donner autant de contentement, comme ceste apres-dinée. Ce conseil fut trouué bien bon par toute ceste petite bande. Car desia commençoit la nuit de les menacer bien fort, & s'aprochoit le temps, auquel (apres auoir repeu l'esprit de bons & gratieux discours) faillloit donner ordre à la nourriture du corps. Ainsi se departirent de ce lieu: mais souz esperance d'y retourner le lendemain: comme ils firent, ainsi que vous pourrez entendre.

Fin du premier liure.

LE SECOND LIVRE

DV MONOPHILE.



Elle fut vrayemēt vne
louable coustume, que
nous voyons auoir esté
familier à ces vieux
peres du bõ temps, les-
quels d'autant que plus
ils cognoissoient leurs
œuvres dignes de recõmendation eternelle, d'au-
tant choisissoient-ils patrons de plus haulte con-
dition, souz la conduite desquelz venoient plus
hardiment en lumiere. Et pour ceste cause consa-
crans & leurs noms, et leurs liures aux Dieux
seulement, & aux Muses, donnoient assez clai-
rement à entendre, que le but ou ils aspiroient
n'estoit mis en chose mortelle. Mais à vostre auis,
ma Dame, si tous ces grans personnages retour-
noiēt aujourd'huy au mōde, estimez-vous point,
qu'estans les complexions des hommes chāgées,
ils ne changeassent aussi tous d'un commun ac-
cord de façons? De ma part ie m'asseure bien,
que laissant leurs Dieux & Déesses, cherche-
roient nouueaux protecteurs. Aussi à dire le
vray, si nous cõsiderons de bien pres, & paran-

LE SECOND LIVRE

gonnonns leur aage avecq' le nostre, trouuerons
 nous, leur auoir esté bien facile en vsen en telle
 maniere. Par ce que n'ayât de leur temps l'or &
 l'argent telle vogue comme le voyons aujour-
 d'huy, estoit celuy bien estimé sus tous, ores qu'il
 fust de bas estoiffe, lequel par sa vertu & scien-
 ce faisoit monstre de son esprit. Mais estâs pour
 le present, & depuis assez bonne memoire, re-
 duitz en telle extremité, que les bons & excel-
 lens entendementz ne peuuent gaigner louange,
 sinon accompagnez de richesses, ne fault aussi
 trouuer estrange, si ceux qui depuis leur succe-
 derent à escrire (bien qu'ils se rangeassent au
 mesme poinct d'immortalité, qu'eux tous) vou-
 lurent reclaimer les Princes, ausquelz (comme
 ministres des haultz Dieux, & distributeurs de
 leurs biens) firêt part du meilleur que le ciel leur
 auoit ottroyé, pour estre par mesme moyen parti-
 cipans de leurs liberalitez, & grandes magni-
 ficences. Chose qui par succession de temps a gai-
 gné tel lieu en nous, que non seulement à eux a-
 dressons la plus grand' partie de noz œuures,
 mais aussi semble la valeur de noz espritx de-
 pendre de leurs volontez, comme du seul poinct
 & centre, auquel tous noz pensers se dressent.
 Ainsi voyons-nous par les liures, en quelle abô-
 dance

dance florirent à Rome les hommes doctes & sçauans du temps de l'Empereur Auguste, conseruateur des bonnes lettres & disciplines: au contraire quelle sterilité se trouua de telles gens, lors que les Gotz, ennemis de toute humanité & science, regnerent sus l'Italie. Vous en esmerueillez-vous ma Dame? nous tous sommes amorsez au bien faire, souz vne esperance d'honneur, lequel estant vilipendé, s'il n'est emplumé de richesse, aussi s'estudie vn chacun, s'accommoder au bon plaisir de celuy, duquel il attend profit. Et toutesfois si fault-il que ie descouure librement ce que i'en pense: trop ne se peut recompenser celuy qui s'employe à bien escrire. Par ce que les vaillantises qui se treuuent es grās seigneurs, ne peuuent prendre vol plus hault, que celuy que leur moyenne vne plume bien façonnée: laquelle par prescription de tout temps, a acquis ce priuilege, d'abaisser les haultes prouesses si bon luy semble, & aux plus basses donner exaltation. Ce que cogneut fort bien le magnanime Alexandre, quand il regretta estre despourueu de trompette, telle que Fortune auoit ottroyé à Achille, en la personne d'Honere. Qui a rendu, ie vous suply (il fault que ie profere cecy auecq'mō grand regret) noz histoires tant cachées, sinon

La leçon
ge de ceux
qui s'em-
ploient à
bien escrire.

LE SECOND LIVRE

le peu de soucy de noz Roys, lesquelz faisant trop de professiō des armes (quasi plus soucieux du present, que de l'auenir) tindrent si peu de conte des lettres, qu'aucun ne s'y arresta? Aussi est presque demourée enseuelie la memoire de nostre belliqueuse France. Les Roys donnent la vie aux espritx, & les espritx en contrechange leur aprestent immortalité. Or commençons nous (graces à Dieu) changer de chance, par le moyen de ce clement Roy François, que Dieu absolue, lequel ne s'est aquis moins d'honneur, d'auoir le premier aboly les vieilles traces de ses ancestres, que pour nous auoir laissé vn si excellent successeur, bon dispensateur comme luy, de ses biens, à ceux qui s'en rendent dignes. Qui me fait estimer, que verrons vn iour nostre France florissante, faire honte à toutes nations estranges, qui ne nous seront que barbares, tant en bonnes manieres de faire, qu'en biē parler & escrire. Desia voyons-nous noz Poetes auoir entrepris vne ligue contre les ans quasi à l'enuy l'vn de l'autre: desia gaignent noz historiographes pais: & verrons quelque iour, s'il plaist à Dieu, vn Sauuage ressusciter nostre hïstoire: desia volent parmy le monde vne infinité de liures, prenans leurs cours de bons espritx.

prit. Entre lesquels, ma Dame, encore que ie me tienne seur, n'atindre iamais à aucun degré, pour auoir esté Nature en moy trop auare de ses thresors, si vous veuX-ie bien auiser, que si onques aucun fruyt sort de ce mien petit iardin, vous seule l'aurez planté: d'autant que tout ainsi que les autres se proposent & Roys & princes, au contentement desquelz terminent tous leurs esprits, aussi vous seule fustes l'estoille, & sereZ tant que viuray, pour m'acheminer à bien faire: & n'estime moins telle guyde que les Muses du temps passé tant inuouquées par les Poetes. Vous seule estes la Déesse que i'implore, & implorant, ne pretens en vous autre biē, que celui que vous-mesmes vous pouuez promettre en moy. Et toutesfois encore que toutes mes œuures preignent leur adresse vers vous, si ne me suis-ie proposé, vous faire pour ce coup offre de la presente matinée, ny en semble des propos, qui pendant icelle furent à nostre confusion poursuiuis. Lesquelz ie n'eusse iamais entrepris mettre en lumiere, n'eust esté que tout ainsi que la iournée de deuant s'estoit employée auecques vn tel repos & contentement d'esprit que ie souhaitois, aussi pense-ie que celle, qui fut ce iourd'huy passée, bien que

LE SECOND LIVRE

ce fut à nostre grand desauantage, toutesfois
pourra apporter tel fruit à quelques vns qui s'y
voudront acoster, que si des discours precedans
ils demourerent mal contens, peult estre ac-
cepteront-ils ceux cy en recompense & supplé-
ment, de l'iniure qui leur pourroit estre faite:
si iniure se doit apeller, chose si iuste & veri-
table, comme celle qui en faueur d'Amour, fut
par nostre Monophile deduyte. Et partant en
ce traité pourront trouuer quelque satisfaction:
mais non pas moy, qui non seulement sçay mau-
uais gré à Charilée, au pourchas de laquelle fu-
rent moyennex telz propos, & pareillement
à Glaphire, qui nous les a discouruz, mais d'un
point d'auantage à moy-mesme, pour auoir apli-
qué ma plume, en suiet si odieux, & tant ab-
horrent de toute equité & raison. Aussi à dire
le vray, en refteray-ie beaucoup plus culpable
& reprehensible, que eux tous. Car encores à la
Charilée est pardonnable ceste faulte, qui par
vne apetence naturelle de sçauoir (commune à
vous autres, mes Dames) s'euertuoit à com-
prendre toutes choses de bien en mieux: & à
Glaphire les deduire au plus pres de sa pensée.
Et pour mon regard ie proteste, que si quelque
matiere se traite à l'encontre de ce Dieu, du-
quel

quel ie suis vray esclau, estre tout au rebours de ce que i'en pense & estime, ains par vne certaine hipocrisie, à laquelle ie me suis resolu, & ostiné pour ce coup, pour parfournir au surplus de ma deliberation. Ce ne me sera doncq que coruée, & ressembleray ces bons & anciens precepteurs, qui nous acheminans au contemnement d'honneur par leurs diuines exhortations, se preparoient vn sentier à vne gloire immortelle : ainsi voulant amortir es autres hommes, au progres des propos de noz quatre champions, les vrays racines d'Amour, les reuiuifieray de plus en plus dans moy-mesme. Vous auisant toutesfois, ma Dame, qu'encores qu'ils se fussent determinez, non à la ruine d'Amour, ains à la mienne totale, si est-ce que ie ne sçay par quelle ordonnance diuine, ne peuuent venir à fin de leur maligne volonté. Faisans (si bien y prenez garde) plus de profession de menaces, que d'effect. De maniere que ie me prometz que peu s'en sentira l'Amour offensé. Et vous diray bien d'auantage (tant me pleut le peu que pendant iceluy temps fut par Monophile deduit) qu'encores de ceste matinée luy veu-x-ie ottroyer l'honneur, comme du iour de deuant. Vous priant tresaffectueusement recueillir ses

propos entre les autres (avec quelques-uns des
 miens) comme la rose parmy vne infinité d'espi-
 nes. Et ce pendant sans faire aucun conte de tou-
 tes leurs medecines, les lairrons tout à leur ay-
 se pourfuyre le dessein de leur entreprise : Qui
 estoit se retrouver le lendemain du matin au
 lieu qui tant leur auoit esté fauorable: ou venue
 l'heure de l'assignation, tous quatre se rassem-
 blerent, & moy aussi du semblable, le tout, ain-
 si qu'entre nous auoit esté capitulé. Mais ne
 fumes si tost arriuez, que Philopole selon son
 acoustumée liberté, ne se voulust ingérer d'ac-
 caresser Charilée, non de propos acompagnez
 de quelque honneste entretien, comme possible
 est l'vsance de tout homme faisant estat d'hon-
 neur, ains par atouchemens trop hardis : Voire
 à mettre la main au poinct que toute femme doit
 auoir en plus grande recommandation : quand
 la Damoiselle toute indignée, d'une contenan-
 ce assez farouche luy dist : Je ne doute poinct,
 seigneur Philopole, que la grande priuauté dont
 i'ay vsé enuers vous, me commettant en ce lieu
 si solitaire & indeu, es mains de, vous quatre
 ieunes Gentilz-hommes, ne soit, peut estre, cau-
 se de celle que voulez exercer en mon endroit:
 toutesfois si ainsi est, i'espere trouuer bon sauf-
 conduit

conduit en vostre foy, & celle du seigneur Glaphire, souz l'assurance desquelles i'ay pris hier le chemin : lequel si encore pour le iourd' huy ie pratique il me semble que ne le deuez trouuer estrange, ains l'imputer à la grande honnesteté, que me suis tousiours asséeurée reposer entre voz mains, & en la sauuegarde de laquelle ie me sumetx. Vous auez raison, ma Damoiselle, dist Glaphire, d'ainsi le penser de nous, autrement nous feriez-vous bien grand tort. Non toutesfois que puissions en tout respondre & satisfaire à ceste opinion de courtoisie, que vous vous promettez en nous (de laquelle aussi ne pretendons-nous estre du tout desgarniz) mais pour le moins vous puis-ie asséurer, non seulement pour mon regard, ains pour ces trois miens compagnons (quelque chose que Philopole se vueille monstrer dereglé) ny auoir homme en ceste compagnie, qui ne s'estudiaist vous pourchasser tout honneur. Et de ce vous en pouuez vous sus nous reposer, comme de la part de ceux, qui sont tous vostres. Je l'ay tousiours ainsi pensé, respondit elle, ce neantmoins ie ne puis autre chose dire de Philopole, sinon ce que i'en voy : Dont toutesfois ie le pry bien fort se deporter, autrement me donneroit occasion de

LE SECOND LIVRE

me plaindre de luy en toute honnesté compaignie, & le tenir en autre reputation que n'auois fait au parauant. Voire mais, ma Damoiselle, dist Philopole, trouueriez-vous si mauuais, veu que la iournée passée fut consacrée & dediée à la commemoratiō d'Amour, si ce iourd'huy vous & moy luy faisons sacrifice, par vn reciproque plaisir que pourrions l'un & l'autre prendre? Ainsi demoureroit entierement parfaite la dedicace de ce lieu. Et disoit ceste parole d'une si elegante grace, qu'il n'y eut celuy d'entr'eux, qui peut contenir le rire: hors mis la Damoiselle, qui faignant n'entendre ou il visoit: Le sacrifice, dist-elle, que nous ferons, sera que tout ainsi qu'hier nous estudiasmes à l'exaltation & accroissement d'Amour, mettrons pour le iourd'huy peine à le vouloir massacrer. Ainsi sera bel & gentil ce sacrifice, & tel qu'à mon iugement, par cest œuvre rendrons ceste matinee plus meritoire, que ne furent ces grans & superstitieux sacrifices iadis par les anciens celebrez, pour l'amendement de leurs fautes & pechez, En quoy tresvolontiers souhaiterois vne Ariadne, qui par sa subtilité enseigna à vn pauvre perdu Thesee les moyens & astuces, pour sortir d'un tel Dedalus, comme
celuy

celuy que nous figura Monophile, bien qu'il estimast le faire en tout à son auantage. A quoy ie luy respondy. Vous auez doncques dormy sus ce costé, ma Damoiselle, & persistez encore en l'animosité, sus laquelle hier nous departismes l'un de l'autre. Qui eust iamais estimé qu'à vostre instigation & conseil, se deliberaست nostre amant forcer les portes d'une si honnesté prison, pour esperer se reduire en liberté? Je vous diray, seigneur Pasquier, dist lors Philopole, bien souuent le mauuais traitement qu'on reçoit de son amy, ou sa Dame, occasionne les gens d'en sortir, ou pour le moins à mettre peine de ce faire: & quant à moy ie ne voudrois pas iurer, que ma Damoiselle Charilée ne fust peut estre sus ces termes. De telle chose, replicqua-elle, ne vous en rendray-ie conte pour le present: si ne vous fault-il trouuer estarge, si ie (qui, peut estre, ay en quelque recommandation les pauvres amans, veu mesme que noz propos le requierent) esmeue d'une naturelle compassion, leur souhaite plus tost liberté, que ceste estrange & tenebreuse prison, en quoy ie les voy martirez. Non que telz propos preignent leur adresse vers moy (comme iugez) ains par ce que tousiours i'ay estimé, qu'encore que le plaisir.

LE SECOND LIVRE

Les incommoditez de l'Amour.
 que lon reçoit en Amour, soit grand en extrémité, au respect des autres, voire sans comparaison, si m'a il tousiours semblé, n'égaler en son endroit d'un seul poinct la minime partie des douleurs & tourmens, qui de là prennent leur source & origine. Mille suspicions, mille ialousies, vne infinité de craintes, sans lesquelles Amour ne chemine, à vostre auis ne causent-elles telles peines, qu'à un homme de sain cerueau & bon entendement, ne fust plus cher n'entrer iamaïs dans ce fort ? De ma part ie pense que iamaïs amant ne se trouua iouir d'une heure de bon temps, qu'il ne l'ait achetée, & deuant, & apres la iouissance, avecques vsure illegitime: deuant, par ce que l'amant, n'est encore paruenu à l'assurance de ses desmesurées affections, & ne sçait qui luy en escherra: apres, pour la peur & crainte qu'à celuy qui iouit, que la proye ne luy eschape. Vray que le parfait amant & qui est assésuré, ne doit entrer en telle doute: mais qui est l'assésuré amant? qui est celuy qui se peüst dire acertené de la volonté de sa Dame, comme de sa propre foy & constance ? Ie ne vous allegueray le parler du peuple, auquel pour l'honneur de sa maistresse (lequel il doit plus auoir recommandé que soy-mesme) il fault que cestuy
 amant

amant satisfait. Estant le monde du iourd'huy si farouche, ie ne diray point malin, que pour voir trois ou quatre fois vn ieune homme familiariser avec vne femme, soudain entre en quelque soupçon & opinion: laquelle parauenture n'est pas faulx. Quelle peine doncques pensez-vous que c'est à celuy, qui du tout s'est voué à vne Dame, satisfaire à sa volonté, & empêcher les langues du populaire? Car à bien dire, cest Amour rendant les hommes taciturnes & pensif, fera plus tost descourir voz passions, que si à son de trompe les alliez publier par la ville. Quoy? n'estimez-vous rien vn refus, apres vne longue poursuite? n'estimez-vous vn faux rapport, soit ou de vous à vostre Dame, ou de vostre Dame à vous? Tel rabaioye ne surpasse-il tous les plaisirs que pourriez imaginer en Amour? Lesquelz encores qu'ils soient grans, sont neantmoins en soy perpetuellement accompagnés d'une intrinseque melancolie. Ie m'estendrois plus auant à deduire les occurrences qui tombent en Amour, desquelles i'ay vne infinité, verifiées par exemples, n'estoit que ie craindrois faire tort à vous autres messieurs, qui trop mieux entēdez telles affaires que moy, comme les ayans pratiquées. Bien vous diray-

ie vne chose, qu'oncques ne trouueray amoureux, bien qu'il eust attainé à l'accomplissement de la chose qui plus luy venoit à gré, que s'il aimoit parfaitement, ie ne trouuasse ordinairement perplex, melancholique, & fasché, bref qui apres auoir longuement considéré l'effect de l'Amour, ne me confessast y auoir plus de fiel & amertume, que de miel. Lors Glaphire: Vous ne vous esgarez pas loing du vray, dist-il, & pour ceste mesme cause, quelques anciens Philosophes faignirent l'Amour prendre naissance de Pore & Penie, c'est à dire d'afluence, & indigence: pour nous figurer les amans au plus grand contentement de ce monde estre neantmoins misérables, par vne desuoyée concupiscence & insatiable cupidité: Voire que celuy qui à iouissance, ne demeure encore content. Voila pourquoy, respondit la Damoiselle, ie souhaiterois cest amant trouuer quelque yssue à l'Amour, si trouuer nous la pouuions. Sur ce poinct Monophile, seul protecteur de ce petit meurtrier, qui luy causoit tout son mal: Je ne sçay, dist-il, ma Damoiselle, qui vous veut entrer en ces termes: vous qui estes femme si sage, & qui par vne longue ysance auez acquis tel bruit entre toutes gens de bon esprit, si est-ce qu'à ce que

ie puis recueillir de voz propos, ie croy que vous le ressembler celuy, qui pour vn petit contentement qu'il se promettoit, reuoyant sa partie, contemna vne immortalité, à luy par les Dieux proposée. Je dy cecy, pour autant que souhaitez vn amant sortir d'Amour, pour quelques petites perturbations qui luy tombēt en l'esprit, lesquelles bannies de nous, estimez l'homme trop heureux. Je vous suply, ma Damoiselle, qui est celuy qui iamais se trouua desnüé de telles passions? qui est celuy qui en tout ce rond corps de l'vniuers, au plus grand contentement de ce monde, se trouua oncques content? Je m'esbahy comme par mesme moyen ne souhaitez ne procréer iamais enfans, par ce que d'autant que les aimons plus que les autres, d'autant nous aportent-ils plus de moleste & fascherie. Ne craignons nous, desirons, esperons, & tourmentons cuer & corps en leur faueur? Desirons les voir grandz, paruenuez, & suport de nostre vieillesse, & là employons toute nostre estude: Craignons qu'ils ne reçoient mal au corps, ou à l'esprit, par mauuaises conuersations: nous tourmentons extremement, & quasi nous ressentons du mal qu'ils sentēt. A maniere que si voulez balancer les angoisses que suportez pour ceux que

Les choses
qui no^s a-
portēt plai-
sir, apportent
aussi des-
plaisir.

LE SECOND LIVRE

mettez en ce monde, avecques les plaisirs qu'en receuez, ie ne sçay lequel des deux se trouuera emporter l'autre: & toutesfois vous sçauuez que l'extreme Amour qu'auons en eux, fait oublier le tourment & tristesse dont ils sont cause. Et est impossible que des choses dont receuons extremes contentemens, par fois aussi n'en receuions grandes douleurs & amertumes. Y a-il chose en ce monde qui nous tourne à plus grand plaisir que le feu? par luy toutesfois sont magnifiques palais, & citez arses & cōsommées. Ne me confesserez-vous l'eau estre grandement profitable & vtile pour ceste necessité humaine? ce neantmoins par elle seule la plus part des grandes richesses perissent, lesquelles nous submettons à sa mercy. Or si pour telz accidentz & mesauentures, qui quelquefois nous sont causez par ces deux elemens, vouliez nous frustrer d'un tel bien, voyez, ie vous pry, en quel desarrois mettriez ceste machine ronde. Ainsi est-il de l'amour duquel nous voulez despoiller, pour quelques martires sans plus dont il s'accompagne, non considerant le grand bien & profit qu'il cache en soy. Que ne souhaitez-vous aussi (à ce que ie ne passe plus loing) que l'homme ne naisse, par ce qu'estant entré en ce mode,

endure

endure infinies & insupportables miseres ? Car
 souz tel destin sommes-nous nez, & d'autant
 que sommes grans, & estimez au plus hault
 degré de felicité, d'autant sentons-nous plus ay-
 grement les pointures de fascherie. De sorte
 que ie m'esmerueille grandement comme vous,
 ma Damoyelle, ne reuoluez en vous mesme,
 que tout ainsi qu'Amour par fois nous cause vn
 extreme & parfait plaisir, ainsi est-il raison-
 nable, que par autresfois il nous bate d'une e-
 strange & viue maniere. Par ce que si le plaisir
 en estoit petit en vn temps, aussi en seroit en au-
 tre saison la fascherie plus petite. Car Dieu a
 ainsi conioinct & pesé l'un avec l'autre, pour
 ne nous vanter estre heureux de tout poinct, &
 a donné la fascherie au contrepois du plaisir.
 Lequel toutesfois est sans comparaison (& ne
 vous desplaise si ie dy) plus grand, au poinct
 dont nous parlons, que les angoisses qu'y suppor-
 tons. Car les pleurs & larmes que nous effon-
 dons en Amour, ne sont par nous iettées, sinon
 comme participans de l'humain suiet à toute in-
 firmité, à toute calamité : & les plaisirs qu'en
 auons, nous rendent demy esgaux aux celestes.
 Aussi à dire le vray, Amour nous rendroit en
 ceste basse terre beatifiez, n'estoient les petites

LE SECOND LIVRE

trauerſes qui s'offrent quelquesfois en luy. En quoy ſe deſcouure apertement vne grand' prouidence diuine qui (pour nous manifefter noſtre humanité) voulut acompagner ceſte grande abondance de ioye, de quelque eſtincelle de douleur. Non pourtāt qu'il faille que ſi petites algarades ſoient de ſi grand' efficace , que pour elles ſoit beſoin nous deſnuer d'vne ſi grand' beatitude: Mais fault parmy telles deſtreſſes eſprouuer le cueur d'un vray & loyal amant, ny plus ny moins que l'or au feu : car qui touſiours ſeroit nourry entre ſes voluptez, telles qu'il ſouhaiteroit, ſans ſentir aucune aygreur de faſcherie , à peine que iamais peuſt ſauourer le doux fruit qu'il y auroit au iardin de volupté. Meſmement ſemble que pour ſon augmentation ſoit neceſſaire l'entrelacer de quelques petites douleurs. D'autant que pour bien aſſaiſonner vne viande, n'eſt ſeulement beſoin de ſucre & choſes doucereuſes, ains de beaucoup d'eſpiſſeries, qui de ſoy ſont difficiles à digerer: mais meſlées avecques autres drogues, luy aportent bien bon gouſt, qui autrement ſeroit fade. Adonc Charlée: Vrayement, ſeigneur Monophile, repliqua-elle, ie me deſdirois volontiers, tant ſont voz raiſons perſuaſiues, & pleines de bonne grace, n'eſtoit que pour

vous

Vous seul qui d'une force volontaire viuez sous
 ce ioug d'Amour, i'en trouue vn milion, qui par
 ameres complaints maudissent le iour & heu-
 re, que iamais meirent le pié dans ce dangereux
 chasteau. Et bien qu'ils cognoissent leur ruyne à
 l'œil, si se sentent-ils tellement pris à la glu, que
 pour conseil qu'ils entrepreignent, ou pour aucun
 effort qu'ils facent, ne se peuuent depestrer, non
 plus que le cerf encheuстрé dans les filets, lequel
 plus tasche à euader, & plus s'euelope soy-mes-
 me. Ie ne puis doncques penser (dist Philopole
 interrompant ce propos, par ce que sus toutes cho-
 ses estimoit l'amant brutal) pourquoy Nature
 nous ait donné vne ame raisonnable, pour nous
 distinguer des bestes, si l'homme est si despourueu
 de raison, qu'il entre à sa volonté en vn lieu,
 dont puis apres à sa grande confusion, il ne se
 puisse retirer. Car encore est excusable le petit
 oyseau, & s'en doit plaindre seulement à Natu-
 re, qui l'a despourueu de cognoissance, quand par
 doux chans & atraitz tombe aux aguets de
 l'oyseleur, dont puis apres reçoit ou sa mort, ou
 captiuité. Mais cestuy homme se perdant à son
 esciant, pour sus le tard s'en repentir sans y pou-
 uoir donner ordre, en quoy le doit-on separer de
 tous les autres animaux, sinon de l'exterieure

face, souz laquelle couure vne par trop grande bestialité. Et vouloit continuer ce propos: toutes fois Charilée, le voyāt entrer en termes trop cha-
 touilleux. Ha seigneur Philopole, heureux estes vous, dist-elle, qui iugez à vostre aise des coups & faulses demarches: toutes fois si estiez entré en ieu, tout rusé & hupé que soyez, par auanture ne les destourneriez-vous. Mais scauons quoy? Vistes vous iamais nautonniers entreprendre vn long voyage, & se commettre à la volonte de la mer, souz vne attente de beau temps, qui de prime face leur rit: lesquelz toutes fois singlans en plaine mer (se trouuans bien souuēt frustrés de leur premiere esperance) sont tellement agitez de l'orage & la tempeste, que non obstant toute leur industrie, sont contrains habandonner le vaisseau à la mercy des ventz & vagues, sans y pouuoir donner ordre? Ainsi pouuons-nous comparer cest amant, qui souuentefois indiscretement, voire lors que plus il pensera estre en seureté, à la conduite de quelques ocillades qu'il receura d'une Dame, se mettra avecques tous les plaisirs & contentemens de ce monde, dans ceste grand' mer d'Amour, dont toutes fois à la parfin s'en repentira à loysir. Qu'ainsi soit, ie l'ay appris par vn chant, que quelquefois i'ay entendu

Cōparaison
 d'un amou-
 reux avecq³
 le nauton-
 nier.

entendu d'un personnage, qui à mon iugement
auoit passé tous les destroitx & angusties d'A
mour. Pour nous le représenter par ses vers en
telle perfection, que ie pense que la Venus, en ce
qu'elle fut cōprise par Apelles, ne fut point plus
pourtraite en son naif, que cestuy nous en a don
né pleine intelligence, par la nauigation & nau
frage que de soy-mesmes il décrit. Dõt toutesfois
ie suis sans plus contente vous reciter quelques
huytains, tant pour estre ce chant d'une trop lon
gue estendue, qu'aussi pour n'estre memoratiue
que des principaux traitx. Et peut estre par
son exēple excuserex-vous vn amant, combien
qu'assez chaudement soit entré dans ce gouffre,
dont apres il ne peut sortir.

Qui me fera ce coup cy
Mettre en pleine mer la voyle,
Pour descouurir le soucy,
Que dans mon esprit ie voyle?
Qui fera celui des cieux,
Et de la diuine troupe,
Qui par vn doux vent en pouppe
Me rende à port gracieux?
Quel Neptune à mon secours,
Quel Dieu fault-il que i'embrasse,

LE SECOND LIVRE

Pour parfournir tout le cours
 Du long chemin que ie brasle?
 Ie voy le flambeau desia,
 Qui à sa claire venue,
 Semble foudroyer la nue
 Quitant mon cueur vmbragea.
 Auant doncq' gentilz Nauchers
 Ores quela mer est calme
 Voguons sans craindre rochers,
 Emportons l'honneur & palme
 Sus tout marinier passant.
 Que voulons-nous autre aide,
 Puis qu'auons pour nostre guyde
 Ce soleil resplendissant?
 Sus mon desir en auant
 A ceste nouuelle emprise,
 Qu'on mette voyles au vent,
 Sus espoir que tant ie prise,
 Sus ma haute volonté,
 Sus fermeté, sus priere:
 Toy honte tientoy arriere,
 Auecques desloyauté.

Quoy? quelle nauigation se trouua oncques entreprise d'une plus grand' gayeté, ny mieuX garnie de Nautonniers, que celle cy? Le tout à cause de ce

de ce Soleil, qui sembloit promettre quelque sérénité de tēps. Toutesfois si ce ioly entrepreneur se trouue en fin trompé & deceu de son opinion, ie m'en raporte bien à luy. Seulement oyons le encore en sa grande prospérité, apres quelques autres poinctz par luy passez, avecques vne grande satisfaction d'esprit, lesquelz ce neantmoins ie laisse.

Voyez icy le troupeau
De Nymphes, & de Naiades,
A la lueur du flambeau
Nous donner cent mile aubades
Si qu'il semble s'animer
Pour faire honte à la Dame,
Qui iadis trouua son ame
Dans l'escume de la mer.

Icy se voit l'vnion
De tous elemens ensemble:
Icy la perfection
De toutes choses s'assemble:
O flambeau digne d'honneur,
Flambeau qui nous sers de guyde,
Flambeau qui regles la bride
De nostre ioye & bon heur.
Nous ne craindrons te suyuant

LE SECOND LIVRE

D'encourir aucune entorce,
Et se trouuassent les vents
Auecques toute leur force.
Sus doncques amy flottons,
Paracheuons nostre poindre,
Bien tost nous nous verrons ioindre
Au port que nous souhaitons.

*O bien & plus que bien heureux amant, si la
iournaliere fortune ne luy eust ioué tour d'es-
crime, dont de toute ancienneté elle en a pris
l'usage. Escoutons le doncques au demourant,
pour voir si cest extreme plaisir luy aura pro-
speré de bien en mieux.*

Dieux marins de quel costé,
Voy-ie surgir ceste nue,
Qui obscurcit la clarté,
Dont estoit entretenue,
La trop ardente chaleur
De nostre ineuitable astre:
Dieux gardez-nous du desastre,
Et d'inopiné malheur.
Voyez comme à petis traitz,
Ce mal fortuné augure
Nous va rechangeant les rais

Du

Du beau temps en nuit obscure:
 Dieu ayez en nous esgard,
 Ceste noire nue & sombre,
 Las! nous promet quelque encombre,
 Si Fortune ne nous gard.

Elle est desia au mylieu,
 De l'estincellant visage,
 Le vent la singe en ce lieu,
 D'une foudroyante rage.

Et ainsi va tout le demourant de ce chant, duquel comme ie vous ay dit, ie ne me puis bonnement ny tout au long recorder, si me souuient-il fort bien, estre vne continue deploration de la misere, dont pour lors estoit tourmenté par infinies trauerses & indignitez qu'il souffroit en Amour maulgré luy. Iusques à ce qu'en fin, ayant esté agité de toutes sortes d'orages, est contraint confesser le dernier periode de son malheur: quand il dit estre tombé au profond gouffre de Caribde & de Silla, femmes monstrueuses comme sçauetz, & coustumieres de changer en formes brutales, tous ceux qui par l'impetuosité des ventz sont iettez en leur destroit. Ainsi, deplorant son estrange sort, est-il forcé de dire.

LE SECOND LIVRE

Je cognoy ia mes façons
Prendre diuerſes manieres,
En oyant les trahiftres ſons
De ces douc' aſpres forcieres:
Plus ne ſe voit ſus moy nerf
Qui n'ayt ia la nourriture,
Voire la meſme nature
Que lon voit tenir au cerf.
Et pour eſtre moins concors,
Ains plus tenir du ramage,
Je voy autour de mon corps
Encor couler vn plumage,
De maniere que ie ſens
(Helas pitié trop inſigne)
Se transformer en vn cigne
Tous mes eſpritz & mes ſens.
Comme cerf doncq' ie ſeray,
Et comme l'oyſeau, qui chante
Par vn chant deſeſperé,
Aux eaux ſa mort violente,
Juſqu'à ce qu'il plaiſe aux dieux
Me permettre que i'eſpreuue,
Le remede qui ſe treuue.
Dans le fleuue obliuieux.

*Ne voyez-vous comme par vn faulx deſir, &
vne*

Vne vaine esperance (dont sus les premiers iours
 qu'il voulut faire voyle, il se païssoit) le plaisir
 & consolation qu'il se promettoit: toutesfois en
 fin de ieu, en quelle deffiance & desespoir il est
 tombé, veu qu'il n'a refuge qu'en là mort, en la-
 quelle à peine peut il trouuer medecine? Que
 vous sembleroit doncq' de celà, seigneur Philo-
 pole, quand les plus fins se treuuent ainsi trôpez
 par les douces amorces de cest Amour? Lequel,
 comme hier nous disputions, s'estant de nous em-
 paré, nous oste toute cognoissance, & de luy, &
 de sa Nature, sentans dans nous vne flâmme,
 qui nous cõsomme les entrailles, beaucoup moins
 amortissable, que ce perpetuel feu de la monta-
 gne de Sicile. Et ores que nous procurõs tous
 moyens pour l'estaindre, si n'est-il en nostre puis-
 sance: tât est fort & indissoluble ce nœu de par-
 faite amitié. Et qui pis est, verrez bien souuent
 eschoir, qu'un homme ayant esté à vne longue
 poursuite d'une Dame, laquelle parauenture ne
 sera moins touchée de son Amour, que luy ai-
 guillonné pour elle: elle toutesfois vergongnée
 d'un stimulate d'honneur, ne luy oser commettre
 ce qu'il demande entre ses mains. Je vous suply
 faire iugement de vous-mesmes, si cestuy amant
 parauenture fonde là son but (comme nous disoit

le seigneur Pasquier, bien que ie ne le voulusse croire, mais toutesfois pose le cas) en quel travail doit passer sa vie cestuy tant passionné? Or quelle medecine voudriez-vous ordonner à ce malade? non que ie pretende que pour aucun refus ne soit tousiours tel enuers sa Dame comme au passé: mais trouuons luy par gentillesse quelque drogue, par laquelle luy faisans oublier ses passions, ce neantmoins ne luy facions discontinuer ses Amours. Ainsi ferös en luy viuifier le plaisir, qu'il aura à songer en sa maistresse, & assopirons les douleurs, qui luy causent cent mille mortz. Vostre discours (diz-ie lors) est hautain, nous demandant vne chose non faisable, qu'aymer sans aucune passion: & ne seroit moins facile, extraire des quatre elemens ceste quinte essence dont les Philosophes anciens disoient nos ames prendre source, qu'esperer satisfaire d'un seul poinct à vostre desir: lequel à la verité ie loue & estime grandement, comme prouenant d'un bon lieu & bien affectié enuers les pauvres miserables. Mais il est autät possible qu'un Amour soit sans passio, comme un homme sans ame, un soleil sans lumiere, un feu sans chaleur, vne eau sans humidité: lesquelles choses, ny plus ny moins qu'elles leur sont si naturelles, que sans elles

elles en leur particulier ne peuuent estre l'hōme,
 le Soleil, le feu, & eau: ainsi ne marcha iamais.
 Amour sans ses compaignes les passions. Partāt
 me semble que ce seroit chose par trop imperti-
 nente, de vouloir disputer d'une Idée en noz es-
 prit, qui ne fut, & ne peult estre, ains fault ac-
 cōmoder noz propos en choses non impossibles:
 autrement seroit perdre le temps, & la parole. Et
 pour le regard de ce que nous proposez vne fem-
 me qui fait son estat d'aimer, & toutes fois veult
 maintenir son hōneur, pour le moins ce qu'elle pē-
 se son honneur, encores que tel cas auenāt, il soit
 bien difficile qu'Amour sortisse iamais son plein
 & entier effet: si seroy-ie icy bien de mesme auis.
 que fut l'amoureux poete, que pour vn, ny deux,
 ny trois refuz, ne se fauldroit tenir escōduit, ains
 iusques à l'importunité solliciter de plus en plus
 sa Dame. Car ores que pour vn temps elle face
 doute s'abandonner à nostre mercy, souz crainte
 de faire playe à cest hōneur, si ne me scauroit on
 persuader qu'en son esprit ne reçoie vn extreme
 contentement, pour se voir priée & requise de
 celuy que plus elle honore & reuere, et ensemble
 pour la chose que plus elle apeteroit sans ce ram-
 part de vergōgne: qui n'est neātmoins si fort, qu'à
 la lōgue ne se rōpe & abate par vne vehemēce

Moyen pour
 paruenir à
 iouissance.

LE SECOND LIVRE

d'Amour, qui passe toutes autres forces & vertuz mondaines. Aussi que la raison y est peremptoire, principalement au cas qui se presente, parce que cest honneur ne gist qu'en opinion des hommes, & cest Amour s'extrait & tire principalement des registres de la Nature, qui à ce nous inuite & induit. Et à fin que ne trouuiez mon propos estrange: si noz ennemis se rēdent à nous affables par nostre humilité & priere: si les bestes brutes priuées de toute consideration raisonnable, se rēdent à nous familières par noz doux atraitez & allechemens: que deura en fin faire ceste cy, qui nous a en recommandation, qui nous chérit, qui nous aime plus que soy mesme? Pensez-vous la femme n'estre susceptible d'Amour autant & d'auantage que l'homme? voire iusques à s'estendre à choses interdites & deffendues. N'ayma Biblis son frere, Myrrha son pere, & la pauvre Pasiphaé ne fut-elle esprise pour vn Taureau? Et toutesfois n'ouistes (au moins ainsi le croy-ie) iamais parler de femme, tant fut elle transportée, qui fist l'office de demandeur, ains que surprise d'une certaine honte, ne voulust estre requise: & encores requise, ne fist doute de l'accorder. Partant ay-ie tousiours ouy dire à gens esprouuez & experimentez en telz actes,

actes, le meilleur estre ne requérir que bien peu, mais requérant, lascher par vne si honneste audace, la bride à ses passions, que lon se trouue emparé & saisi de la chose tant desirée. Et à dire le vray beaucoup de choses se prennent honnestement, que nous n'oserions requérir sans nostre tresgrand desauantage & honte. I'en feray iuges messieurs les gens ecclesiastiques, & auocatx; mais principalement en ceste affaire, en laquelle les paroles, toutes conuertes qu'elles soient, sont beaucoup plus honteuses & difficiles à digerer, que l'effect. Et croy tel estre le seul & vniue moye, pour paruenir à chef de son dessein: lequel bien pratiqué, à mon auis que peu s'en trouueront esconduitx. Car quant à moy ie ne vy & ne l'en iamais d'amans (hormis quelques-vns de petit nombre, ne x soux vn trop grand desastre) qui en fin de conte ne soient arriuez à bon port. Alors Philopole: Vostre raison me semble bonne (dist-il) & pour l'auerer d'auantage, seulement vous diray ce mot: c'est, que si les Dames estoient si farouches comme elles en font le semblât, & comme beaucoup de pauures sotx pensent, on ne les verroit si popines & bragardes, comme les voyës à present. Car, à vostre auis, qui a introduit ce petit passifilon, ceste vertugale premieremēt,

De la sum
ptuosité des
Dames.

LE SECOND LIVRE

puis la vasquine bien troussée, ceste buste, & au temps passé ces petitx mignons patins, & vntas d'autres affiquetx, dont les femmes se scauent si bien aider, sinon pour complaire aux hommes, complaisans, estre apетées? Je dy apетées de sorte qu'il semble, que telles curiositez soient inuentées au suplement de la bouche, laquelle n'osant exercer son office pour requerir, auroient esté en ce deffault introduites telles petites mignardises tant familiares à toutes femmes. Je m'en raporte (luy respondy-ie) à ce qui en est, toutesfois il pourroit bien estre, seigneur Philopole, que prinssiez les matieres trop crues, ains que pour plus grande permission que ne pensez, tomba la femme en si grande curiosité, puis que ainsi vous plaist la nommer. Par ce qu'elle estât créée seulement pour l'aide et plaisir de l'homme, il est vray-semblable que Dieu ayt en elle mis ceste opinion, à ce qu'elle s'estudiaist non tant de complaire à soy, que de donner contentement aux yeux de celuy, en faueur duquel auroit esté cōposée. Qu'il soit vray, vous trouuerez que la ieune pucelle semble affecter ceste mignotise, pour estre plus conuoitée de ceux qui pretendront à son mariage. Et pour ceste mesme cause permettoit Licurge en sa Republique aux filles
marcher

marcher desuoylées, pour estre desirées et venues. Pourquoy
ont trouué
lieu es fem-
mes lesgrā
des parades
d'habitx.
 Aussi par mesme moyē, tasche la femme agréer
 non au populaire, ains à son mary, à qui du tout
 s'est destinée. Nous lisons de ce bon empereur
 Auguste, qu'un iour voyant sa fille parée à l'a-
 uantage, & outre la commune vsance, encores
 que telle vanité ne luy vint à gré, si ne voulut
 il pour l'heure descouvrir ce qu'il en pensoit.
 Au moyen dequoy le dissimulant à un autre
 temps commode : la trouuant vne autrefois en
 habit plus simple & modeste, & plus conue-
 nable (ce luy sembloit) à l'honnestete feminine:
 O combien, luy dist-il, est plus seant à la fille de
 Auguste tel habit, que non celuy dont ces iours
 passez vous deguisastes. A quoy elle, comme
 bien aprise & entendue : Ne vous en esmer-
 ueillez, monseigneur (respondit-elle) le conten-
 tement de mon mary m'inuitoit lors à ce faire,
 & ores veux-ie satisfaire au vostre. Si ceste
 responce fut bonne & digne de la fille d'un tel
 Empereur, certes vous seul l'estimerez. Au-
 tant en disoit presque ceste bonne Dame Esther,
 quand elle protestoit deuant Dieu, que les sum-
 ptueux paremens, dont par fois elle vsait, n'e-
 stoient que pour rendre content ce grand Roy
 Assuere, qui l'auoit choisie pour sienne. Je dy

LE SECOND LIVRE

cecy, encores que ie m'eslōgne de nostre but, toutesfois puis que par vostre moyen y sommes tombez, pour monstrer qu'à grand tort se donne impropre à la femme vsant de sumptueux habitz, quand l'estat le requiert, & le mary y preste consentement. Car là doit du tout fonder sa fantaisie, & non au plaisir des estrāges qui ne luy doyuent en rien toucher. Autremēt seroit (s'il fault parler en verité) non reprehensible, ains grandement punissable. Le semblable n'est pas de la veufue cōme de la mariée ou fille à marier, d'autant qu'elle ne doit plus pretendre auoir obiect à contenter. Et ores que d'un trop aspre desir vous lust entrer en mariage, si est-elle plus agreable & à Dieu, & au monde, en sa simple simplicité & nonchailance. Car les larmes qu'elle doit ietter, & les regretz que pendant sa viduité doit auoir pour la mort de son deffunct mary, luy doiuent seruir d'assez bonne bride, pour la retirer de toute pompe. Et à ceste imitation diray que la femme, en l'absēce de son espoux, n'en doit moins faire: par ce que durant iceluy temps, a perdu celuy qui luy cause toute telle façon de faire. Et qui empesche, repliqua Philopole, que les filles ne soient autant & plus louables en leur modestie, que les veufues? Ne pallions point, de grace, leur pensée:

pensée: Nous ne sommes point, nous ne sommes point en celle Republique de Sparte: ce temps porte tout autres façons & autres manieres de viure. Et toutesfois quelque cas qu'il vous plaise dire, si ne trouuaſtes-vous oncques que ce grand personnage Licurge, fondateur de si bõnes loix, permist iamais à la fille (quoy qu'elle marchast sans voile) tel deguiſement d'habit, comme le voyons en vsage. Car à bien dire, si pour ceste conſideration de mariage telle vsance se pratique, comme vous, seigneur Pasquier, presume, n'est-ce chose ridicule? Veu que beaucoup plus tost toutes filles gaigneront mary, s'abſtenans de telles manieres, que s'en aidans. Car si pour ſagesſe & honneſteté, elles se rendent plus aimables, à la verité celle est plus eſtimée, qui moins hantant avecques le monde, moins se rend ſuiette au langage du populaire, & eſtime-lon celle qui est en habit diſſolue, pareillement en complexions diſſolue. Par ce que nous aſſeions noſ iugemens ſur ce que nous voyons à l'œil. Chose que bien deſcouurit ce bon Capitaine Liſandre, auquel ayant quelque tiran de Sicile enuoyé pluſieurs accouſtrements precieus, pour ſeruir de luſtre & parade à ſes filles, les refuſa ſagement, adiouſtant à ſon refuſ vne reſpõce memorable, que en telle

LE SECOND LIVRE

façons de robes gisoit plus tost leur deshonneur que l'ornement. Aussi n'est celuy estimé Cordelier, ny Iacobin, qui avecques habit & balafrez, va vagabond parmy le monde, ains celuy qui, hantant les cloestres, se regle selon la forme à luy prefixe par vn saint François, ou Dominique. Ainsi, au iugement de tout le monde, ne sera la fille chaste en si grande superfluité d'habit & moins par vne mesme raison, trouuera-elle de marys. D'autant que la chasteré est chose si precieuse & recommandable, soit en la fille, ou en la femme, qu'aussi tost se contamine-elle en vestemens, œil, ou pensée, comme au fait. Et ou vne fille penseroit en moy trouuer mary pour estre si brauement atiffée, se trouueroit y auoir aussi peu de part, comme ic la iugerois peu participer du chaste. Quel besoin est-il desguiser icy les affaires? telles petites piperies ne furent iamais mises sus, que pour attaindre au dernier poinct. Car tousiours a esté à Dieu plus agreable la femme en sa simple modestie, ou sa modeste simpleesse, qu'en telle insolēce trop curieuse: laquelle voids autresfois auoir esté deffendue aux sages matrones de Rome, comme seul malheur & encombre de leur Republique: ainsi que depuis fut verifié par exemple, lors que petit à petit vint
mettre

mettre son siege en ce lieu. Aussi est le mary bien ianin (s'il fault venir à celle qui est mariée) qui non content de ce dont Nature a doué sa femme, la veult rendre desguisée (& autre qu'elle n'est) au peuple. Si elle est belle, n'est elle assez louée en sa beauté naturelle? si elle est laide pourquoy contreuenant à la volōté de Dieu, la veux tu faire autre qu'il ne l'a voulu créer? N'est-ce pas pour soubmettre toy & elle au parler de tout le monde, & te faire enregistrer en ceste grande cōfrairie, à laquelle tous gēs mariez sont suiets? Tu scez que le parler du monde est si prompt & auantageux, & tu luy bailles occasion de te blasonner d'auantage. Et diray plus, non seulement luy bailles occasion de te poindre, mais aussi de faire la court à ta femme, la voyant si mignonne & popine. Si nous n'en auions les exemples tant anciens que modernes, i'aurois raison de m'en taire: mais qui fut cause de la ruine & destruction des anciens Rois de Rome? ne fut-ce le mary mesme de Lucrece, qui en presence de Tarquin vint à tellement la louer & exalter, estant pour lors absente, que le plus dur cueur du monde eust esté pris de son Amour? Et quel besoin estoit il entrer en telles disputes, de chose qui luy estoit peculiere & non concernant autrui? Puis

LE SECOND LIVRE

que toy seul es participant du bien & du beau de ta femme tel qu'il est, qu'as tu que faire le publier & faire tomber au desir & concupiscence de ce monde si attractif? Il fault que telles gens ie compare à cest ancien Candaules, qui d'un esprit assez mal caut, voulut monstrier sa femme nue (au deceu d'elle) à un Giges qu'il estoit son amy: lequel en recognoissance de si grande priuauté, se trouua tellement feru de l'Amour d'elle, que par apres mist le mary à mort, pour entrer avecq'elle en mariage: mais possible m'abusé-ie & telles gens ne fault comparer à un Candaules, qui receut tel loyer de son demerite. Car au contraire ceux-cy plus heureux que sages reçoient à credit mille caresses & bonnetades en faueur d'elles, ausquelles beaucoup d'honnestes gnes font l'Amour. Et ainsi sont ils-aimez d'un chacun, pour ainsi farder leurs femmes. Qui semble autant abhorrent & de Dieu & de raison, comme telles gens qui le permettent sont dignes d'estre ditz grosses bestes & animaux. Mais à bien considerer, à tort me tourmenté-ie l'esprit d'une chose, qui nous est si auantageuse, & preiudiciable aux marys: facent doncques telz badaux & permettent tout ce que bon leur semblera, & nous encores comme Cheualiers errans
ferons

ferons telle cōqueste sus leurs femmes que pourrons. Car d'estimer qu'en faueur d'eux soyēt telles sumptuositez & mignardises en vsage, ce sont belles simulations & couuertures, inuentées par les femmes pour couvrir leur lubricité: comme le sçeut tresbien pratiquer celle mesme Iulie fille d'Auguste, de la responce de laquelle vous estes voulu aider. Et vous diray bien plus (voyez en combien de partie ie suis differēt d'auuecq'vous) moins à mō auis se rendroit la veufue accusable en cest habit immodeste, que la fille ou la femme, lesquelles dites pour grand raison se maintenir en telle sorte. Par ce que luy estāt plus seant faire l'Amour & auецques plus grand seureté, aussi luy est-il plus conuenable se desguyser par toutes manieres de brauades que aux deux autres, dont l'vne est ordinairement esclairée d'vn fascheux pere ou d'vne mere & l'autre d'vn vmbreux mary. A quoy ie voulu adiouster: Et la femme veufue de tout le commun populaire, qui en elle fiche tous ces yeux, d'autant qu'elle n'a plus le pretexte dont elle se puisse voiler, qui estoit le mary, auquel il est plus facile imposer (pour l'affection dont bien souuent il se laisse transporter à l'endroit de sa femme) qu'au peuple, qui au fait d'autrui à plus

A laquelle
des femmes
il est plus
seant faire
l'Amour.

LE SECOND LIVRE

d'y eux que n'auoit l'ancien *Argus*. Vous dites
 Vray, repliqua *Philopole*, mais encores sçauex-
 vous que les cōmoditez soit du parler, soit d'ex-
 cuter sa volōté, ne se desrobent si familièrement
 avecq' les femmes mariées, qu'avec les veufues
 qui ne dependent que de leur chef. Ainsi leur e-
 stant plus propre aimer (tant pour auoir ceste
 grand commodité, qu'aussi pour estre plus chau-
 des et aspres à tel mestier, duquel la fille n'a en-
 cores fait essay, & la femme mariée trouue sa-
 tisfaction telle quelle en son mary) leur est-il biē
 mieux auenāt, vser d'habitx conuenables à cest
Amour, que aux deux autres. A l'heure *Cha-
 rilée*: Vostre raison (dist elle) auroit lieu, qui vous
 acorderoit la curiosité d'habitx estre inuentée
 pour donner occasion à aimer: Sine le vous a-
 corderay-ie, estant chose trop indifferente. Mes-
 me qu'il me semble estre biē chatouilleux (non-
 obstant quelque chose qu'il vous en plaise, sei-
 gneur *Philopole*, à ce que d'un mesme trait ie sa-
 tisface aux propos que cy dessus auez passé) iu-
 ger d'un interieur, par vne aparence exterieure:
 & dit on en commun prouerbe, que les plumes
 ne font l'oyseau, & que deuons asseurer nostre
 renommée sans plus sus nostre vertu. Car tout
 ainsi que le froc ne rend l'homme plus saint ny
 deuot,

deuot, aussi pour estre vne femme propre ne doit on l'estimer lubrique, & quelque cas que le sot peuple en soupçonne, estant nostre conscience saine, bien peu deuës-nous faire cõte des malignes langues du monde, lesquelles on ne sçauroit refraindre. Dauantage vous sçauex que la Dame qui cõtre l'vsance & coustume tascheroit à s'acoustre, seroit en tous lieux publiée pour hypocrite: & n'encourroit moins de blasme (puis que telles sont noz façons, ausquelles il se fault ranger) celle qui entre tant de pompes voudroit faire la reserrée, que l'autre qui par vne estrange nouveauté entre vn milion de recluses vseroit de trop grandes pompes. Par ce que toutes telles nouveautez, de leur entrée sont odieuses: mais par vn long trait de temps sçauent si bien gaigner pais, que ne se treuuent d'autre digestion, que les autres manieres de faire. D'autant que telles petites chimagrées ne gisent qu'en opinion des hommes. Et pource ne fault-il, seigneur Philopole, trouuer estrange, puis que telles façons petit à petit se sont trouuées bonnes & decentes, si nous toutes en general & d'un commun accord les pratiquons, les aucunes d'une mauuaise volonté, & les autres sans y mal penser, ains par ce qu'ainsi lon en vse. Aussi n'y a

Qu'il ne
fault asseoir
son iugemẽt
sus choses
indifferẽtes.

LE SECOND LIVRE

il chose tant bonne soit elle, laquelle si voulez
retorquer en mal, ne s'y puisse tout aussi bien a-
dapter, comme au bien: & fust-ce l'euangile
mesme, laquelle (ainsi comme vous voyez)
nous accommodons selon que noz volonte-
z & affections nous poussent. Par tant, seigneur
Pasquier, sans plus faire icy de seiour & sor-
tans de ce touffe trop espais, ie vous suply re-
prendre vostre route encommencée. Autre-
ment si n'y obuiez, nous nous pourrions par trop
esgarer, sans pouuoir rentrer sus noz erres. A-
doncq' moy reprenant la parole: Ie dy donc, ma
Damoiselle, qu'il seroit impossible que d'une fem-
me bien aimante, en fin lon ne vienne à bout, &
qu'on ne la meine à raison: nonobstant quelque
impetuosité ou tourbillon de vent, qui pour vn
temps nous empesche surgir à bon port. Toutef-
fois il ne vous fault prendre mon propos, sinon
en tant que l'Amour est entre les deux parties
reciproque, comme nous presupposons. Car là ou il
deffaudroit d'une part (comme il peut auenir
par preuention de quelque autre, ou bien que les
personnes ne nous plaisent) on se pourroit rom-
pre & teste, & esprit, sans que iamaïs on y
paruint. Chose neantmoins que ie ne voudrois
maintenir iusques au feu: par ce que les cha-
steaux

steaux que bien souuent lon pense inexpugnables, en fin lon voit se rendre subiuguez. Sçauex vous, dist lors Philopole, comme ie voudrois pratiquer telles Dames. Vous oyant parler de chasteaux, il m'est souuenu d'un commun dire de Philippe de Macedone, lequel aux assaults des villes qu'on pensoit imprenables, demandoit si un asne chargé d'or y eust peu entrer: car assurez-vous, disoit-il, s'il y entre, que Philippe y entrera. Voulant par ce remonstrer, que ce qu'on ne peut gagner par amitié, ou par force, se peut domter par argent, qui est le Roy de toutes choses & qui seul commande aux hommes. Je croy qu'il n'y a femme tant vertueuse soit-elle, laquelle ores qu'elle ne soit frapée du coin d'Amour, & que là ne se puisse atraire, que l'argēt ne fournisse à ce deffault, qui est d'une Nature plus atrayante, que n'est l'aimant enuers le fer. Iamais, respondy-ie, seigneur Philopole, telle iouissance ne vault rien, & moins encor l'Amour mené souz une telle esperance. Non plus que de ceux qui par breuuages & potions amatoires, veulent forcer le naturel de leurs Dames, pour les induire à aimer. Car l'Amour, ne gisant que au cueur, peu vault la iouissance du corps, qui ne est vray possesseur du cueur. Et ou la femme se

Faire l'Amour avec l'argent.

LE SECOND LIVRE

lairoit gaigner souz ce pretexte d'argent, ie la reputerois pour publique, quelque grand Dame que ce fust. Ains au contraire il me semble que tant s'en fault, qu'elle doiuc porter faueur à vn tel amāt, que plus tost l'aura-elle en haine, pour se voir estre en reputation de vilaine enuers luy: d'autant qu'il pense que plus elle face conte d'argent, que de l'amytie ou honneur: chose qui ne peut tomber en la pensée de femme, qui est tant soit peu de bõ cueur. Aussi est-ce la cause pourquoy quelques-vns debatans à laquelle des deux Dames apartenoit faire l'Amour: à la gēti-femme ou bourgeoise: voulurent dire la gēti-femme estre plus propre, comme celle qui seulement pour son plaisir, sans aucun regard d'argent, aimoit. Toutes fois ie craindrois que telles gens eussent peu tomber en erreur. Car de toutes tailles se rencontrent bons leuriers, & se treuvent autant de bourgeoises contemnans l'effet d'argent, comme de gēti-femmes. Voire mesme qu'il sembleroit (non pas que ie le vueille dire) que la gēti-femme se rendist en cest endroit plus suspecte, si elle n'estoit avecq' competance riche. D'autant que l'estat de l'vne, pour estre grand & de sa Nature oyseux, à tousiours plus affaire d'argent, que n'a celuy de la bourgeoise, qui avec vne petite

titesse

titeſſe s'entretient gaillardement & ſans ſi grãd' difficulté. Quant à moy i'eſtime que ny l'une ny l'autre de ces Dames (pour auoir le cueur aſſis en trop bon lieu) mette plus ſon affection en la ri cheſſe, qu'aux perſonnes. Et pource, ſi parauanture il auenoit que l'homme aimant ſans eſtre aimé vouluſt avec vn ferme propos, pourſuyre ſon entrepriſe, qui tend à la iouiſſance : le meilleur moyen qu'il puiſſe auoir pour y aborder, eſt, ce me ſemble, par vne infinité de merites & ſeruices donner clairement à entendre à ſa dame la grand' Amour qu'il luy porte. Par ce que Nature nous apprend tenir conte de ceux qui bien nous veulent, tout ainſi qu'eſtre deſireux de vengeance en la perſonne de ceux qui nous pourchaffent quelque tort. Meſme que tout ainſi que Dieu pour auoir formé l'homme d'une matiere plus maſſiue, le voulut accompagner d'une force, dont il defraudz la femme : Auſſi pour auoir fait la femme d'une nature plus tendre & ſubtile, la voulut rendre familiere de miſericorde & pitié. Vous vous abuſez, diſt Philopole: car en toutes les autres choſes, la femme ſemble eſtre miſericordieuſe & pitoyable, en ceſte cy ſe rend plus reueche & farouche, que ne ſont les beſtes brutes: Voire ſi mali-

La femme
d'une Na-
ture reue-
che.

LE SECOND LIVRE

gne, qu'il semble qu'elle se baigne & complaise
au mescontentement de celuy, qui luy porte affe-
ction, tousiours l'entretenant & alaitant d'un
vain espoir en sa presence, et en l'absence faisant
de luy grand risée. Et, comme dit quelqu'un de
nos amis, en un sien chant qu'il en a fait:

Tantost d'un faint entretien
Le sçaura à soy attirer,
Puis d'un offensif maintien
Ne taschera au contraire,
Qu'à le getter des arçons:
Plus muable en ses façons
Qu'un Prothée, se paissant
(Comme l'oyseau rauissant)
En son cueur, & son martire,
Pour puis estant en tourment,
Sçauoir seulement comment
A soy elle se retire.

Ainsi permettant voler
Son esprit à la vanuole,
Se laisse l'homme couler
Souz les esles d'une folle,
Qui n'ayant compassion
De sa sotte passion,
Ains se nourrissant au mal,

De ce

De ce grossier animal,
Qui pas ne le peut cognoistre,
Luy fait faire mille escriis,
Mille bons iours, mille cris,
Comme s'il venoit de naistre.

Je ne dy cecy sans cause, assureé que la plus part des Dames, ores que leur cueur soit du tout lié & destiné en vn endroit, si est-ce que si elles se sentent caressées par quelques honnestes Gentilz-hommes, qui d'elles se soient enamouréz: d'autant qu'elles sont soucieuses estre venues auoir plusieurs seruiteurs à leur poursuyte (seul tesmoignage, ce leur semble, de leur beauté & bonne grace) feront caresses en particulier à vn chacun d'eux, & telles que les plus fins penseront auoir part en elles. En façon que s'entretenāt d'vne sottise & vaine esperance, procedant d'vne infinité de fantasies, entrent bien souuēt d'vne fièvre tierce en chauld mal, auquel apres ne peuuēt donner remede. Or pensez-vous, seigneur Pasquier, que pour ceste extreme ardeur, elles entrent en plus grande pitié? Si vous le pensez, vostre pensement est bien eslongné du vray. Par ce que tant plus elles vous trouueront tourmentez, & plus vous voudront tourmenter, sans neātmoins

LE SECOND LIVRE

vous donner congé, qu'avec esperance de retour.
 Sur ce poinct Glaphire: Je suis, dist-il, de mesme
 auis avecq' vous: & me semble que le seigneur
 Pasquier se deuoit arrester en ce qu'au cōmence-
 ment il se conseilloit, à celuy qui n'est point aimé,
 se desister du tout de son entreprise. Toutesfois ie
 croy, que s'il veult dire la verité, son conseil est
 plus pour tromper ceux qui desirēt estre trōpez
 par les doux apastz et amorces de pitié, que pour
 aucun autre regard. Pour ce qu'il me confessera
 estre meilleur (& m'en rapporteray à son sermēt)
 premier qu'entrer plus auant dans ce labirinth,
 s'en retirer de bien bōne heure, lors que cest amāt
 non aimé, n'a encores perdu cognoissance de son
 mal, & premier que les passions preignent plus
 grand' auantage dessus luy. Car l'Amour (ainsi
 que dit celuy mesme qu'ores nous auez allegué)

Par nostre folie naist,
 En elle prend sa pasture,
 Et sans elle iamais n'est:
 Puis augmentant sa nature,
 Petit à petit s'acroist,
 Et de telle sorte croist,
 Que ny plus ny moins que l'ocil
 Ne peut attaindre au soleil

Quand

Quand vers le midy s'auance,
 Ainsi tant plus hault le fol
 Laisse à l'Amour prendre vol,
 Plus en perd-il cognoissance.

Voire que tout ainsi qu'au progrès & suite du soleil, ceste fleur que nous apellôs Soucil, se guide & euvre tant plus le soleil tend au midy, estant vers le matin close & fermée: ainsi s'ouuriront tousiours de plus en plus noz souciz & pēsées, si du premier coup n'obuions & resistons à cest Amour. Voulez-vous similitude plus aparente que du feu materiel, auquel si ne prenoyez lors qu'il s'est pris en quelque endroit, s'acroist de peu en telle sorte, qu'à peine avecques toutes les eaux l'estaint-on, combien que du commencement sans aucune difficulté estoit amortissable? Ainsi fault-il amortir ceste flâme naturelle sans aucun delay, quād la voyons gaigner pays sus nous. Car là ou en tel temps peu d'eau suffira pour l'estaindre: au contraire si par elle nous laissons subiuguer, les grandes rauines ne se trouuerōt suffisantes pour la dechasser de nous. Et ou par petites gelées & froidures l'espererions effacer, cōme par ialousies ou autres mauuais recueilz, trouuerons finalement telles petites algarades n'estre que

LE SECOND LIVRE

(comme l'eau des mareschaux) renouuellemēt de nostre feu & Amour. Et affin que vous ne pensiez mes propos s'estendre seulement vers celuy, qui ne trouue Amour reciproque en sa Dame: ie ne veux à luy seul adresser mon conseil, ains à tout autre qui pretendra entrer dessouz ce ioug d'Amour. D'autant que si vne fois se laisse alecher par ses trahistreuſes amorces, il luy sera impossible pouuoir au vray discerner la vraye amante de la faulſe, tant pour estre trop eblouy en sa passiō, que pour se sçauoir plusieurs femmes desguysen en tant de sortes, qu'il nous est presque impossible (voire hors l'Amour) pouuoir cognoistre vn faulx-semblant. Ie dy doncques & maintiendray, celuy estre beaucoup plus sage, qui encores que parauanture il pense receuoir quelque guerdon & loyer de sa Dame, neantmoins du tout s'en exempte des le commencement sans aucunement captiuer son esprit. Et combien que iouyssance soit de telle sauueur, que peut-estre ne trouuerez goust à mes propos: n'estimez-vous rien, sans que ie vous represente mille passiōs tombās en l'Amour, ia discourues par ma Damoiselle Charilée, vne perte & consommatio de temps, vne solitude perpetuelle, vn destourbement de toutes bonnes affaires, pour
vacquer

vacquer à cest *Amour*? Cestuy estimeray-ie biē heureux, qui est iouyssant en *Amour*: cestuy estimeray-ie plus heureux qui du tout l'aura habandonné, sans sentir ses aspres morsures. Et cōme disoient quelques Philosophes anciens, celuy estre bien fortuné qui iamais ne nasquit: son plus prochain estre celuy qui est enfant morné: Ainsi repouteray-ie celuy au nombre heureux, qui chassant toutes occasions, n'aura iamais entré en *Amour*: & l'accompagnera l'autre, qui y aura mis vn bout de pié, mais bien tost, craignant s'eschauder d'auantage, l'aura retiré à son honneur & profit. Et toutesfois qui voudra entreprendre d'aimer, souz le voile de telle esperance qu'un chacun qui aime se propose, ie conseillerois bien plus tost à l'homme de robe courte, de suivre tel chemin, qu'à celuy de robe longue. Non qu'en cecy ie vueille rien deroger plus à l'un que à l'autre, les estimant tous deux d'un mesme degré, chacun en leurs qualitez, mais d'autant qu'il me semble l'estat de celuy de robe courte (qui sont les armes) estre plus recommandable à l'*Amour*, que celuy de robe longue, la profession duquel gist principalement en l'estude, du tout incompatible avec l'*Amour*. Et ne se peut le Gentil-homme tant desuoier de ses bonnes

A qui il est
meilleur fai-
re l'*Amour*
au gentil-ho-
me ou à l'hō-
me de robe
longue.

LE SECOND LIVRE

entreprises que cestuy : ains semble ceste chose
 estre bien souuent cause de l'adextre & aguer-
 rir, pour la seule souuenance de sa Dame: à la-
 quelle pour complaire & agréer, s'efforce de
 plus en plus aprendre mille honnestetez & ga-
 lantises, du tout concernans les armes, pour luy
 donner tesmoignage de ses adresses, soit à la li-
 ce, à la bague, à voltiger, escrimer, saulter, bal-
 ler, & autres telz exercices qui rendent l'hom-
 me plus allegre & disposé : lesquelz semblent
 prendre leur prime source & origine (au moins
 leur plus grand accroissement) pour estre bien
 venuz & accueilliz des Dames, qui nous por-
 tent quelque faueur. Si qu'il semble estre pres-
 que necessaire à telles gens, pour mieux se exer-
 citer aux armes, vacquer quant & quant à l'A-
 mour. Et pense que ce fut la cause pourquoy les
 poetes nous paignirent au temps passé, vn Mars
 & vne Venus prenans ensemble leurs esbatz.
 Chose qui depuis nous a esté représenté par tous
 romans, soient Espagnolz, soient François. A
 telles gens, ie n'interdiray doncq' grandement
 faire l'Amour si bon leur semble : mais quant
 aux autres, tresinstamment les suppliray s'en de-
 porter, & sus les premiers iours que l'Amour se
 pensera saisir d'eux. Mais au contraire, dist Phi-
 lopole:

lopoie : car dont procede vne infinité de tant de
braues espritx, qui iadis furent estimez, & en-
cores de tant d'autres qui pour le iourd huy re-
luysent entre les hommes, comme la Lune entre
les estoilles, sinon pour s'estre trouuez raiuz de
ceste amoureuse flâme? Voyez ie vous suply vn
Petrarque, vn Sannazar, vn Bembe : & pour
ne m'eslongner de mon temps, ny de mon pays,
vn Ronsart, vn Bellay, vn Tiart: desquelx cha-
cun en particulier, s'accommodant à diuers sti-
les (ainsi que leur naturel les pouesse) se sont ren-
duz si parfaitx, qu'il semble que la poesie, qui
nagueres faisoit residence en Italie, se soit vou-
lu transporter en ceste contrée, pour y faire eter-
nelle demeure. Car quant aux autres, combien
qu'ils n'ayent ce tant desiré Genius (pour se com-
poser plus aux façons & imitation d'autrui,
que de suyure leur nature) si meritent-ils grand
louange & immortalité de nom. Or de tou-
te ceste compagnie, qui est celuy qui ait atteint
à ceste perfection, sinon par le moyen d'A-
mour? En maniere qu'il semble, que tout ainsi
que l'Amour n'eust esté rien sans eux, aussi
n'eussent-ils esté rien sans luy : & que s'ilz
n'eussent esté par ses doux apastx perduz,
tous eussent esté perduz dans les obscures te-

De l'excellen-
ce des poe-
tes de nostre
têps qui ont
escrit d'A-
mour.

LE SECOND LIVRE

nebres de la nuit. Ainsi me semblez-vous trop partial, vouloir defrauder l'homme d'estude de l'Amour. Je meure, seigneur Philopole, repliqua Glaphire, si iamaïs ces personnages que nous venez d'alleguer, se trouuerent amoureux, & m'en rapporteray au iugement du seigneur Monophile, s'il luy plaist dire ce qu'il en pense. Ce iugement seroit assez hazardeux, dist Monophile: toutesfois s'il nous est loysible balancer les autres au poix de nostre esprit, ie croirois qu'il seroit assez difficile que l'homme surpris en Amour, peut auecques vne telle brauade descourir vne si haultaine cõception, comme celle que tous ces poetes nous ont voulu représenter par leurs escritz. Pource que le passionné à les sens & sentimens si esperduz, qu'il seroit presque impossible, nō que l'esprit, mais que la main peut exercer bien & deuement son office. Parquoy pense-ie que pour faire monstre de leur grande viuacité en vn suiet qui outrepasse toute humaine consideration, chacun d'eux ait choysi sa chancune, à la louange & poursuyte de laquelle, ait employe la meilleure & plus saine part de ses escritz. Si pour ce regard seulement, dist Philopole, ainsi comme vous presomez, il me semble, seigneur Monophile, qu'ils se seroient fait trop
grand

grand tort. Par ce qu'en autres mille matieres dignes de recommandation, eussent peu apliquer leur plume, avec plus grand bruit & renommée, que faignans adorer vnes Dames, se declarer en elles idolatres. Comme si leur iugement fust si bas que du tout dependist des femmes, ne pouuans sans elles estre aucune chose. Vous ne scauez encores (dy-ie lors entreprenant sus Monophile) qu'ils feront. Ne precipitons point, seigneur Philopole, noz iugemens à la volée: car toutes ces grandes amours qu'ils ont voulu en eux desguiser, souz la conduite de Poesie, en l'aage ieune ausquelz ils sont, nous promettent quelques oeuvres plus grans, venans à plus grande maturité & perfection d'ans. Mais vous scauez que chaque temps emporte quant & soy son deduit. Ainsi ne fault-il trouuer trop estrange, si accommodans leurs escritz au sujet qui semble estre du tout voué à la ieunesse (en laquelle à present ils viuent) se sont proposez faire les passionnez dedans leurs oeuvres, pour seruir d'un bon mirouer à tout le monde: Si aux gens faisans profession d'aymer, pour se mirer & recognoistre en ce que dans eux ils liront: si aux autres abhorrans l'Amour, pour le detester d'auantage à leur exemple.

LE SECOND LIVRE

Qu'elle matiere requerez-vous doncq' plus con-
 uenable, tant pour eux (estans dispensez d'au-
 tre estude en l'aage dispoꝝ ou ils sont) que
 pour l'vtilité commune? Combien que ie m'as-
 seure bien, ven la grandeur de leur cerueau, que
 ils couuent encor souz leurs toictz quelque cho-
 se digne d'eternelle memoire, dont quelque iour
 nous aurons part. Surquoy repliqua Glaphire: Il
 me semble que tous ces propos ne touchent gue-
 res les nostres. Ce neantmoins ie croy (quelque
 chose que lon en pense) que qui demanderoit rai-
 son de leurs escritz à tous ces Poetes, ils diroient
 estre le plus braue & haultain thème, qu'ils
 se fussent sçeu proposer. D'autant que l'Amour
 se trouue d'vne si haulte puissance, que les cho-
 ses plus haultaines, voire les Dieux du temps
 passé, se laissoient mener en triumphe souz ses
 arrois & estendars. Or quant à moy, si pour
 n'auoir esté attaints de son dard, ains pour des-
 couvrir les passions qu'il cache en soy, ilz ont
 voulu mettre la main en vne telle matiere, d'au-
 tant les estime-ie plus grandz, que la chose est
 plus difficile, i'enten si bien parler de l'Amour,
 sans en auoir fait l'esprouue. Mais si pour l'a-
 uoir esprouué, ie les privay de rechef pour vne
 bonne fin & conduite, non seulement de leur
 estude,

estude, mais aussi de leur repos, s'en deporter le plus tost que faire pourront. Et en sera le moyen bon, si n'estant encores priuez de leur sain entendement se persuadent de iamais ne pouuoir venir à bout: & ou ils y pourroient atteindre, iouissance qui est la fin ou lon pretend, n'estre qu'une opinion de plaisir, causé d'une affection que portons plus à une femme qu'à l'autre: & qu'au vray toute femme est femme. Vray que telle medecine n'est pas des plus stables & constantes de ce monde. Parce que celuy qui aura empraint une opinion d'une femme dans sa teste, me dira n'estimer en rien iouissance, sinon à cause de l'affection qui est extreme enuers sa Dame. Et si de bien pres considerez, vous trouuerez qu'il n'y a aucune comparaison du plaisir qu'on reçoit d'une femme publique, & à qui on ne porte qu'une affection triuiale, au pris de celuy que lon trouue en une sienne bien aimée. Au moyen dequoy ie trouuerois beaucoup meilleur, que celuy qui voudra tromper l'Amour, se propose du premier coup vn desespoir de iouissance. D'autant que pour nous garentir des passions, entre lesquelles l'Amour regne, se trouue double medecine. L'une, quand nous laissons

Deux moies.
pour no^s ga
rétir des pas
sions.

LE SECOND LIVRE

lons toutes affections, sans leur donner lieu en nous. L'autre, quand les passions ayans gaigné pays sus nous, bataillons contre noz propres volontez, faisans vne guerre intestine en nous mesme, souz la conduite de raison, acompagnée toutesfois de quelque oposite passion. De la premiere vsa l'vnique Socrate, lequel s'estant armé par vne grand' Philosophie, d'un perpetuel contemnement de toutes choses, pour prosperité, ou mesauenture quelconque, iamais ne changea visage. Or est-ce remede estrange. Car estant composée nostre ame du raisonnable, & passible, à peine que quelquesfois les passions n'emportent les raisons à vau l'eau. Parquoy fault-il en diligence auoir recours à la seconde medecine: quand la raison enuelopée des passions, ne s'en pouuant de soy-mesme quasi bonnement despestrer, prend ayde par vne contraire passion: laquelle combien que de soy ne fust bonne, toutesfois se laissant en cest endroit maistriser par la raison, & quasi luy seruant de dame d'honneur ne peut estre dite mauuaise: d'autant que les affections ne sont malignes, sinon entant que contre l'ordre de nature veulent dominer la raison. De ceste medecine s'ayda le philosophe Carneade, lors qu'il nous amonnestoit

nestoit pendant noz plus grandes lieſſes , nous
 reſentir des calamitez de ce monde , à fin que
 tenans par ce moyen la bride à ceſte ioye effre-
 née, temperaſſions l'un par l'autre . Ainſi ſou-
 haitoit Philipe roy de Macedone , le iour qu'on
 luy aporta nouuelles de la naiſſance de ſon filz
 Alexandre, & de deux victoires par luy di-
 uerſement obtenues , que fortune luy entrela-
 çast ce grand ayſe de quelques petites trauerſes
 pour ne s'eſleuer trop hault. Et le ſage Anaxa-
 gore , bien qu'il priſt vn ſingulier plaiſir en la
 vie d'un ſien enfant (comme nature l'aprenoit)
 ſi eſt-ce que ceſte extreme ioye moderée d'une
 perpetuelle crainte de noſtre fragilité , luy ren-
 dit la mort de luy moins faſcheuſe, quand il re-
 cogneut l'auoir engendré pour mortel. Ces deux
 voyes vrayement ſont dignes de recommanda-
 tion , pour ſe ſauuer de telles ſortes de furies.
 Toutesfois quant à la premiere, bien qu'es au-
 tres affectionſ elle puiſſe gagner lieu par vne
 continue meditation , ſi ne m'oſe-ie aſſeurer
 qu'en amour elle trouue place. Eſtant vne paſ-
 ſion ſi ſubtile , que pluſtoſt la voyons entrer
 dans nous, que nous en ſoyons auertiz . Voire
 meſmement que Pallas qui eſt déeſſe de Sageſſe,
 tomba vn iour à l'impourueue es rethz de Ve-

nus & Cupidon chassans. Et pource nous fault
il recourir au second moyen. Et puis que voyons
cest Amour n'estre conduict que d'un desir em-
penné d'une esperance, luy fault couper les ais-
les, par un desespoir d'attaindre au poinct qui
nous tourmente. Toutesfois ne se trouueroit ce
desespoir suffisant, qui ne luy bailleroit la rai-
son pour sa conduicte, c'est la volonté d'en sor-
tir. Par ce que plusieurs amans desirans en ex-
tremité, entrent bien souuent en desesperation
de paruenir ou ils pretendent: Ce neantmoins
tant s'en fault que par ce moyen ils euadent,
que plus ils entrent es alteres: & semblable-
ment n'est requis entrer en celle deffiance pour
quelque mauuais recueil qu'on ait receu de sa
dame (car si pour ce regard, soudain par une ar-
tificielle œillade d'elle, r'entreroit l'amant en sa
malladie) mais persistant en ce ferme vouloir
de sortir de ceste obscure & tenebreuse prison,
luy fault premierement pourpenser, que la fem-
me ayant ce dernier point en trop grande recom-
mendation (comme le seul repos de son honneur)
iamais ne le voudra lascher, & ou elle l'haban-
donneroit, ne meriter d'estre aimée, commit-
tant ainsi à la mercy d'autrui l'unique merite
de son corps, se descouurant par ce moyen d'une
lege-

legereté trop volage. Ainsi qu'en l'une ou l'autre sorte la poursuiviroit-il en vain: & passant encores plus oultre, remettre devant ses yeux les malheurs & fascheries ordinaires chambrières d'Amour, se faisant par le fait d'autrui sage. Qui luy sera une bride, qui, peut estre, luy temperera en partie l'extremité de ses desirs. Mais il fault que telles considerations tombent en son esprit des le commencement (comme j'ay dit & redit) & lors qu'il peut cognoistre le gouffre ou il se pourroit submerger, si bien tost n'y donnoit ordre: car si d'un long trait se laissoit mastiner par ses passions & furies, Amour est de telle sorte, que prenant force par nos pensées, nous crucie d'une si viue maniere, que nous voulans mal à nous mesmes, & avecques cognoissance de nostre perte, aimons celle que sçavons se repaistre en nostre travail & martire, & voulans sortir de ce mal, à grand' peine pouvons nous discerner, si le sortir nous est plus profitable que de viure en telle peine: comme quelquefois j'ay compris dans ce mien sonnet, que vous entendrez à present.

Quand reuiendra que prenant mon deduit
Pourray reuoir quelque bon iour de feste?

Quand reuiédra ce téps, que dans ma teste
 Pourray vouloir le bié qui mieux me duit?
 Cruelz penfers, qui tant & iour & nuit
 Sus moy iettez fouldre, orage, tempeste:
 Cruelz penfers, qui tant me rendez beste
 De conspirer vostre mort, qui me nuit:
 Car tout ainsi comme le Dieu qu'on vit
 Iadis frustré de sa diue puissance,
 Ayant meurtry les ouuriers du tonnerre.
 Là! vous perdant, l'astre souz lequel i'erre
 Tirant mō mal d'vne plus haulte essence,
 Me rauiroit tout l'heur qui me ruit.

*Considere doncq' ce moyen plustost que tard,
 deuant que ce feu petit à petit le consume, &
 le contournant en son esprit, peult estre, aussi
 facilement sortira-il de ce destroit, qu'il y estoit
 entré. Lors Philopole: Ce remede (dist il) se-
 roit singulier pour ceux qui le pourroient pra-
 tiquer: mais quant à moy, i'en sçay vn aultre
 cent fois plus prompt & expediant que le vo-
 stre. Et quel doncq'? dist la Damoiselle. Je
 le dirois volontiers, respondit-il, n'estoit que ie
 crain, que le disant ne le vouliez pratiquer. A
 celà ne tienne, dist-elle, que ne nous en faciez
 part, si c'est chose qui vaille: car ie croy qu'il
 n'y*

n'y à celuy en ceste compagnie, qui n'ayt l'estomach assez fort pour le sçauoir bien digerer, & en vser s'il est bon. C'est, repliqua Philopole, comme vn cheualier errant, & maintenant perpetuellement l'honneur de toutes Dames, passer sa fantasie en tous autres endroitz, que celuy dont lon est frapé : car tout ainsi que pour guerir la morsure d'un Scorpion, est requis tuer sus le champ celle beste qui nous a causé le venin, ou bien en ce deffault vser d'huile alambiquée d'autres scorpions, aussi me semble que là ou pour guerir nostre mal, ne pourrions trouuer medecine en celle qui en seroit le motif, il faudroit prendre son adresse en toutes aultres, qui par vn progres de temps nous feroient perdre celle douleur. Vray que ie suis asseuré que telz propos ne vous plairont, seigneur Monophile, qui hier par voz discours imputiez à impropre à celuy qui seulement de la pensée voudroit forfaire enuers sa Dame: mais quant à moy, tant s'en fault que i'y trouue forfaiture, qu'au contraire il me semble celuy estre le seul moyen de bien & parfaitement aimer, sans m'eslongner que bien peu de vostre opiniõ: car si cest Amour, comme dites, vient d'une puissance celeste, voulez-vous meilleur moyen pour cognoistre celle

Autre moyẽ
de Philopo
le pour s'ex
empter de
l'Amour.

qui vous est due par les astres, que changeant de l'une & l'autre, tomber à la parfin en celle, en laquelle plus vous plaisez & trouuez de contentement. Ainsi dient tous philosophes Genetliques pour cognoistre nostre bon & suivre nostre influence, estre requis changer d'habit, de noms, & de diuerses contrées, & en celle nous arrester ou rencontrons nostre meilleur, sans par trop nous opiniastrer en lieu, auquel si voulions prosperer, faudroit faire retrograder la reuolution des cieux qui s'encline en nous autre part. Et pource, seigneur Monophile, seroit-ce une grand'bestise à tout homme de bon esprit, asseruir son esprit d'une si estrange façon, qu'il aime mieux se ruiner d'heure à autre auprès la femme qui ne luy est destinée, que de chercher son alibi avecq' vnes & autres, la faueur desquelles il gaignera du premier coup, parce que le ciel les luy aura reseruées: & pour mon regard si ie me trouuois en telles alteres (que dieu m'en gard) ne craindrois beaucoup en user. Ceste consideration de Philopole prouenant d'une si haulte perspective, pour donner couuerture à l'opinion qu'il entendoit mieux par effect que par parolle, faisant quelque peu rire la compaignie, soudain fut par la

Damoiselle

Damoiselle repliqué : Ie le croy, dist-elle, sans qu'en iuriez, & pense que n'estes à esproüuer vostre remede, ne qu'il y ait homme en la compagnie, qui pour ce regard en portast meilleur tesmoignage. C'est tout au rebours, ma Damoiselle, respondit-il: car asseurez-vous que ie ne m'abastardy iamais iusques à me publier seruiteur d'une seule, par ce que ie penserois estre trop ingrat & discourtois enuers tout le reste du sexe, pour une seule habandonner l'Amour d'une infinité d'autres, qui possible meritent autant ou plus estre obeyes, que celle ou ie consommerois corps & temps. Mais au contraire, luy respondy-ie : car en aimant une parfaitement, seriez cent fois plus gracieux & courtois enuers les autres : là ou les voulant toutes contenter, toutes les mescontentez; & ne fault point que pensiez la courtoisie d'autre part prendre sa source que de l'amour (c'est la cause, dist Philopole, d'une voix basse, pourquoy ie ne me repen pas beaucoup n'entendre non plus à ma court que ie fay, pource qu'elle se vend trop cher) & qu'ainsi soit, dis-ie continuant mon propos, aisez tous les romans & histoires meslées de telles affaires, vous trouuerez les plus parfaitz & loyaux amans, estre ceux qui mieux exercent la cour-

Que l'A-
mour fait
les g'es cour
tois.

toisie en l'endroit de toutes autres, & fust-ce seulement pour l'honneur qu'ils portent aux femmes, en faueur de leur seule Dame: de maniere que verrez plusieurs hommes par vne bestise naturelle, lours, badaux: lesquelz, ny par bonnes lettres ou sciences, ny par bons & honorables auertissemens de leurs sages precepteurs, ny par vsance & conuersation de gentilz-hommes, ne peuuent estre induitz à l'honneur, auquel toutesfois le seul Amour les esperonne tellement, que comme si de nouveau fussent passez par l'alambicq, & mis en nouuelle fonte, d'autant deuiennent-ils ciuilz, comme au parauant rustiques, en quoy ils estoient parangons. Aussi est-ce le commun langage du vulgaire, que pour façonner vn ieune homme, il luy seroit presque conuenable se mettre souz les esles d'une Dame, à laquelle il fist l'Amour, comme moyen suffisant pour attaindre à toute ciuilité & honneur. Par ce qu'estans surpris d'une philastie & Amour de nous mesmes, ne pouuons cognoistre noz faultes, desquelles noz Dames bien souuent nous auertissent: & à leur suscitation, estudions à nous corriger & changer, prenans tel chastiment beaucoup plus à gré de leur part, que si tous les prescheurs en chaire

nous en auertissoient. Et combien que (l'Amour
estât vne fois empraint dans vne Dame comme
en l'homme) c'est chose trop asséeurée qu'elle sera
aussi auenglée aux façons de son amy, que luy
mesme, & que celle grand' amitié luy empes-
chera descouvrir beaucoup d'imperfections qui
sont en luy (lesquelles vn autre pourroit voir à
l'œil, ny plus ny moins que des peres & meres
à l'endroit de leurs enfans) si est-ce que l'enuie
& affection qu'auons d'agréeer & complaire
à noz Dames bien aimées, nous seruent de bon-
ne & excorte escorte, pour nous guider & con-
duire à toute voye d'honneur. Et tout ainsi qu'un
bon Capitaine, voulāt assaillir vne ville, ne met
seulement son esperance en ses gens (qui est tou-
tesfois son plus grand appuy) ains luy est neces-
saire le canon & autres grandz adminicules
de guerre, ainsi se proposant ce vray amant gai-
gner le cueur de sa Dame, ne luy met seulement
en auant son Amour pour la vaincre, qui est le
plus grand poinct de tous, ains inuentera mille
honnestetez & gaillardises, pour atteindre au
dessus de son entreprise: & comme voyez cest
ancien poete en son art d'Amour, nous voulant
instruire celuy qui doit faindre l'Amour, nous
bailler les plus grandz preceptes du monde en

LE SECOND LIVRE

cest endroit verrez celuy qui aime, vser de telles instructions, voire plus grandes, sans aucun art, sinon celuy qu'il apprendra du seul Amour, lequel nous sert d'un bien bon protocole, pour iouer vn tel personnage. Je n'enten point toutes ces choses, repliqua Philopole, & si plus auant ie m'y fondois, plustost en parlerois- ie par cueur que par liure, pour n'en auoir fait l'essay: mais par ce que ie ne mereigle point tant par liure en cecy, comme en ce que moy-mesme ie contemple (& contemple avecq' le plus grand plaisir du monde) ie vous suply' dites moy, quelle marque de courtoisie reconnoissez-vous en ces amoureux transis, sinon vne solitude perpetuelle, vne alienation d'esprit, vn contemnement de toutes autres choses, hors mis de celle vers qui s'adressent ses pensées, comme mesmement nagueres nous aprit le seigneur Monophile? Et puis dites, seigneur Pasquier, que telles gens qui ont en horreur tout le monde, ayent vn seul brin de ceste honnesteté, que dites estre tant exquise en vn amant. Et à ce que ne pensiez que i'en parle du tout comme ignorant, ie suis quelquefois tombé en gens si passionnez, qu'ils contemnoient non seulement le monde, ains se desplaisoiēt à eux-mesmes. Chose dōt leurs Dames

De la seule
contenance,
de quelques
amoureux
transis.

vn peu

Vn peu plus sages & auisées, estoient mesme-
ment honteuses. Et estantz quelques-fois par
elles redarguez de telles faultes, alleguoient ces
pauures sotz pour toute excuse, ne s'en pouuoir
exempter, & ne leur plaire autre chose que la
presence de leur Dame. Certainement pigeons si
farouches estoient trop difficiles à apriuoiser,
& tant s'en fault qu'ils aprinsent quelque en-
tregent honneste, que comme bestes desnüées de
tout iugement naturel, perdoient toute conte-
nance: Si en la presence de leur Dame, & qu'il y
eust aucun homme present, qui leur empeschast
communication de propos auecques elles, con-
tournoient ores d'un costé, ores d'un autre, pour
n'auoir autre moyen: si en l'absence (par ce que
rien ne leur agreoit que leur Dame) iamaïs ne se
fussent cõtenuz en vne place ny compagnie, &
eust-elle esté la plus hõneste que lon eust sceu ren-
contrer. Et si par force eussent esté contrainctz
demourer, tout leur entretien estoit vne longue
taciturnité: de fait que se rendantz ridicules à
vn chacun, se faisoïent estimer telz qu'ils estoïent,
ie dirois sotz, n'estoit que ie craindrois desplai-
re à quelques vns d'entre nous, lesquelz ce neãt
moins ie suply ne prendre rien mauuais de ma
part. Et puis que si auant me suis transporté en

LE SECOND LIVRE

ce propos, bien me plairoit, seigneur Pasquier, plus qu'autre chose, vn poinct qu'auez auecq' assez grand' vitesse passé, auquel semblez donner conseil aux ieunes gens faire l'Amour, pour se rengier & conformer à vne honnesteté ciuile.

Que meilleur est faindre l'Amour que d'aimer.

Vraiment tel auis n'est que tresbon, & y prestant consentement, semblablement consentiray ie auecq' le seigneur Glaphire, lors qu'il conseilloit à vn homme d'armes faire le semblable, pour aprendre mille petites gentilleses, compagnes de toute ciuilité. Et si m'estendray plus auant: car encores ne fermeray-ie la porte aux bonnetz rondz & gens de robe longue. Par ce qu'ores que l'estude soit leur principal manoir, si ne leur est-il desconuenable sçauoir telles petites courtoisies, combien que ie ne souhaite que du tout ils s'y employent. Et pour y paruenir (suyuant ce que vous, seigneur Pasquier, disiez) facent doncq' l'amour si bon leur semble, mais toutesfois se donnans garde de mesprendre: & que pensans faindre l'Amour (ce que i'enten faire l'Amour) ne tombent en cette rage & folie de Cupido. Voila le vray but & moyen pour paruenir à telles honnestetez: voilà la vraye voye pour complaire non seulement à toutes Dames, ains à toutes gens & personnes de quel-

quelque qualité qu'ils soient, & non se laisser si indiscretement aller, que lon vienne en mes-cognoissance non seulement des autres hommes, ains de sa personne propre, comme nous auons veu es liures en la personne d'un Salomon, d'un Hercules, & d'une infinité d'autres de bon esprit, lors qu'ils furent priuez de ceste passion: mais y estantz entrez, si changez, que plus sembloient participer du brut animal, que de l'homme. Si telz eussent esté bien sages & prudentz, plus tost eussent-ils fait l'Amour, que de se rengier à l'Amour: & plustost eussent rendu l'Amour à eux captif, que de se rendre à luy esclaves: & ne fussent tombez au parler de tout le monde à leur grande confusion. Mais quoy? telz accidentz son vrais apennages d'Amour, & n'est que chose ordinaire à celuy qui met le pié dans ce labyrinthe, de sage prendre l'habitude d'un fol, perdre la cognoissance de soy, du monde, & de Dieu. Là ou celuy qui par une prudence & astuce sçaura trencher du passionné, & s'adonner aux honnestetez requises pour gaigner le cueur des Dames, aura mille auantages sus celuy, qui sera bien auant en Amour. Premièrement sera si sage, de ne se laisser vaincre des passions. D'ailleurs ne derogeant à son

sexe, ne permettra qu'une femme, se puisse van-
 ter l'auoir supedité, & quasi mené en triumphe
 (comme vn serf) avecq' grande ignominie de
 s'estre laissé succumber par chose si fragile que
 la femme, laquelle Dieu n'a créée que pour ad-
 ioinct, & adminicule des hommes. D'auantage
 fera tant par sa prudence, qu'il n'encourra mau-
 uais bruit enuers le peuple, soit pour sa Dame, ou
 pour soy. Ce que le perplex amant ne peut aucu-
 nement exiter, voire lors qu'il pense estre le plus
 couuert. Et qu'il soit vray, ie vous pry conside-
 rer lors qu'on mettra seulemēt sa Dame en chāp,
 ne le voirrez-vous soudain changer couleur,
 luy mesme l'exalter & extoller sus toute crea-
 ture viuante, & en entamant les propos rou-
 gir & ternir ensemblement, donnant entiere co-
 gnoissance, que celle part a arresté son cueur &
 sa pensée? Qui est la cause pourquoy les anciens
 figurerent l'Amour tout nud, par ce que facile-
 ment, & sans aucune difficulté se manifeste à
 tous. Ou au contraire celuy qui d'un fainct arti-
 fice, d'un bel entretien & acueil, sçaura faire
 semblant à l'Amour, ne parlera que bien sobre-
 ment de celle, qu'il se fera proposé acueillir sus
 toutes les autres: & en parlera si neceßité le
 requiert, avecq' vne telle prudence que le plus
 sou-

soupçonneux du monde n'en sçaura penser aucun mal, cherchera sa maistresse, donnant entendre se trouuer en tel endroit pour vn autre grand respect. Quoy? n'estimez-vous point, que la femme, qui plus doit auoir son honneur cher que toutes autres chose du monde, n'ait en meilleure estime, & ne tienne plus de conte de cetuy, que d'un ie ne sçay quel casanier, qui tant s'oublie soy-mesme, que mesmement met en oubly la reputation de sa Dame? Et si ces raisons ne vous semblent suffisantes pour vous monstrier que le passionné amant n'est si agreable à la femme, comme celuy qui faine l'Amour: cõttemplons, ie vous suply, de plus pres le naturel d'une femme (ce que toutesfois ie vous pry, ma damoiselle, ne prendre en mauuaise part de moy: car non à vous, que pour vostre vertu ie metz hors de ce nombre, ains à la commune des sottises s'adressent ces miennes paroles) considerons doncq' de grace le naturel de la femme, est-ce s'accommoder à la volonte de celuy qui plus l'a en recommandation, ou bien à celuy qui plus la chérit & caresse? De ma part ie sçay, & le voy iournellement, celuy estre le mieux venu, qui mieux la sçaura gouverner de quelques gracieux propos, qui mieux luy sçaura gratifier;

LE SECOND LIVRE

qui mieux luy fera la court, bref qui mieux sçaura la gratter par quelques douces flateries, & entretenir d'honnestes & exterieures caresses. Car quant à l'interieur, la femme si peu que rien s'en soucie, quelque cas qu'elle desire vne loyauté (dont possible elle n'a tache) laquelle toutefois elle ne tient en si grand' cure & soucy, que superficielles ceremonies. Ains vous diray bien plus, que là ou elle vous verra plus passionné pour elle, moins elle en tiendra de conte: & vous voyant refroidy, alors s'eschauffera en elle l'Amour & affection enuers vous. Estant du tout l'esprit feminin contrariant & contreuenant à nos volontez. Si doncques il est ainsi (comme certainement il est, par la mesme confession des femmes) qu'ordinairement la femme prenne son plaisir à entretenir de coruées le vray amant, ne vault-il pas beaucoup mieux l'y entretenir elle mesme? Et vrayement fault-il qu'avecq' nostre tresgrande honte & vergongne, i'accuse les hommes d'une trop grande lascheté, de nous laisser ainsi vaincre à la volonté des femmes, qui si bien sont apprises & coustumieres de nous laver, & comme si estions du tout despourueux d'entendement, ne leur sçaurions rendre contr'eschange. Faisons doncq' comme elles, & à

mau-

mauuais ieu bonne mine, avecq' vn milion de courtoisies & gaillardises: lesquelles si nous sçauons pratiquer, & qu'elles entendent que ce soit en leur faueur, les acompagnantz d'vne escorse de loyauté, ie m'asseure que celle sera bien estrange, qui en fin ne se rède à nous facile. Aussi seroit la femme bien farouche & mal priuée, qui ne tiendroit côte de l'homme gracieux, courtois, modeste en fait, respectueux en parole, posé en tous mouuementz, faisant profession d'auoir en recommandation tout ce qui plaist à sa Dame, avecq' vne aduertance qu'il a de tenir secret non seulement toute chose qui importe, ains iusques aux petites faueurs qu'il reçoit de sa maistresse. Lesquelles choses sçaura tresbien faire celuy que ie vous ay figuré, & non l'autre qui par vne grande brutalité, se rend risée à tout le monde, pour s'aneantir aupres la femme qui se plaist à luy desplaire, par ce qu'elle luy plaist tant: mettant toute son estude (le voyant ainsi esblouy) à le rendre plus auenglé & entretenir de bayes, par vne emmielée parole, dont elle la sçaura mieux enforceler, que la Silla ou Circe par leurs doux & enforcelez chantz. Ce que ie vous pry de rechef, madame, ne trouuer mauuais de moy, par ce que tousiours telle a esté mon

LE SECOND LIVRE

opinion : laquelle ie croy que n'estes marrie si ie metz en auant, d'autant que ie ne pense rien faire sans vostre congé & licence. Ces propos touchèrent au vif l'un de nostre compagnie. Car à les ouir ainsi dechiffrer, qui seroit celuy si ebeté & despourueu d'entendement, qui n'estimast que Philopole quasi d'un propos deliberé, ne voulust picquer Monophile, qui estoit blecé à outrance du mal qui fut en tout ce discours detesté? Or veult-il user de reuenge. Parquoy d'un ris demy-coleré, luy dist : Assurez-vous seigneur Philopole, que sans l'amitié que ie vous porte, & reuerence que ie doy à toute ceste compagnie, ie dirois que par le passé nous auriez longuement desguisé vostre naturel, ou bien que pour le present seriez deuenu grand corrupteur de republicque, en laquelle voulez introduire vne si fainte hipocrisie, masquée de telle magie, qu'il n'y a si honeste femme, qui ne se trouuaist surprise par voz astuces & moyens. Ie vous pry beau sire, gardez qu'il ne vous en mesprenne autant, comme à l'autheur qui fut banny & depossédé de son pais, pour nous auoir voulu instruire un si cauteleux amoureux, comme celuy que souhaitez. Et vraiment (dist Charilée) là ou telle chose auendroit, ie voudrois pren-

prendre la cause pour luy . Non que ie vueille
 permettre ses propos trouuer lieu en la genera-
 lité des femmes : mais ie ne trouueray estrange
 que son conseil s'exerce en l'endroit de celles,
 qui malicieusement s'imputent à gloire & hon-
 neur, emmarteler les pauvres gens , asscurement
 dignes non de reprehension , ains de griefue &
 enorme punition . Et pour dire la verité on en
 trouue si grand nombre de telles , que presque
 me semon-ie à croire grand' part de ses pro-
 pos , ores qu'ils tendent à nostre grand desa-
 uantage . Mais quoy ? vous verrez pour le iour-
 d'huy ma Dame la popine en entretenir ores vn,
 ores l'autre, puis vn tiers, par vn faulx semblât
 palié d'une honnesteté, & de celuy qui plus sera
 en son endroit affectonné , ne tenir autre conte
 sinon comme d'un asnier, car ainsi le nommera
 elle. De sorte que ie n'entre point en merueille, si
 beaucoup de gens suiuant vostre auis , seigneur
 Philopole, taschent à se deguïser enuers les fem-
 mes , puis qu'elles mesmes leur en aprenent le
 chemin : & que tout ainsi qu'elles par faintes
 caresses , scauent allecher & attirer beaucoup
 de gens à soy , aussi par contreruse en treuuent
 beaucoup d'autres de bon esprit qui leur rendent
 bille pareille , & ayans impetré sus elles ce

De la simu-
 lation de la
 plus part
 des Dames.

LE SECOND LIVRE

qu'ils demandent, les submettent à l'ignominie de tout le monde. Aussi y en a-il plusieurs, (dist lors Monophile, protecteur de l'honneur des femmes) qui à tort detractent d'elles, se vantans bien souvent auoir mis tout le corps ou iamaïs n'eurent tant de de credit d'y pouuoir mettre vn seul pié: pour vne vengeance sans plus d'un refus bien assené: ou que, comme la plus part du monde met son but en ostentation, s'en treuuent beaucoup qui pour acquerir reputation de braues hommes, se publient bien souvent gouuerner & auoir faueur de telle, de laquelle n'eurent iamaïs parole bien digerée. Au moyen dequoy ie seray d'auis & conseilleray tousiours à vne femme, premier qu'habãdonner chose qu'elle ne pourra puis apres reuoquer, y auiser à deux & trois veues. Par ce que la femme du commencement de ce monde par vne legere creance fut cause de l'erreur dont nostre premier pere fut deceu: pour le iourd'huy nous en sçauons tresbien exercer la vengeance, se trouuans cent millions d'hommes & personnes, qui se tournent à grand louange decevoir par belles mines & semblans vne pauvre & simple femmelette. Et le pis encor' que i'y trouue, est qu'incontinent qu'auons imaginé vne femme en nostre esprit,

pen-

penſons qu'elle nous ſoit deue, quaſi par obligation, laquelle ſoudain voudrions mettre en execution. Et ſi parauenture pour aſſeurer ſon honneur ne veult condeſcendre à ce dont l'importunons, verrez vn petit mignon tantoſt luy bail-
ler le nom d'vne ma dame la ſucrée, d'vne ma dame la ruſée, qui pluſtoſt choiſiroit admettre en ſa bonne grace quelque quidam de nulle valeur, qu'vn ſi ioly compaignon & de telle priſe que luy. Nous nous abuſons, ſeigneur Philopole, & vous & moy, ſi ainſi le penſons. Car à la femme eſt reſervée la liberté de ſe deffendre, & à l'homme la puissance de l'aſſaillir: à la femme eſt baillée oreille pour ouyr, à l'homme langue pour requerir. Et tout ainſi qu'il vous eſt loyſible la rcquerir, auſſi eſt-il en elle vous eſconduire. Et qui plus eſt, ſ'il failloit qu'à tous propoꝝ la femme s'habandonnaſt, qu'elle prerogative auroient ceux qui ſeroient premiers en date? quel auantage meriteroient ceux qui par vne perfection d'Amour, & par vne longue poursuite, ſeroient en poſſeſſion de leurs corps, & de leurs eſpritꝝ? Ce ne ſeroit, ſans point de faulte, raiſon que les depoſſedaſſiez d'vne choſe tant meritée. Et ſi d'auenture auenoit que conceuſſiez quelque douleur pour tel refus, peut eſtre

LE SECOND LIVRE

que iustement & nō sans cause vous seroit deu.
 Alors Charilée: A ce que ie voy, seigneur Glaphire, dist-elle, si vous n'entreuenēz sus ceste querelle, le seigneur Monophile iouera quelque mauuais tour au seigneur Philopole. Mais pour leur faire & l'vn & l'autre oublier leur mal-talent, ie vous pry y donner remede, par la continuation du propos que nous auēz encommencé, pour le remede de nostre amant. A ceste parole Glaphire, qui pendant tout ce discours estoit deuenu fort bon auditeur, quasi sortant d'un profond somme, apres auoir vn bien peu hesité au parler: Croyez, dist-il, seigneur Monophile que voz propos, ensemble ceux de ceste compagnie, me rauissoient tellemēt en eux, que non seulement m'estois esgaré aux miens, ains en moy mesme. Et vous suply ne les discontinuer, tant me semblent de bonne grace. Mais bien vous les vostres (respondit Monophile) ausquelz ie serois tresmarry, que les nostres entreuenūz aportassent prescription. Que voulez-vous, repliqua Glaphire, que ie vous die, en chose si difficile? D'autant qu'en la matiere proposée, ie sçay bien estre beaucoup le plus expediant iamais n'aymer: mais donner remede prompt à celuy qui est ia enuenimé de ce mal,
 c'est

c'est à dieu & non à autre qu'il en fault querir conseil. Toutesfois si encor' me semonnez donner medecine à cestuy: comme naguere ie disois, sorte bien tost de ce pas ce pauvre amant, premier que se rendre plus miserable. Car, ayant obuié aux commencemens, ne luy fauldra medecine de forte digestion, pour le remettre en sa nature. Mais s'il y est tellement engraué que pour toutes ses forces ne puisse venir à bon port, & comme tantost nous disions, vueille, & n'en puisse sortir, pour vous dire ce qu'il m'en semble, vne bonne & longue diete, vne absence bien lointaine satisfera à ce default. Et voudrois icy pratiquer le remede que Galien, & autres souverains medecins dient estre propre à la peste, qui est, fuir tost, & loing, & tard retourner. Et là ou le fuir tost defauldroit, qui est beaucoup le plus prompt, pour le moins auoir son recours aux deux autres. Tel moyen vous semblera pour le commencement grief, si est-il vn des plus souverains remedes dont l'on vse en ce danger. Car si la presence, nous cause tel tourment, veritablement l'absence seule nous pourra apporter entiere guerison & medecine. Ha, dy-ie lors, seigneur Glaphire, pas ne l'iray passer ce poinct. Comment? que l'amour par

Le souue-
rain reme-
de d'A-
mour.

LE SECOND LIVRE

absence prenne aucune diminution ? tant s'en fault que ie le croye, que telle chose me semble le boutefeu & augmentation d'Amour, & comme maintesfois i'ay entendu de pauvres passionnez, toutes autres douleurs par absence perdent leur cours, ceste seule plus s'en augmente. Je vous diray, seigneur Pasquier, respondit Glaphire, ie croy bien que sus les premiers iours de nostre absence, sentons telle aigreur & amertume en nostre esprit, que trouuons vn iour plus grand que tout le reste de l'année (& est ceste chose conforme à ce que le seigneur Monophile hier sus le meillieu de noz deuis asseuroit) mais à la longue, soyez seur qu'il n'y a si grand' amour, qu'il n'y a si grand' douleur, qui ne s'estrange, & se trouuassent tous les amoureux du monde pour me maintenir le contraire. Mais en ce remede fault vser d'une bien grande patience. Car si pour vn, deux, trois, quatre mois vous absentez, & puis tombez en la presence de vostre dame, autant vous vaudra & profitera ce peu d'absence, comme si iamais n'en auiez vse. Car ceste presence nous cause telle alteration, que non seulement oublions toute nostre premiere entreprise, ains s'allume le feu en nous plus vehement cent fois que celui du precedant.

L'absence
remede d'A
mour.

Tous

Tous medecins craignent grandement la recheute. Et tout ainsi qu'un malade auquel est interdit l'air, s'esuantant deuant le temps, tombe en plus grosse fieure, que celle dont au premier estoit frappé: ainsi sera-il de cestuy malade amoureux. Car s'il n'est bien confirmé & fortifié en soy premier que se trouuer en la presence de sa dame, autant luy profitera l'absence comme rien. Mais estant bien muni & hors de toute passion, qui se fait par vne longitude de temps, alors pourra-il à son aise & sans crainte, se rencontrer avecq' elle: & non toutesfois par trop, car il n'est pas moins dangereux manger trop d'une bonne viande, à un estomach delicat, que bien peu, d'une mauuaise. En maniere que tout ainsi que n'estât encor' du tout guery de l'amour, tant soit peu de veue, luy eust porté grande nuisance, aussi apres sa guerison entiere, un trop ententif regard, luy pourroit apporter trop de moleste. Car à dire le vray, ie ne sçay comment les yeux de noz dames nous sont pires cent fois que ceux du Basilicq': par lesquelz on meurt d'une seule mort, & par ceux cy de mille & mille tous les iours, sans pouuoir neantmoins mourir. Nous estans toutes les meilleures parties d'elles, plus venimeuses, que les morseures d'aspics. Car ou elles leur ser-

LE SECOND LIVRE

uent de grand lustre & ornement, au contraire ne sont faites (ce semble) par nature, que pour nostre ruine & totale destructiõ. Pour le moins, ainsi me l'a appris quelqu'un bien enamouré d'une dame en un sonet, auquel louant les vertus & singulieres beautez d'elle, deploroit par mesme moyen son malheur.

Les deux beaux yeux de sa teste sacrée
Sont deux soleilz: & ses cheueux dorez
Sont les rayons des soleilz decorez:
La bouche estant pour les dieux cõsacrée.
Que dis-je dieux? cest œil, qui tât m'agrée,
N'a du soleil les rayons coulourez,
Du basilic' sont ses bordz entourez:
Car luy sans plus mon ame a massacrée,
Et ces cheueux, sont les liens, les las
Dont (sans penser) m'atrapant à la chasse,
M'envelopa de mil' & mile helas.
La bouche aussi ou naist ce ris friant,
Las c'est le pis du pis qu'on me pourchasse,
Me faisant viure & mourir en riant.

Quoy? n'est-ce pas recevoir aussi mauvais traitement qu'un Promethée, en qui iournellement le foye renaïssoit, apres que le cruel oyseau de
Iupi-

Iupiter en auoit pris sa refection & pasture? n'est-ce pire qu'un Sisiphe, qui sans cesse, & sans donner fin à son trauail, tournoit & retournoit sa pierre? Je ne compareray telles passions à un Promethée, ou Sisiphe, ains à l'horrible monstre Hydra, auquel se renouueloiēt sept testes, lors qu'Hercule luy en auoit trencé vne. Soit doncq' sage & prudent celuy qui de soy veut bannir telles passions. Car plus de peine y aura, estans en luy enracinées, à les rendre à soy subiuguées, que n'eut ce vaillant Hercule contre les forces de ce monstre. Et pourtant se donne bien garde cest amant, qui par un long trait de temps se sera absenté de sa dame, de la r'acoster puis apres que bien peu. Car par un doux cil d'œil, par vne honnesté parole, pourroit en luy en un instant renouueler plus de cruelles furies, que celles esquelles par vne longue main penseroit auoir donné fin. Et ce faisant, ie suis seur qu'auccq' le temps trouuera moyen à ceste desmesurée douleur. Ie sçay bien, seigneur Pasquier, que mes propos ne trouueront pas lieu en vous, non plus qu'au seigneur Monophile, n'ayans l'un & l'autre iamais fait espreuue d'une telle medecine: mais ne faites aucune doute, qu'Amour à la fin ne vieillesse, & ne preigne

quelque diminution, aussi bien que toutes choses. Ne voyez-vous vne terre bien fertile, par faulte d'estre cultiuée, à la parfin tomber en friche? Ne voyez-vous les Republiques par faulte de bon entretenement, venir par succession de temps en decadence? N'estant doncq' cest Amour entretenu de ses nerfz, & de ce qui mieux le nourrit en sa gresse, qu'estimez-vous qu'il en soit? Toutes choses ont leur ply, & toutes choses ont leur vogue, Partant doit bien auiser & considerer vne Dame auecq' bonne & meure deliberation, en quel danger & hazard elle entre, lors qu'elle se soubmet à vn homme: puis que par opinion du vulgue, n'a que ce thesor à garder. Et non seulement, comme n'agueres vous disiez, seigneur Monophile, pour les desouyssemes des hommes, qui est bien bonne consideration, mais aussi en l'endroit de ceux qui pour quelque temps seroient bien affectionnez enuers elles: d'autant que les volontez des hommes sont variables, & que les plus sages sont pour le iourd'huy plus muables: par ce qu'ilz sont hommes, fragiles, & debiles en leurs conseilz. Et puis qu'en si grand' instance, vous, ma Damoiselle, auez voulu que missions à ceste heure nostre estude en l'amortissement de l'Amour, ie me sentirois

Exhortatiō
aux dames
pour l'entre-
tenement de
leur honneur.

rois vser d'une trop grand' ingratitude, voulant
espargner mon conseil à celles qui peut estre n'en
ont que faire: c'est à toutes honnestes Dames,
ausquelles ie veux bien remonstrer (encores que
ce soit en mon grand desauantage) que la chose
que plus elles doyuent craindre, soit à l'endroit
de leurs bien-amez, ou enuers les estrangers,
est laisser perdre le pié & le dessus, qu'elles a-
uoient gaigné sur eux. Car à bien parler la fem-
me est ainsi que le tendre verre, qui en sa fragi-
lité est net, pur, & munde, & auquel vn cha-
cun se plaist, quand il est en son essence: mais lors
qu'on le voit cassé, tombe au mespris & contem-
nement d'un chacun: ainsi la femme ayant per-
mis rompre en elle, ce qu'elle deuoit tant precieu-
sément contregarder, d'autant qu'au parauant
estoit de tous estimée, autant se trouue-elle à son
grand regret d'un chacun vilipendée, mesme
de ceux qui se publoient ses esclaués: lesquels
ayans acquis sus elle telle barre, gaignent le
nom de maistre & seigneur. L'histoire vous est
assez notoire de l'ancienne diuision de l'hom-
me, lequel de son premier estre, naissant auecq.
quatre piedz, autant de mains, & deux testes,
fut miparty par les Dieux, dont d'une part fut
fait le masle, & en l'autre trouua la femelle

LE SECOND LIVRE

son nom. Or ay-ie leu en quelques fort antiques
 auteurs dignes de foy, que ce grand Dieu Iu-
 piter ayant aproprié à Vn chacun d'eux leurs
 propres & particulieres qualitez, entre au-
 tres choses dignes de recommandation, donna
 la garde de Virginité à la fille, & celle de cha-
 steté à la femme, pour leur servir d'un bon &
 assésuré pavois, contre les assaux de ce monde.
 Quelle peine doncques pensez-vous qu'il es-
 cheye à la femme pour Vne telle mesgarde? Ie
 ne doute point que ne trouuiez ces propos tref-
 mal assis en moy: d'autant qu'il vous semblera
 que ie soye enuieux de nostre commun bien &
 profit: mais auienne ce qu'auenir en pourra, car
 aussi bien me suis-ie déterminé donner mon auis
 à la femme, comme à l'homme, & fust-ce en
 nostre preiudice. A laquelle sans passer plus ou-
 tre, ie suply ne franchir le sault d'Amour. Par
 ce que si l'aymer est dangereux à Vn homme,
 pour les passions qui luy sont occurrentes sans
 plus: beaucoup plus est dommageable à la Da-
 me, qui sent les mesmes trenchées: & d'auan-
 tage, interesse & outrage grandement sa re-
 nommée, que plus elle doit fauoriser que soy
 mesmes, & de laquelle ne tenant conte, à pei-
 ne qu'elle se pourchasse aucun bien. Ie croy que
 ce seul

ce seul pensément la doit reuoquer de beaucoup de sottes entreprises, esquelles pourroit trop aueuglément tomber. Et si peut estre telle crainte n'est assez suffisant obstacle pour l'en distraire, qu'elle oste toutes occasions qui pourroient en elle allumer quelque estincelle de feu si ardent, par le moyen duquel pourroit puis apres se perdre totalement & consommer. Ne preste l'œil ny l'aureille à ceux desquelz elle se craindra. Aussi la vergongne feminine desire porter bas sa veue, pour ne desirer aucune chose. Car si par vne folle presumption elle veut tant esperer de soy, que de se promettre victoire sus l'Amour, comme se pensant trop impassible, pour ne se laisser par luy ranger, se trouuera quelque iour aussi inopinément surmontée, comme à la legere vne si outrecuydée opinion se sera emparée d'elle. Les moynes se ferment & deleguent aux cloestres, & les hermites meinent vie austere & solitaire dans les espoisses forestz, pour fuyr les ayguillons de la chair: & qui sera la femme si presumptueuse, qui se promette la domter entre les delices de ce monde, si elle-mesme ne s'en bannit? La femme rit, parle, deuise avecques les ieunes gens, pense n'estre point conuoytée, par ce qu'elle n'a-

LE SECOND LIVRE

pete point : Et toutesfois ne songe pas qu'elle couue en soy sa ruine, par telles familiares conuersations & deuis . Beaucoup meilleur luy seroit, & pour son extreme profit, se deporter de toutes telles compagnies : sans permettre faire de si pres les aproches au fort qu'elle seule peut deffendre, & non autre: puis qu'en ce seul chasteau gist l'vnique asseurance de son honneur. Mais sus tout se garde bien vouloir escouter celuy qui avec vne vmbreuse parole, ou par corruptelle de dons, vouldra desrober son grand bien, ainsi que l'oyseleur par ces doux chantz l'oyselet, ou le pescheur par ces petitx apastz le poisson. Car toute ville qui endure sommation avecq' assez grand propos, semble vouloir consentir à sa perte, pour tomber en la puissance des ennemis. Et d'auantage vous scauez rien n'estre impossible à celuy qui souhaite pour paruenir à ses fins: & est chose trop difficile que femme tant desirée se puisse garentir des embusches de l'auenglée ieunesse. Il failloit que ces propos prinssent leurs cours en moy, pour demourer les Dames vn-bien peu satisfaites d'un bon vouloir & grande obligation que i'ay en elles. Vous asseurant que se maintenant en telle sorte, accroistront grandement leur

leur bruit, & sera bien necessaire à ceux qui trop temerairement sont prodigues de leur liberté, s'ayder du peu de conseil, que cy dessus leur ay baillé: ou se pourvoir eux-mesmes de quelques autres, qui leur sembleront meilleurs: ne m'estant proposé au peu que i'ay discouru m'accommoder au contentement d'un chacun (qui me seroit un trop grand fais & pesant) ains seulement descourir en bref le remede, que i'ay tousiours estimé propre pour la santé d'un amant: qui est l'absence, avec un ferme propos de iamais ne s'acheminer à sa Dame. Or est tel remede causé plus par un artifice & industrie, qui en cela nous conduit, que par nostre naturel mouuement: mais ny plus ny moins que par voz discours, seigneurs Monophile & Pasquier, nous auez appris, non point les moyens d'aymer, ou comme il se faillloit par un art gouverner en Amour, ains les subtilitez & manieres, comme ce petit larronneau se scauoit saisir de noz cueurs, quand moins pensions estre des siens: ainsi vous veu-x-ie amener autre moyen, non comme par conseil deuons euader d'Amour, mais comme quelquefois sans y penser sommes contrains l'habandonner. C'est desdain: desdain dy-ie tout puissant pour faire

Autre moyē
par lequel
amour trou-
ue, fin.

LE SECOND LIVRE

chasser cest Amour . Et est ceste chose trop certaine & Verifiée: comme mesme nous apert par plusieurs exemples . Toutesfois tout ainsi que le seigneur Pasquier nous deduyfant l'Amour, le disoit sembler prendre diuerses natures, selon la diuersité des passions : ainsi prend ce desdain diuers effectz, selon la qualité des amans , ores plus , & ores moins, selon que l'aigreur nous touche. Et si peut estre voulez sçauoir dont prend ouuerture ce desdain , bien que n'en aye oncques fait l'essay , si le vous veux-ie deriuier de deux diuerses sources & fontaines. La premiere doncques sera (laquelle à la verité me semble estre de grande efficace) quand apres vne longue poursuyte de noz Dames, & vne infinité d'obeissances, cognoissons l'ingratitude de celles (ausquelles auions consacré noz cueurs) qui pour faire risées de nous (comme peu chaillantes de la seruitude qu'auons en elles) pregnent leur esbat & deduit à nous iouer tour qui tende par trop à nostre desauantage. Lequel encores que difficilement l'imprimions en nostre fantasie , & par maniere de dire, voyans ne le voulions voir : si est-ce que venant depuis petit à petit en nostre cognoissance , c'est chose trop asseurée qu'ordinairement

cest

cest Amour prendra le ply d'une haine, beaucoup plus grande que n'estoit celle amytié. Le Regnier(descouvert par Boccace en l'une de ses iournées) nous y servira d'un tefmoin. Or si ce desdain est dangereux, lors qu'il est en sa chaude colle, trop mieux l'aimé-ie croire, qu'en faire preuue : pour le moins m'asseuré-ie bien que par luy maintz preud'hommes vindrent en telle agonie & extremité, qu'ils en donnerent la mort par vn furieux & enragé despit, à leur Dames, & bien souuent tout d'une main à eux mesmes. Aussi est-ce chose naturelle (comme disoit le seigneur Pasquier) que tout ainsi qu'aymons ceux qui bien nous veulent, aussi voulons mal à tous ceux qui nous le veulent. A maniere que le glorieux & superbe n'aymant autre que soy mesme, aussi est-il de tous hay, hormis de soy. Et est la cause, à mon auis, pourquoy les anciens iuriscultes mettoient entre leur droit de gent, ceste apetence de vengeance, par ce que naturellement elle tombe en tous espritx humains : & encores que de droit diuin soit defendue, si est-ce qu'à peine nous en pouuons nous exempter, tant nous est naturel & doux, vomir nostre venin à l'encontre de noz mal-vueillās. Ainsi n'est-il de merueille si une fem-

me nous ayant à soy emmiellée par ses enfor-
cellemens, cognoissans apres, par quelques ex-
terieurs actes, l'inimitié qu'en nostre deffaueur
elle couure, conuertissons nostre esprit au che-
min, ou elle nous sert de guyde. Ceste sera donc
la premiere espece de ce desdain, qui est de gran-
de puissance, & cent fois plus grande que l'au-
tre qu'ores ie veux alleguer, qui prouient d'une
certaine imagination que conceuons en noz es-
pritx: ou bien par vne creance legere des faux
raportx qui nous sont faitx de noz Dames,
ou de noz amis. Cestuy desdain à la verité,
n'est si precipitatif que l'autre, toutesfois ayant
pris son ply en nous par succession de temps, à
presque autant de vigueur & efficace que l'au-
tre. Et l'apelle lon pour le commencement ia-
lousie: laquelle ores que sus le premier de son
aage ne soit que renouvellement d'Amour, si
est-ce que croissant petit à petit en nous, venant
à degré de perfection, se mue & change du tout,
& laissant ce nom de ialousie prend & usur-
pe celui de desdain en beaucoup de personna-
ges. En beaucoup dy-ie: car non en tous: D'au-
tant que bien souuent l'affection est si grande,
qu'elle nous contraint quelquefois le digerer
maugré nous, & tousiours reside quelque es-
tincelle

stincelle de l'Amour que portios à noz bien aiméz ou aimées. Au demeurant ie pense que il se trouuera assez d'autres manieres de desdains (comme celuy qui à la longue se cause par vn assidu refus) toutesfois pour ne les auoir encor bien ruminez en ma teste, ie suis trescontent les passer sans en parler. Vous suffise qu'encores en ay-ie plus dit que ie ne m'estois pourgetté. A l'heure le seigneur Philopole: A ce que ie voy, dist-il, le seigneur Glaphire a mis grand peine à nous deduire les moyens par lesquels Amour prend fin: mais encores me vante-ie que si i'eusse entrepris tel fais, ie fusse beaucoup mieux venu (& en peu de paroles) à bout d'une si braue entreprise. Il allegue vne longue absence accompagnée d'une enuie de sortir de cest Amour, vn ie ne sçay quel desdain, causé par plusieurs effectz: mais si ne touche-il point au blanc: & vous auise que telz remedes n'entrêt en comparaison avecq' les miens: lesquels s'il vous plaist entendre, ie les vous diray en peu. Il me semble que cestuy Asclepiade medecin du temps passé, ne fut iamais aprouué de la commune des autres, parce qu'en ses opinions affermoit, l'art de medeciner les gens se pouuoir maintenir en son entier sans aucunes potions & medicamens com-

posez, ains seulement disoit cinq choses estre necessaires, l'exercice, vomissement, repos de nuict, promenement, & vne bonne & longue diete. Ces remedes assurement ne se trouuoient impertinens pour ceux qui estoient en santé, sans attainte de maladie : mais à ceux qui d'une longue ficure eussent esté attenuez, ie ne sçay en quoy ils eussent sçeu profiter. Ainsi ceste longue diete & absence, que le seigneur Glaphire nous propose, ie ne sçay si elle trouuera lieu en ceux qui sont ia frapez & touchez à mort. Et quant au desdain que proposez, par ce que tel remede est plus fortuit & casuel qu'autrement, ie lairray en ce operer la Nature des amans, tout ainsi qu'elle se pourra comporter : & pour mes moyens ie suiuray la commune des medecins, vous aportant medecine & potion, en laquelle heberge la seule & entiere guarison de cestuy nostre malade. Je suis doncques d'avis que tout homme se sentant trauaillé d'Amour, boyue de l'eau de ce fleuve Lethe, autrement appellé oublieux, lequel ma damoiselle Charilée nous a remis en memoire vers la fin de son naufrage. Et si tel moië ne luy semble bon, pourra prendre sa route vers le cercle de la Lune, ou peut estre retrouuera

grande

grande partie de son sens esgaré , depuis le temps qu'il mit le pied dans les marches de Cupidon. Mais si ce chemin luy semble vn peu trop fascheux à defricher , pourra en ce pratiquer le conseil des medecins , & vser vn peu d'Helebore , herbe du tout dediée à telz folastres dont nous parlons. Car si iamais gens furent despourueux de cerueau , les amans certes le sont: & si despourueux , qu'ilz ne se peuvent reduire en la voye dont trop à l'estourdie sont sortiz . Et pour mieux confesser la verité , ie ne puis bonnement discerner si telle chose plus tost procede de leur sotte indiscretion , que de l'astuce des femmes , tellement atrayante le cueur des hommes , qu'il semble (& disoit ceste parole Philopole en riant , pour voir qu'en diroient Charilée , & Monophile son protecteur) le dyable s'estre voulu en elles incorporer , pour tromper gens , non de basse & infime condition , ains ceux qui par longue vsance auoient acquis noms de sages , & reputation par tout ce monde . Lors Monophile recueillant ces paroles assez aygrement : Vous estes merueilleusement partial , dist il , veu que pour assener parole si mal digerée , estes voulu sortir de noz bornes sans aucune occasion:

si ne

si ne pouuiez-vous mieux toutesfois descouvrir
 Pour les Da nostre bestise, que par les propos que tenez. Car
 mes contre d'autāt sommes-nous plus grossiers, d'ainsi nous
 les hommes, laisser subiuguer par la femme, & elle plus sage
 de s'en sçauoir garentir. Combien qu'il n'en soit
 ainsi: car si quelques vns par femmes sont tom-
 bez en l'opprobre & irrisiō du monde, aussi s'est
 trouuée vne Medée, vne Phillis, vne Dido, &
 vne infinité d'autres pauvres femmelettes, qui
 par la deception de leurs faulx & desloyaux Ia-
 sons, Demophoons, & AEnées, se sont rendues
 fables & à leur contemporains, & à leur poste-
 rité. Pourtāt ne me semble-il raisonnable qu'ain-
 si, & à tort desprisez ce sexe, duquel depend no-
 stre heur, nostre bien, & felicité: sans lequel ne
 pouuons estre, sans lequel ne pouuons viure, &
 sans lequel nous ne serions. Il est vray (repliqua
 Philopole) car c'est vn mal necessaire. Encor' e-
 stes-vous plus mal embouché, dist Monophile,
 & vous seroit plus seant tenir autre party que
 ne faites. Mais vous, seigneur Glaphire (dist-il
 adressant vers luy sa parole) quelque chose que
 Philopole se soit estudié rompre voz propos, ne
 les discontinuez, s'il vous plaist. Mais la Da-
 moiselle, voyant que le Soleil auoit ia haussé ses
 rayons, de façon que nostre trop longue demeure
 eust

eust peu donner quelque moleste au surplus de la compagnie qui estoit coustumiere (pendant ce peu de temps que fusmes aux champs) faire son repas de bonne heure: Vous vous faites tort, dist elle, seigneur Monophile, d'ainsi esbranler le seigneur Glaphire, en matiere à mon iugement si peu à vostre auantage: veu mesment que le tēps semble vous auoir voulu porter faueur, s'estant ainsi auancé, & quasi precipité pour donner conclusion à nos propos: ausquelz si parauanture i'ay trouué acheminement, aussi ueux-ie bien à ce coup interceder pour Amour, duquel i'ay plus de pitié, qu'il n'a compassion de ceux qui implorent sa mercy. Et ainsi nous departans, ie croy qu'il n'y aura celuy de nous qui ne demeure satisfait: Glaphire, d'auoir en peu tāt discouru: nous, pour auoir eu part à ses tant agreables propos: & vous, seigneur Monophile, d'en voir l'ysse si briefue: & au surplus, quant au reste de la compagnie, pour ne se donner facherie de nostre trop longue demeure. Alors Philopole: Vous auriez raison, ma Damoiselle, si ie vous accorderois vostre dire: mais vous osez-vous bien tant promettre, principalement pour mon regard, que i'en reste si content, comme en faites le semblant? me voulant quant & vous frustrer des braues di-

LE SECOND LIVRE

scours qu'icy se passent entre nous: lesquelz i'estime cent fois plus que toute la nourriture que nous pourrons tantost prendre, d'autant que l'esprit est plus singulier que le corps. Si auroit (repliqua la Damoiselle) l'esprit prou d'affaire, & deuiendroit bien maigre sans la refection du corps. Mais bien plus gras, dist Philopole, au moins le voyez par les hommes qui sont à ieun: cōprenans en peu d'heure beaucoup plus que les autres par vne lōgue espace de temps. Parquoy puis que par raison naturelle deuōs auoir ores les sens plus promptz & deliberez, que doutez vous, seigneur Glaphire, poursuyure la route commencée de voz discours? Vous ne me voulez espargner, respondit il, & toutesfois vous voyez que desia me cōmence la parole à bruncher & vaciller, encores que ie n'aye dit chose qui soit de grand' importance. Sus ces entre-faiçtes par cas fortuit suruindrent quatre ieunes hommes de la bande, qui nous cherchoient pour disner, lesquelz ayans esté par nous informez des propos qui illecq' s'estoient entre nous passez, apres plusieurs regretz par eux faitz de ce que Fortune ne les auoit plus tost en ce lieu acōduitz: Quoy donques? (dist quelqu'un d'entr'eux) sera dit que nostre venue soit cause de vostre

Vostre depart, sans que puisſions participer du peu qui reste? Je vous diray, dist la Damoyſelle, nous y pourrons recouurer tout à loysir toute ceste apres-disnée. Dieu m'en gard, respondit Glaphire: telle matiere ne me reuiet point à cueur, & ne puis en cest endroit me forcer aucunement. Mais si d'auanture vous est agreable auoir le plaisir de quelques bons deuis tout ainsi qu'une partie d'hier & du iourd'huy a esté disposée, au ſuiet le plus commun, & qui plus nous est affecté: ainsi, voyans les armes familiariser bien fort avecques l'Amour, & aussi y estant le temps fort adonné, pendant que nous trouuons icy en requoy, peut estre ne seroit-il hors propos disputer de l'estat d'un bon Capitaine. L'ocasion y est fort prompte: car combien qu'aucun de nous, pour estre en aage trop ieune, n'ait encores esté employé à tel exercice, au moyen dequoy n'en pourroit si bien ny subtilement deuiser, si pourrons nous en cecy estre en partie guydez par ces bons & vieux Gentilz-hommes, qui sont en nostre compagnie, lesquelz comme ie croy ne nous esconduyront en requeste si honorable. Si le peu qu'auoit discouru Glaphire s'estoit rendu agreable, ce conseil ne fut trouué moins digne de recommanda-

LE SECOND LIVRE


tirer, & depuis communiqué au surplus de la troupe, qui n'auoit assisté à noz propos: mais entendans nostre bonne deuotion, se delibera vn chacun à part soy faire monstre de son meilleur, mesmes les plus anciens de la bande: lesquelz pareillement informez de ceste hōneste entreprise louerent fort ceste bonne volonté. Ainsi ayās le iour ensuiuant changé d'hoste, s'aquiterent tous en la question proposée au moins mal qui leur fut possible: à laquelle apres auoir donné fin, aussi fermerent leur ieux & esbatz, prenans l'adresse du camp, souz espoir de mettre leur deuiz à bien bonne execution.

de Les Commandement
Fin du second liure du Monophile. *fecit*

GENIO ET INGENIO.

Imprimé à Paris par Benoist Preuost,
demeurant en la rue Fremen-
tel, à l'enseigne de l'E-
stoille d'Or.

1555.



MAMBOR

LEGATORE DI LIBRI

CORSO 32



